



天台四教儀集註

南天竺沙門

蒙潤

集

天台四教儀集註



清刻龍藏佛說法變相圖

天台四教儀集註序

世二

天台四教儀者實教門之要道也自昔至今註釋者衆或略而不備或博而太繁矧又節去正文但標初後苟非精誦者真之能閱也今集諸部之文註於其下將無便於披覽者歟其間一二與諸家有同異者世二蓋述所聞於先德非任胸臆也若夫文末正修初乘觀法文雖簡約理亦備焉諸新學人究心於茲忘言忘思筌筮俱擲奚以是為然能爾也則無適而不可亦豈離是云乎哉時元統甲戌夏五南天竺白蓮華沙門蒙潤謹序

天台四教儀集註卷第一

南天竺沙門 蒙潤 集

天台四教儀

天台山名也天者顛也元氣未分混而為一兩儀既判清而為天濁而為地此本俗名且依俗釋台者星名也其地分野應天三台故以名焉如輔行十一上此山即大師棲身入寂之所蓋以西方風俗稱名為尊此土避名為敬故以此處顯其人也復以人命家則天台為宗矣今題意在焉四教者別文明化儀化法有乎八教今但言四教者以通名立題義攝兩種蓋非化儀無以判非化法無以釋一書之旨莫越於斯教者聖人被下之言亦詮理化物為義問或約化儀立題乃據籤文化儀四教文義

世二

二

整足任運攝得三藏等四為證或謂頌宣藏等以為頓等謂化儀無體又謂頓等四教古師亦用藏等四教起自天台以此為化法立題今何以從通名耶答化儀化法有體無體或彼此相攝文各有意皆不為此立題而設况古師所立頓等與今不同故妙樂以頓等藏等為天台一家判釋之綱目今此一書既明判釋立題四教豈偏屬乎儀者天台一家四教判釋儀式也文末既云自從此下畧明諸家判教儀式顯今一書明判明釋在乎天台豈可謂如來施化次第儀式耶

高麗沙門


諦觀錄高麗東夷國名沙門此云勤息謂勤行衆善止息諸惡故又沙門復以釋為

姓者始於晉安法師也後增一阿舍來此  
 土云四河入海同一鹹味四姓出家皆名  
 為釋文顯性錄以四句揀云一是沙門非  
 釋子出家外道二是釋子非沙門在家釋  
 種此王種三是釋子是沙門兩土之僧此  
姓出家通四非釋子非沙門兩土之俗四  
稱為釋四非釋子非沙門兩土之俗四  
 句揀之無遺矣或謂是釋子是沙門乃釋  
 種出家且梵土餘種出家及此土之僧皆  
 稱沙門釋子為何句收耶錄謂觀師抄錄  
 台教綱要也

天台智者大師

拾遺記云天台棲真之處智者隋主所稱  
 大師羣生模範亦帝王大臣所師也  
 以五時八教判釋東流一代聖教罄無不盡  
 五時八教本是如來所說之法大師依義

立名用此判釋一代聖教故云以也然上  
 天台智者乃能判能釋之人東流聖教乃  
 所判所釋之法五時八教乃判釋之儀式  
 也蓋天台準法華意判釋諸經如籤文云  
 判釋準乎部教部教之義唯在法華判謂  
 剖判釋謂解釋妙樂云頓等是此宗判教  
 之大綱藏等是一家釋義之綱目如以化  
 儀判華嚴為頓以化法別圓解釋乃至判  
 法華為非頓非漸以純圓獨妙解釋




東流者佛法自西而流東也代者更也如來五十年說法為一代今以五時八教判釋無遺若爾妙玄何云柰苑之前不預小攝耶須知妙玄約時破古謂說提謂經時乃未轉法輪已前未有僧寶故破古師不應於鹿苑前別立提謂為人天小教若約法收經則如四教義云三藏明世間布施持戒禪定即是人天之教並正因緣所生善法此已為三藏所攝故先達云約時破古不當五時所收約法收經義當三藏所攝也

言五時者一華嚴時

從經題立時雖歷七處八會新經九會抵是一經因行如華莊嚴果德具云大方廣佛華嚴經此人法譬三具足立題更有單三複

三

立題 七種



舊經晉譯五十卷或六十卷成新經唐譯八十卷成若龍宮三本上本十三世界微塵數品中本四十九萬八千八百偈下本十萬偈四十八品今但有三十九品如釋籤十八十舊立四種華嚴祖無顯文考大師荆溪之意則有約時約處約理之不同約理則曰法界約處或曰寂場約時曰三七

日或時長盡未來際何得認此名言便謂  
 華嚴有四種之別且其間於義有妨不應  
 以後分時長華嚴而為寂場又不應將通  
 五時中通後之義為時長也問華嚴時長  
 為至何時答如妙樂云義當轉教時也經  
 家取後分部類相從結歸前分華嚴部內  
 此即通五時中文通之類也若般若明華  
 嚴海空及日若垂沒餘輝峻嶺與夫蓮華  
 藏海通至涅槃之後此於他部明華嚴義  
 不可結歸本部乃通五時中義通之類非  
 時長也

### 二鹿苑時

從處立時說經雖多同一處故乃如來昔  
 生垂化之地緣如輔行輔行羣鹿所居故  
 名鹿苑從樹為名亦名柰苑二仙所居亦

名仙苑

### 說四阿舍

阿舍翻無比法妙玄初云增一明人天因  
 果中明真寂深義雜明諸禪定長破外道  
 而通說無常知苦斷集證滅修道丈

### 三方等時

廣談四教均被眾機說經既多處亦不一  
 故約法立時也若普賢觀稱方等者從理  
 得名如釋籤六十五云此以理等名方等典  
 若止觀二六云四門入清涼池日方所契  
 之理曰等此約行理合論今是生酥調斥  
 之方等義應屬事

### 說維摩

具云維摩詰所說經人法立題此云淨名  
 亦翻淨無垢稱

思益

具云思益梵天所問經網明菩薩答

楞伽

翻不可往

楞嚴三昧

楞嚴翻徠相三昧翻調直定亦云正心行

處

金光明

金即法身光即般若明即解脫單法立題

玄文順古復約譬喻一釋格他譬法不周

其如經題是法非譬又不可以被利鈍機

雙存法譬也

勝鬘等經

具云勝鬘獅子吼一乘大方便方廣經勝

鬘夫人即舍衛國波斯匿王女末利夫人

世三

七

所生為踰闍國妃

四般若時

說摩訶般若光讚般若金剛從經題立時  
般若小品般若等諸般若經從經題立時  
般若翻智慧般若尊重智慧輕薄即五種  
不番之一也摩訶翻大多勝以多含故不

翻光讚經云於是世尊從其舌本悉覆佛  
土而出無數百千光明照三千界其光明  
中自然而植金蓮華其蓮華上各有諸佛  
講說此經光即光明讚即講說即大品上  
帙金剛從喻立名以金中精剛能斷難斷  
喻般若斷疑蕩相亦名小般若乃大部六  
百卷中第五百七十七卷大品輔行五上  
七云大品凡列法門無不皆以五陰為首  
等諸般若經者謂等於小品放光仁王天  
王文殊問般若等

五法華涅槃時

從經題立時以此二經同醍醐故具云妙法蓮華經妙名不可思議法即十界十如權實之法蓮華譬上權實法也涅槃具云摩訶般涅槃那此云大滅度大即法身滅即解脫度即般若即三德秘藏也

是為五時

結也

亦名五味

五時在大部中或作五味列故云亦也五時說法頌云阿含十二方等八二十二年般若談法華涅槃共八年華嚴最初三七

言八教者頓漸秘密不定藏通別圓是名八

教

世二

八

初總標不從漸來直說於大時部居初故名為頓中間三味次第調停破邪立正鹿

引小向大方會一切法皆摩訶衍般若故名

為漸不思議力同聽異聞互不相知名秘

密教聞小證大聞大證小得益不同名不

定教經律論三各含文理條然不同名三

藏教三乘共行鈍同三藏利根菩薩通後

別圓故名通教獨菩薩法別前藏通次第

修證別後圓教故名別教教理智斷行位

因果滿足頓妙一切圓融故名圓教

頓等四教是化儀如世藥方藏等四教名化

法如辨藥味

化儀化物儀式化法化物方法義例五云

頓等四教是佛化儀藏等四教是佛化法

如是等義散在廣文今依大本畧錄綱要

廣文一家教部即下文廣本也大本即法華玄義今文所錄通依一家廣文如文末云謹案台教廣本的依大本玄義如云請看法華玄義十卷

初辨五時五味及化儀四教然後出藏通別

世二

九

圓

此明今文抄錄之法化儀屬部故與時味兼明化法屬教故後別明也

第一頓教者即華嚴經也

此判部屬頓

從部時味等得名為頓

此釋出屬頓所以也部唯約法時兼法譬味專約譬最初說大時味俱初故得頓名此下所謂如來等約部判頓此經中云下約時判頓涅槃云下約味判頓後準法華

判也


所謂如來初成正覺在寂滅道場四十一位法身大士及宿世根熟天龍八部一時圍繞如雲籠月爾時如來現盧舍那身說圓滿修多羅故言頓教

如來乘如實道來成正覺文句九一初成正覺三七日說大化之始故曰初成離邪曰正背妄曰覺寂滅道場寂五住煩惱滅二種生死得道之場故曰道場即摩竭提國阿蘭若處處隨法轉名寂滅場四十一位圓教住行向地等覺別地已上證道同圓四念處云華嚴後無等覺者乃部中談位不可以此而難今文經前列衆也法身大士破無明惑得無生忍捨生身已居實報土受法性身故曰法身上求下化建立

十二

十

大事故曰大士宿世根熟佛化衆生種熟  
 脫三時時不廢謂種在久遠熟在宿世脫  
 在今日天龍八部天龍別名八部總稱總  
 別兼舉也天一龍二夜叉三乾闥婆四阿  
 修羅五迦樓羅六緊那羅七摩睺羅伽八  
 人非人等總結八部龍鬼等得預法會者  
 乘急戒緩故大師準涅槃經云於戒緩者  
 不名為緩於乘緩者乃名為緩之文遂開  
 乘戒四句



十五謂之白月智光漸增故譬智德十六  
 至三十日謂之黑月邪光漸滅故譬斷德  
 爾時如來指丈六身即境本定身也現盧  
 舍那身現即現起盧舍那翻淨滿謂諸惡  
 都盡故淨衆德悉圓故滿報自亦翻光明遍  
 照他報亦名尊特亦名勝應新譯華嚴云毘  
 盧遮那妙樂九七破云近來翻譯法報不  
 分二三莫辨文然華嚴教主經疏諸文或  
 云釋迦或云舍那者蓋是釋迦現起舍那  
 故也而淨覺謂本是實報土身應下二土  
 故解謗破云汝執藏塵為尊特相樹下之  
 身有此相否故昇須彌山頂品云爾時世  
 尊不離一切菩提樹下而上昇須彌向帝  
 釋殿豈非華嚴是千百億應身所說此身  
 既被別圓之機見是尊特何須獨指花臺

受職身耶文蓋指千百億應身中之一身

所說月堂云境本定身則是釋迦機感見

相乃是舍那此即釋迦境本定身現起舍

那尊特也上品相好下品尊特二現言之

正當須現圓滿修多羅約圓實部主說釋

籤云華嚴頓部正在圓真兼申別俗修多

羅翻契經聖教之都名若十二部中直說

法相者名修多羅今非此意故言頓教結

部屬頓也

若約機約教未免兼權

機是所被教是能被機有別圓教兼權實

輔行曰約部約味得名為頓部內之教教

仍兼漸

謂初發心時便成正覺等文為圓機說圓教

此釋能兼之圓如後釋等文者等於三無

差別之文

處處說行布次第則為權機說別教

此釋所兼之別凡經文處處所說行列排

布恒沙法門歷劫修行次第之義皆別教

也今文欲顯部中機教兼權故指經中別

圓各說顯文為證若別圓間說及分圓即

別融別即圓義非一槩也

故約部為頓

此結從部為頓

約教名兼

此結部中機教兼權

此經中云譬如日出先照高山第一時

晉譯華嚴二十九寶王如來性起品文有

四照合法有五今家約義引經但作三照

又復義開平地為三用對涅槃五味妙立

一六 釋籤一七 別行義疏記云彼經預叙一代始終故立譬云猶如日出先照高山次照幽谷後照平地今家義開平地為三對於涅槃五味文日譬於佛光譬說教照物譬被機高山譬別圓眾此譬兼於機應也若釋籤用兩經二義相成者旻智行云若不用涅槃五味則不顯華嚴演三成五若不用華嚴三照則不顯涅槃後之四味皆從牛出舊謂今家合四為三而諸文直作三照引經何嘗云合四耶又有以經中譬如日月出現世間乃至深山幽谷無不普照之文謂是經文合四為三殊不知此文只是照幽谷也


三 經文四照

約義引經恒作三照

照 先照諸大山至普賢菩薩等高山乳旁邊華嚴

世三

十三



五 次照一切大山聲聞  
緣覺  
樂谷略 二誘鹿苑  
平地義開平地為三  
食時生酥體信方等  
萬中熟酥領知般若  
然後普照大地一切眾生  
凌善根眾生  
圖成相味  
涅槃云譬如從牛出乳此從佛出十二部經  
一乳 牛譬於佛乳譬於教釋籤云此五味  
相生之文在十三卷聖行品末佛印無垢  
藏王菩薩竟云譬如從牛出乳乃至醍醐  
譬如佛出十二部經乃至涅槃十二部經  
頌曰長行重頌并授記孤起無問而自說  
因緣譬喻及本事本生方廣未曾有論議  
俱成十二名廣如大論三十三華梵名義  
具如妙玄六此十二部經通論大小各具  
十二部別而言之小乘讓三存九小乘灰

斷無方廣經說必假緣無無問自說雖有授記作佛者少此以小九望大三也玄文又以大九望小三者謂大乘根利無因緣譬喻論議之三也又以大一望小十一者謂小乘但讓廣經一部耳釋籤云如上所說一往赴機據理應以通說為正

信解品云即遣旁人急追將還窮子驚愕稱怨大喚等

譬喻周中四大弟子具領五時今領華嚴文也即遣說華嚴教以擬宜也約教理為所依智為能遣教為所遣約人師弟相望佛為能遣菩薩為所遣傍人約教理智為正說教為旁約人化主為正菩薩為旁謂加被四菩薩說四十位法慧說十住功德林說十行金剛幢說十向金剛藏說十地

世二

十四

是四菩薩說此位時並云佛力故說故名

為遣然加被四菩薩者一表旁追義便二

彰主伴互融急追將還直將大教擬宜小

機故云急追昔有大種故曰將還况復性

德本有窮子無大乘功德法財故驚愕文

句六二云縱昔曾發廢久不憶卒聞大教

乘心故驚不識故愕稱怨大喚等文句六

一云小乘以煩惱為怨生死為苦苦若勸煩

惱即菩提即大喚稱冤枉若聞生死即涅

拌即大喚稱苦痛等者等於我不相犯何

為見捉之文

此領何義

徵此信解品文為領何等之義

答諸聲聞在座如聾若瘖等是也

答出華嚴擬宜也謂有耳不聞圓頓教故

如聾有眼不見舍那身以不見故不能讚  
歎故若瘖問妙立<sup>三</sup>云華嚴初分永無  
聲聞今何云聲聞在座耶答華嚴不入二  
乘人手聲聞若聞華嚴則非聲聞故不可  
云有若據華嚴擬宜小機其最鈍根具經  
五味故不可云無是則顯對則無擬宜則  
有今四大弟子領解如來擬宜之時故云  
聲聞在座也所以摩訶迦葉却叙小機蒙  
大擬時迷悶躡地若聾瘖文出經後分妙  
立云後分則有後分狀當聾瘖况前分耶  
故別行疏記云以後顯前機未堪大普惠  
覺謂前分乃有根性聲聞此則不可若云  
聲聞根性義亦有之如下文云所謂二乘  
根性在華嚴座也

第二漸教者此下三時三味總名爲漸

次頓之後總名三漸者寢頓施漸也  
次爲三乘根性於頓無益故不動寂場而游  
鹿苑脫舍那珍御之服著丈六弊垢之衣  
三乘乘以運載爲義聲聞以四諦爲乘緣  
覺以十二因緣爲乘菩薩以六度爲乘運  
出三界歸於涅槃根性輔行云能生爲根  
數習爲性於頓無益此三乘人於華嚴座  
不信不解是故如來不動寂場而游鹿苑  
此顯雙垂兩相二始同時也脫舍那珍御  
之服此明寢大施小化儀次第也約佛意  
則寢法華之實而施權據化儀次第則寢  
華嚴之頓而施漸處說不動而游衣論脫  
珍著弊文互顯耳然若不明不動而游無  
以見二始同時不明脫珍著弊無以見寢  
大施小此文曲盡如來妙應無謀設化之

相也舍那勝應尊特智定莊嚴故譬珍御  
丈六劣應生身忍生法惱故譬弊垢蓋法  
譬雙明也

示從兜率降下託摩耶胎住胎出胎納妃生  
子出家苦行六年已後木菩提樹下以草為

座成劣應身

世二

十六

此明小始也本是圓佛垂為三藏初成之  
相故云示也兜率翻知足此天有內苑外  
苑菩薩居內苑而降神也然在六欲梵世  
七天之中以佛常居中故從彼下生托摩  
耶胎摩耶翻天后淨飯王之后也妙樂云  
一切諸佛皆不在餘二賤姓故尚尊貴時  
在刹利尚多聞時在婆羅門又濁難調時  
在刹利清易調時在婆羅門文托胎菩薩  
自右脇入正慧托胎小乘見乘白象貫日


之精大乘見乘梅檀樓閣等住胎若小乘  
八相合住胎在托胎內今示小始垂化事  
迹非正明八相也出胎四月八日右脇降  
神出瑞應經納妃有三一瞿夷二耶輸三  
鹿野生子即羅睺羅也佛出同居示同人  
法出家時年十九二月十五日夜半乘天  
馬踰城苦行須六年者文句七九十云但諸  
佛道同為緣事異釋迦苦行六年草生攢  
陛至肘不覺諸天哭喚動地不聞移座得  
道彌勒即出家日成道彼佛十劫猶不現  
世二  
前非根有利鈍道有難易緣宜賒促應示  
長短耳文輔行云六年苦行所以伏見為  
調外道過其所行文頌云十九踰城六苦  
行五歲遊歷三十成說法度生五十年是  
則共當八十壽木菩提樹菩提翻道佛於

樹下成道故名道樹草座因果經說帝釋化為吉祥童子以草施佛坐以成道木樹草座皆表三藏詮生滅故劣應對大乘勝應判為劣也

初在鹿苑先為五人說四諦十二因緣事六度等教

五人頌曰頻鞞跋提并俱利此三屬在父之親陳如十力母之親初轉法輪先度此文句五二云問何故初為五人轉法輪答人先見諦故人是現見故人為證故佛所行事業與人同故諸天從人中得善利故

人中有四眾故妙樂五卅一問雖涉五意正在人故皆以人答文若唯就五人應有三意妙樂六一一酬釋尊行因本願二赴五人本願先悟三報今日侍奉之勞



摩男長子之通稱以摩訶翻大故俱利斛飯王之

長子跋提甘露飯王之長子故皆稱摩男

釋摩男即陳如也以四姓出家同名釋氏

佛初成道最先得度在一切人天羅漢之前如妙樂一三引分別功德論云佛最長

子即陳如也諦緣度三具在下文五人是世三

聲聞只應說四諦今通舉鹿苑所說之法也事六度者三藏教談實有事不即理故

若約時則日照幽谷第二時

舊譯華嚴出現品云譬如日月出現世間

舊譯華嚴出現品云譬如日月出現世間

舊譯華嚴出現品云譬如日月出現世間

乃至深山幽谷無不普照文輔行一上廿八

云幽谷者山川之幽邃也文

若約味則從乳出酪此從十二部經出九部

修多羅味一酪

從乳出酪蓋譬如來施教次第從頓施漸

相生之義若約機者濃淡在焉如下文云

一者但取相生次第二者取其濃淡從十

二部出九部亦且相生其實九部從佛出

也

信解品云而以方便密遣二人聲聞緣覺形色憔悴

無威德者汝可詣彼徐語窮子顧汝除糞

而以方便方法也便用也善用其法逗會

衆生亦善巧之謂也密遣文句六三廿云初

擬大乘云即遣旁人表一實諦一大乘教

一菩薩人今明方便隱實為密指偏真為

世二

十九

遣約教隱滿字為密半字為遣約人內秘

菩薩行為密外現是聲聞為遣約化儀寢

大施小為遣小不測大為密文二人文句

六三廿云四大弟子齊已分領不涉菩薩故

言二人約法是因緣四諦約理是有作真

俗約人是聲聞緣覺文今且約人形色憔悴

文句六三廿云二乘教中不修相好但說

苦空無常不淨即形色憔悴又五廿云內怖

無常曰憔悴外遭八苦曰憔悴文無威德者無

有十力四無所畏故汝可詣彼徐語窮子

文句六四廿云即以小教擬小機也大教明

理直實故言疾走往捉小教明理紆隱故

言徐語文顧汝除糞顧賃也文句六四廿云

除苦集之糞取道滅之價文

此領何義答次頓之後說三藏教二十年中

常令除糞即破見思煩惱等義也

二十年中用八忍八智斷見合為一無碍

一解脫用九無碍九解脫斷思總成二十

經中更有兩處明二十年若住二乘位轉大乘教名為

於二十年中執作家事從有二乘之機而

來感佛故云自見子來已二十年皆取二

乘各有十智見思煩惱分別曰見貪愛曰

思止觀八初云昏煩之法惱亂心神文此

破見思答上除糞糞能染污故以譬之謂

染污真理也

次明方等部世二淨名等經彈偏斥小歎大褒圓

四教俱說藏為半字教通別圓為滿字教對

半說滿故言對教

次明方等部等判部收經也彈偏等明部

意也四教俱說等明部中用教也蓋以大

斥小逗大逗小須四教故收經雖廣淨名

有彈斥功特標為首彈偏斥小歎大褒圓

妙樂四三云今家八字判盡經理謂斥

小彈偏歎大褒圓文釋籤十二云如觀衆

生品即是歎大稱歎文殊淨名即是褒圓

故令小根取小慕大文須彈斥者蓋為小

機執真保果取證入滅故纔證小果便堪

彈斥未必須在十二年後後因維摩示疾

毘耶佛令弟子詣彼問疾故皆述昔被訶

辭不堪往此是述昔訶乃密彈也若當座

訶如禮座去花等也四教俱說方等說三

藏者一為彈斥之本二為橫來之機如釋

籤云復有漸中初入小行及俗衆室外說

無常道輔行十四十云方等傍用三藏正用

三教以斥二乘令二乘人密成通益不語

菩薩者轉成行中人也對半說滿以滿斥半也故雖兼斥大正在斥小釋籤引大經云譬如長者唯有一子心常愛念將詣明師懼不速成尋便將還以愛念故晝夜殷勤但教半字而不教誨毘伽羅論良由其子力未堪故毘伽羅論翻字本謂世間文字之根本即滿字也若合喻者半字謂九部經毘伽羅論謂方等典即滿字也此據方等以大斥小故以衍門三教之滿而對三藏之半若文句云無方等所對之三者乃顯法華部妙唯一圓乘不同方等對三之圓也

若約時則食時第三時

即華嚴照平地中初食時也辰時毘羅三昧經有四食時早起諸天食日中三世佛食

日西畜生食日暮鬼神食今是諸天食時也

若約味則從酪出生酥此從九部出方等三味酥

約教論相生約機論濃淡既恥小慕大如

烹酪作生酥

信解品云過是已後心相體信入出無難然其所止猶在本處

過是已後過鹿苑三藏之後即今方等也心相體信父子互相體悉信順子信父故得果不虛父信子故聞大不謗入出無難文句六九云由是見尊特身聞大乘法名此為入復被訶斥猶見丈六說小乘法名此為出大小入出皆無疑難也文釋籤三三云不同畏懼王等之時故云無難文然

而修空觀用事識見生身住權理修中觀  
 用業識見尊特住實理今二乘人雖修空  
 觀入見尊特者由業識故蓋事業二識為  
 見相之本故解謗云入見尊特功由業識  
 教未開故且住草庵猶在本處猶居羅漢  
 果保證真空也

世三

世三


此領何義答三藏之後次說方等已得道果  
 心相體信聞罵不瞋內懷慙愧心漸淳淑  
 已得道果真空寂滅之道小乘羅漢果也  
 聞罵不瞋妙立十八云恣殃掘之譏任淨  
 名之折內懷慙愧釋籤云謂受彈斥令歎  
 大自鄙即其益相心漸淳淑密得通益也  
 次說般若轉教付財融通淘汰此般若中不  
 說藏教帶通別二正說圓教  
 次說般若等明部意也此般若中等部中

用教也轉教融通約法付財淘汰約喻所  
 以令其轉教菩薩意在二乘領知法門故  
 曰付財一乘本所不知但謂加被令說故  
 曰轉教妙樂七十二云於佛即是付財二乘  
 自謂加說故般若中云豈聲聞人敢有所  
 說有所說者皆是佛力由機未轉且言被  
 加文般若會一切法皆摩訶衍故曰融通  
 以空慧水蕩其執情故曰淘汰不說藏教  
 光明記四三云諸部般若廣示衍中三教  
 空慧復以三藏為助道觀又仁王般若說  
 四無常偈恐其各國正助合行帶通別二  
 正說圓教此約圓實部主而說蓋一代教  
 主意在圓若輔行十四云般若傍用通教  
 正用別圓加於二乘密成別益釋籤三  
 三云前於方等義已成通故至般若唯須

世三

世三

三云前於方等義已成通故至般若唯須



源解

此二明不共者說部意也即不共般若意也 正用別圓  
 意雖不共猶有方等新受小者至此須通  
 亦有衍門傍得小者是故兼用文傍用此通教  
 皆部中用教意也共部釋籤云諸部般若  
 以但不但二種中道不共之法與二乘共  
 說例方等部非無此義以方等經多順彈  
 訶共義稍踈般若於菩薩則成共說此據三根

約時則禺中時第四時

禺中說文云日在巳曰禺中

約味則從生酥出熟酥此從方等之後出摩

訶般若四熟酥味

約教生熟二酥相生次第約機則二乘心

漸通泰自知螢火不及日光敬伏之情倍

更轉熟如從生酥轉成熟酥也

信解品云是時長者有疾自知將死不久語

窮子言我今多有金銀珍寶倉庫盈溢其中

多少所應取與

世二

五十四

長者喻如來世間長者具十德如來具十

號有疾者法身無病隨機權示也自知將

死不久文句六九廿云有機則應為生機盡

應謝為死今化機將畢應謝非久也多有

金銀文句六九廿云金即別教理銀即通教

理大品所明真諦不出此二而言多有者  
 理則非多約種種門亦得言多 文 妙樂七  
 九云問大品有圓何故但云不出通別答  
 一者但語通別理已攝餘二論能詮教必  
 須具四今且從理故云不出此二二者二  
 乘至此多成通別亦且言之 文 珍寶者文  
 句六 九 云勸學中明一切法門皆是珍寶  
 文 倉庫盈溢等文句六 九 云倉是定門即  
 百八三昧庫是慧門即十八空境也通別  
 兩種定慧倉庫包藏一切禪定智慧無所  
 缺少內充外溢故云盈溢其中多少者說  
 於般若則有廣畧二門畧則為少廣則為  
 多自行為取化他為與 文  
 此領何義答明方等之後次說般若般若觀  
 慧即是家業空生身子受教轉教即是領知

世二

三五

等也

般若觀慧妙玄十 八 云大品或說無常無  
 我或說於空或說不生不滅皆歷色心至  
 一切種智句句回轉明修行法 文 即觀慧  
 義也家業長者宅為大乘家諸珍寶為不  
 思議業妙樂七 二 云前云付財今云付業  
 財從所營業即造作皆是菩薩修德三因  
 之作業也名異義同故得互舉空生身子  
 須菩提翻空生解空第一舍利弗翻身子  
 亦云鶖子智慧第一受教轉教受如來之  
 救命轉教菩薩即加被說也以空慧為入  
 道之主故加二人輔行六上 二 云凡言加  
 者加於可加須菩提空與般若空相應相  
 似是故佛加令其說空般若是智慧故亦  
 加身子所以但加此二人也 文 領知妙樂

二十八云被加為奉命所說名領知名說為  
領無別領也文此是熟酥益相得此益已  
義成別人淨名疏云大品二乘已有入假  
之義文觀音玄記上二十云聲聞轉教密破  
塵沙文大品會法八十一科皆摩訶衍不會人而無希取

一食之意

已上三味對華嚴頓教總名為漸

總結漸中三味

第三秘密教者如前四時中如來三輪不思  
議故或為此人說頓或為彼人說漸彼此互  
不相知能令得益故言秘密教

隱密赴機互不相知故名秘密釋籤一二十

云不定與秘並皆不出同聽異聞但互相  
知互不相知以辨兩異文若不堪於顯露  
入者須秘密說今對前頓漸顯露即明秘

世

三六

密若大本中先明不定對前頓漸定教為  
次第也此據說相次第雖爾秘密不定遍  
前四時初無前後具足應云秘密不定顯  
露不定今皆畧標然秘密之名起自龍樹  
如釋籤一二十引大論釋大品經諸天子歎

云我見閻浮提第二法輪轉今轉似初轉  
問初轉少今轉多云何以大喻小而言似  
耶答諸佛法輪有二種一者顯二者密初  
轉聲聞見八萬及一人諸菩薩見無量阿  
僧祇人得二乘無量阿僧祇人得無生忍  
無量阿僧祇人發無上道心行六波羅密  
阿僧祇人得初地乃至十地一生補處坐  
道場是名為密文故知初見八萬一人屬  
顯露攝秘密者如次明之文如前四時中  
指秘密教橫在四時別無部帙三輪光明

記一十三云身業現化名神通輪口業說法  
名正教輪意業鑿機名記心輪三皆摧碾  
衆生惑業故名爲輪下地不測亦名三密  
或爲此人說頓等妙玄先約頓漸三說相  
對次約說默相對各有三義謂此座十方

多人一人及俱三相對

天台四教儀集註卷第一

音釋

淑時六切 禺牛具切  
湛也

天台四教儀集註卷第二

南天竺沙門


蒙潤

集

世三

三說相對  
 初此座十方相對  
 多人一人相對  
 三俱三相對

大念此座說須十方說漸說不定頓座不聞十方十方不聞頓座亦座說漸十方說頓說不定各不相聞如前於此是顯於彼是密又於彼是顯於此是密據記義加大念或為一人說頓或為多人說漸說不定或為一人說漸為多人說頓說不定各不相聞互為顯密此記文義加或俱頓俱漸俱不定各不相聞互為顯密此記文義加



如釋籤云不定與秘並皆不出同聽異聞  
 但有互相知互不相知以辨兩異

大論叙出鹿顯聲聞是八萬人  
據空因是處但可云得法眼淨不可云八萬悟大亦不可以此作不定說

范顯密之相 密諸菩薩見無量阿僧祇人得二乘等

此以般若對鹿苑說即鹿苑中密說般若

義該三教故云諸菩薩見等也

立籤明鹿苑顯露 定 陳如得初果

定不定相對 不定 八萬諸天得無生忍

此約鹿苑聞小證大而說如籤云酪中雖無二別不妨以八萬及一人以辯定不定也

也

別行玄記涅槃疏 顯 說生滅 純根

明鹿苑顯密相對 密 說常住 利根別行玄利人處去已釋云八萬諸天獲無生忍是也

此以法華涅槃對鹿苑說即鹿苑中密說

圓常與法華涅槃悟入是同如別行玄記

云若八萬諸天獲無生忍故云密去又大

疏云利根入於三藏中宜聞常住聞即得

解如初轉法輪時八萬諸天得無生忍乃

是密教意據此豈可謂同聽生滅耶問鹿苑會上只一八萬諸天何故諸文或定不定顯密有異耶答如來赴機難思祖師釋義非一據諸天得法眼淨即顯露定教如云聲聞見八萬是也據聞小證大即顯露不定教如云八萬諸天得無生忍是也若曰密聞圓常即秘密教如云利人密去是也經意多含不可一準然八萬諸天既是利根密為正意蓋於三藏中宜聞常住故也且秘密教何以得傳如妙樂一八十云秘密不傳降佛已還非所述故尚非阿難能受豈弘教者所量文蓋用後叙出故可傳耳如妙樂云阿難非不傳秘赴機之秘非所傳耳故秘密所用全是顯教是故傳秘祇名傳顯文

第四不定教者亦由前四味中佛以一音演說法衆生隨類各得解此則如來不思議力能令衆生於漸說中得頓益於頓說中得漸益如是得益不同故言不定教也蓋一類機宿世於頓有漸種於漸有頓種故今聞小證大聞大證小推功歸教教名不定矣如大經置毒發毒大論八萬諸天得無生忍等皆不定義古師以金光明等別為一緣名偏方不定教今家不然一時一說一念之中備有不定一音通大小因果當分跨節顯之與密定與不定今是不定一音該乎大小是果人所用於漸說中得頓益妙玄云雖說四諦生滅而不妨不生不滅等釋籤云此指鹿苑雖施於漸不起於頓於頓說中得漸益妙玄云雖高山


頓說不動寂場而遊鹿苑釋籤云此指頓後漸初不動於頓而施漸化若方等般若雖爲菩薩說佛境界而有二乘智斷此二時中俱有小果新得舊得如常所明雖五人證果不妨八萬諸天得無生忍此重指漸初對般若說前文約法此中約人當知即頓而漸即漸而頓

然秘密不定二教教下義理只是藏通別圓上指四時爲秘密不定之部今明部中之教故此二教以藏等四教爲當體體真中二理爲所依體如妙樂九十云不定秘密義各合四顯之與密定與不定相對論故化儀四教齊此

此以法華相待之意判前四時不出頓等八教意顯法華超八教外出四時表故釋

籤一十六科立文云初明八教以辨昔次約今經以顯妙若釋籤一十七云秘密橫被無時不遍者此約方等對前二時爲言考彼問辭自見又釋籤十廿四云五味則一道豎進味味有半滿相成復於味味皆有秘密及以不定文蓋約五味對半滿以論相成故立文云雖復俱遊行藏得所俱遊論相成行藏論用捨華嚴唯滿不半乃至法華廢半明滿半有成滿之功非謂味味各有半滿又云味味皆有秘密不定者世三此且據前四時爲言或顯密相成則以昔時秘密不定成今法華是顯非秘密是定非不定矣妙立六二十引大論云餘經非秘密法華是秘密者釋籤七十三云非八教中之秘密但是前所未說爲秘開已無

外為密次說法華妙法難解取喻蓮華蓮華華果同時妙法則權實一體故有迹門三喻本門三喻



開前頓漸會入非頓非漸故言開權顯實又言廢權立實又言會三歸一

一妙名一唱待絕俱時故相待論判出前三教四時之上絕待論開復能開前令皆圓妙今文但云開者蓋上既云化儀四教齊此則顯法華出前四時况復下文歷部揀教即是判也然待絕二妙妙體無殊約義而論開為正意凡論開權有約部約教約界約理等今云頓漸者乃約部通開頓漸是權屬前四時非頓非漸是實即今法

世三

五

華又三即是權一即是實故以開廢會三而結云故言開權顯實等也開者發也拓也昔不言三是方便故方便門閉今言三是方便故方便門開廢者捨之別名開已俱實無權可論義當於廢約法乃開時即廢約喻必義須先開若約理者開廢俱時開時已廢故也或謂今文開廢會三準彼玄籤第一對於四一義雖無妨但在彼不對其文則重在今但作結上開部義似稍允蓋法華部開廢會三法應爾也如下文云總開會廢前四味痛舊於開權有同體異體之辨然約所開法體及能開之妙佛意邊論皆同體也但所開機情在昔執之為異故不得不開如釋籤云法本自妙蘊由物情但開其情理自復本文玄文云開

昔之異顯今之同故開機情的開異體也  
言權實者名通今昔義意不同

權謂權謀暫用還廢實謂實錄究竟指歸  
昔有偏圓自他權實等義今有為實施權  
開權顯實等義義不同也在昔權實各趣  
在今權皆趣實意不同也妙樂十三三十云  
權實之語非獨今經相即之言出自於此  
文

謂法華已前權實不同大小相隔

此下釋出今昔權實義意不同文初約部  
通開故以頓漸為權法華為實此揀昔日  
部中之教有權有實然在昔實妙權麤在  
今開指即妙方顯義意不同也今且先明  
昔之權實故云謂法華已前權實不同等  
權實約偏圓大小約半滿亦可權實約法

廿三

大小約人在昔之中皆有此義然文意正  
明昔部權實而復明大小者須知權通偏  
教而未的顯權中三藏小機歷前四時與  
大相隔直至法華方得入圓故論權實復  
明大小雖明大小不出權實如下文云重  
舉前四時權蓋指此小機也

如華嚴時一權一實別國實各不相即大不納  
小故小雖在座如聾若瘖是故所說法門雖  
廣大圓滿攝機不盡不暢如來出世本懷

一權一實釋權實不同大不納小釋大小  
相隔今此正當大隔於小故小雖在座如  
聾若瘖釋籤一十一云華嚴大機尚隔於  
別小機被隱一向不聞是故但立頓大之  
名不立一乘獨妙之稱非佛本懷良由於  
此華嚴頓大尚非本懷况復鹿苑故三藏

教首及以部內麤尚未周故妙號都絕方  
等般若比說可知文

所以者何初頓部有一麤別一妙教一妙則  
與法華無二無別若是一麤須待法華開會  
廢了方始稱妙

所以者何此徵起釋出不暢本懷之意皆

由在昔不能開痛顯妙故此以下歷部揀  
教明判明開初頓部等於此別明頓中痛

教須待開會者以時人謂華嚴勝故也

次鹿苑但麤無妙藏教次方等三麤藏通一妙

教次般若二麤通別一妙圓教

此約相待判前部中麤妙也

來至法華會上總開會廢前四味麤令成一  
乘妙諸味圓教更不須開本自圓融不待開  
也

此開前四味部中三教之麤成今一乘妙  
也且昔部中三教既開昔部中圓還須開  
否故下即云諸味圓等也以今圓昔圓二  
圓不別此約教別與也若妙樂云圓人初  
心須聞開顯諸法實相者蓋昔圓人義有  
兩向名字初心謂圓隔偏聞佛開權隔偏  
情泯非開圓體也若觀行去已入實者但  
論增進如經揀眾云除諸菩薩眾信力堅  
固者是也信力五品堅固十信若昔部中三教權人  
來至法華一向須開若三教權果本是圓  
果豈可更開令成圓佛若對機之權亦不  
妨論開如云開丈六垢衣等也又妙樂云  
今經是圓復須開顯者蓋顯法華中圓非  
但出前四時復須開顯諸教也  
但是部內兼但對帶故不及法華淳一無雜

獨得妙名良有以也

正判昔部屬麤除鹿苑外雖皆有圓以兼等故不得稱妙麤人細人二俱犯過此約部通奪也釋籤一十云始自華嚴終至般若雖多不同但為次第第三諦所攝今經會

世三

八

實方曰圓融文是故文初約部通開須云開前頓漸等也如上相待論判絕待論開約教別與約部通奪番覆抑揚方顯法華出諸教上部圓教圓妙絕羣經出世本懷於此暢矣故即引經四一為證

故文云十方佛土中唯有一乘法無二亦無三教一正直捨方便但說無上道行一但為菩薩不為小乘一人一世間相常住一理

以純一故獨得妙名故引一以顯妙蓋一即妙也十方佛土等據其同者而言亦約

佛意也一乘法者部圓教圓故無二亦無

三者約教則無通教半滿相對之二無三藏之三乘無有餘乘即無別教及圓入別也約部則無般若所帶之二無方等所對之三方等之藏則攝鹿苑二酥之別則該

華嚴唯一佛乘故云教一正直捨方便但說無上道者文句五五云五乘是曲而非直通別偏傍而非正今皆捨彼偏曲但說正直一道也文疏據說邊屬教一今據道名能通故屬行一但為菩薩者約佛意但

世三

九

為菩薩據昔方便謂教化三乘今此同一菩薩人故云人一世間相常住者十界依正隔歷差別之相名世間相以即理故皆常住也若乃情見生滅遷流廓爾情忘諸相常住常既即性非常無常言偏意圓斯

之謂矣學者於此宜解會焉

時人未得法華妙旨但見部內有三車窮子化城等譬乃謂不及餘經蓋不知重舉前四時權獨顯大車但付家業唯至寶所故致誹謗之咎也

當代弘教之人未解法華開權絕待微妙旨趣但見經中有三車等喻乃謂不及華嚴等經蓋不知三車等喻乃重舉昔日之權意在指權即實故舉三車顯大車窮子付家業化城至寶所不知此意故有謗法之愆也三車羊車譬聲聞乘鹿車譬緣覺乘水牛車譬菩薩乘即鹿苑三乘也化城文句七十八云以神力故無而歛有名之爲化防非禦敵名之爲城文譬真諦涅槃能防見思也寶所譬寂光大經中名寶渚

前四時權且三車等指昔三藏三乘而云重舉前四時權者須知三周開顯藏圓相對雖正開小機然舉昔之權則該四時又此小機歷前四時名四時權也妙樂五十三云立一開權之言於今乃成二意一者騰昔施權二爲顯實之所不指所開無由說實况指權是權知非究竟既顯實已權全是實文誹謗釋籤十三云當知法華約部則尚破華嚴般若約教則尚破別教後心文人不見之故致誹謗

約時則日輪當午罄無側影世三  
第十

十界咸開無不成佛如日方中無處不南周禮用一尺五寸土圭立八尺之表夏至午時以側日影求地之中以建國宋嚴觀二師與太史何承天用此法測日影以定

中國表北得影一尺五寸與土圭等地上  
餘陰一寸天上萬里則知天竺方為地中  
今云罄無側影據天竺說  
約味則從熟酥出醍醐此從摩訶般若出法  
華

五醍醐味釋籤一十九問彼經自以醍醐  
譬於涅槃今何得以譬於法華答一家義  
意謂二部同味然涅槃尚劣何者法華開  
權如破大陣餘機至彼如殘黨不難故以  
法華為大收涅槃為拈捨若不爾者涅槃  
不應遙指八千聲聞於法華中得授記勦  
見如來性如秋收冬藏更無所作文然彼  
經本無出法華之語今約義說故但云此  
從摩訶般若出法華

信解品云聚會親族即自宣言此實我子我

世三

十一

實其父吾今所有皆是子有付與家業窮子  
歡喜得未曾有

文句六三十一云十方法身菩薩影響者  
為親族影響之衆多是釋迦昔日同業並  
共如來於二萬億佛所共開化之於其即  
是伯叔之行故用此為親族文此實我子  
我實其父結會父子文句六二十一云實  
從我受學實是我子從我起解是我所生  
我實曾於二萬億佛所常教大法故我實  
是父文吾今所有皆是子有正付家業文  
句六三十一云一切大乘萬德萬行故云  
所有文又如來藏子性不殊故云皆是子  
有當知如來所有即子本有  
此領何義答即般若之後次說法華先已領  
知庫藏諸物臨命終時直付家業而已譬前

轉教皆知法門說法華時開示悟入佛之知見授記作佛而已

臨命終時靈山唱入涅槃時也譬前轉教皆知法門文句六三十一云追指昔日大品領教所委有廣畧般若共不共法是汝所知即汝所有故法華但明佛之知見更不廣說一切行相也文開示悟入文句四十三約四意消之一約四位住行向地二約四智道慧道種慧一切智一切種智即上圓位能契之智也三約四門四約觀心妙樂云約智約位唯聖方開約觀約門乃通名字不妨高位不棄衆生文又二紙云若作餘釋爲令之說徒施佛之知見安在文佛之知見佛知即一切種智具足三智佛見即佛眼具足五眼亦名真實知見若

世三

十二

通途被開其不在座展轉爲說或在界外亦得聞之或佛滅後敦逼令信乃至久遠四惡麤智人天世智若不開之則佛之知見永埋四趣長没人天若別開者則在座得益當機妙悟得受記者授記聖言說與曰授果與心期日記若通途記如法師品初八部四衆三乘之類在座聞佛一句偈者皆與授記當得菩提乃至滅後聞一句偈亦與授記若別記者如迹門別授應身記本門授法身記又總與七百別與劫國名號等記五百也妙樂四廿六云二乘且與八相記者更令與物結淨土緣菩薩已於多劫利物隨熟隨脫不假八相淺近之記二乘不爾是故須之文

次說大涅槃者有二義

佛出淨土不說涅槃即以此法華為後教後  
味如燈明迦葉等今佛熟前番人以法華  
為醍醐更熟後番人重將般若淘汰方入  
涅槃復以涅槃為後教後味

一為未熟者更說四教具談佛性令具真常

世三

十三

入大涅槃故名拈捨教二為末代鈍根於佛  
法中起斷滅見天傷慧命亡失法身設三種  
權扶一圓實故名扶律談常教

一為未熟者即五千起去人天被移者更  
說四教法華廢竟今經復用故云更說而  
具追說追泯兩種四教妙立二十二云涅  
槃聖行品追分別眾經故具說四種四諦  
施權德王品追泯眾經俱寂四種四諦文  
開權即四不可說也釋籤三十三云追者  
退也却更分別前諸味也泯者會也自法

華已前諸經皆泯此意則順法華部也至  
大經中更分別者為被末代故大經中具  
斯二說文具談佛性令具真常涅槃經首  
廣開常宗令一切眾生皆知常住佛性入  
秘密藏止觀云涅槃寄滅談常輔行云寄  
應迹滅度談法身圓常拈捨釋籤一十九  
云法華開權如已破大陣餘機至彼如殘  
黨不難故法華為大收涅槃為拈捨文二  
為末代鈍根妙立十廿一云涅槃臨滅更  
扶三藏誠約將來使末代鈍根不於佛法  
中起斷滅見廣開常宗破此顛倒令佛法  
久住文起斷滅見一者破戒撥無因果斷  
見二者說於無常滅見天傷慧命無戒門  
也亡失法身無乘門也若常途論自報慧  
命理體法身在眾生不滅諸佛不增以迷

背故天傷亡失今此為無乘戒兩門以致  
慧命法身天傷亡失意與常途自不侔矣  
設三種權扶一圓實輔行三下廿一云彼  
經四教皆知常住本意在圓權用三教以  
為酥息實不保權以為究竟文扶律談常

世三

十四

教釋籤云以彼經部前後諸文扶事說常  
若末代中諸惡比丘破戒戒門說於如來  
無常乘門及讀誦外典則並無乘戒失常  
住命賴由此經扶律說常則乘戒具足故  
號此經為贖常住命之重寶也如釋籤三  
引經應有單複二義所言複者謂乘及戒  
以律助常意也若言不許畜八不淨此是  
戒門事門若說如來畢竟入於涅槃及遮  
外典此是乘門理門此扶律談常意也所  
言單者唯約戒門彼經扶律律是贖常住

命之重寶四念處三二云若別圓有法身  
慧命何須贖命贖命意在藏通灰斷之命  
令得法身常住也文既扶律說常則以律  
助常也如義例云佛世尚以涅槃為壽况  
末代鈍根非助不前然上云設三種權扶

一圓實何故結云扶律談常且三權俱律  
耶須知上明經中具用四教則以偏助圓  
後以乘戒兩門重扶三藏之意結歸為末  
代鈍根故云扶律談常也

然若論時味與法華同論其部內純雜小異

世三

十五

故文云從摩訶般若出大涅槃前法華合此  
經為第五時也

妙玄十廿一云然二經教意起盡是同如  
法華三周說法斷莫聲聞咸歸一實後開  
近顯遠明菩薩事涅槃亦爾先勝三修常

樂我斥劣三修若無常無我斷真聲聞入  
秘密藏後三十六問明菩薩事文論其部  
內純雜小異妙立十八云涅槃猶帶三乘  
得道此經純一無雜涅槃更不發迹此經  
顯本義彰妙樂七十九約十六意揀云云  
故文云等別行義疏記云彼經就般若部  
後分結撮五味次第也文前法華等者今  
經時味既同法華故此文中更不別立時  
味但云前法華合此經為第五時也

問此經具四教與前方等部具說四教為同  
為異答名同義異方等中四圓則初後俱知  
常別則初不知後方知藏通則初後俱不知  
涅槃中四初後俱知妙立二十三

云問涅槃追說四方等正開四別教復有  
四若為分別答涅槃當四通入佛性別教

次第後見佛性方等保證二不見性文今  
以涅槃追說四與方等中四對揀答名同  
義異四教名同知常不知常異圓則初後  
俱知常初心名字知五品觀行知六根相  
似知住上分證知妙覺究竟知別則初不  
知後方知初即地前人也輔行三下二十  
九云別亦知中今言不知者前三不知圓  
理故也文若妙立四三十一云別教初心  
即知常住者但中常住耳後即登地人也  
若得意者回向薄知藏通則初後俱不知  
觀音立記上十二云凡言別圓初後知常  
蓋知人法不可及斷藏通反是故曰不知  
涅槃中四初後俱知輔行三下二十二云  
彼經四教皆知常住本意在圓文觀音立  
記上二十七云涅槃四教雖俱知常初心

用觀不無差別藏通且須順於二諦別初心人未即圓法文釋籤二二十八云涅槃解即而行不即文

問將五味對五時教其意如何答有二一者但取相生次第所謂牛譬於佛五味譬教乳從牛出酪從乳生二酥醍醐次第不亂故譬五時相生次第

南本涅槃第十三卷聖行品中無垢藏王菩薩對佛稱歎涅槃教勝佛印可竟佛言譬如從牛出乳從乳出酪從酪出生酥從生酥出熟酥從熟酥出醍醐醍醐最上佛亦如是從佛出十二部經從十二部經出修多羅從修多羅出方等從方等出般若波羅密從般若波羅密出大涅槃猶如醍醐文是則五味對教出自於佛也相生釋

世三

十七

籤一十九云此五味教相生之文在大經聖行品末文此約教論相生也妙玄十八云漸機於頓未轉全生如乳三藏中轉革凡成聖喻變乳為酪即是次第相生為第二時教不取濃淡優劣為喻也文此約機論相生也

二者取其濃淡此則取一番下根劣性所謂二乘根性在華嚴座不信不解不變凡情故譬其乳次至鹿苑聞三藏教二乘根性依教修行轉凡成聖故譬轉乳成酪次至方等聞彈斥聲聞慕大恥小得通教益如轉酪成生酥次至般若奉教轉教心漸通泰得別教益如轉生酥成熟酥次至法華聞三周說法得記作佛如轉熟酥成醍醐此約最鈍根具經五味其次者或經一二三四其上達根性味

味得入法界實相何必須待法華開會

義例六云五味唯喻一代五時濃淡文蓋言經文相生雖顯意取濃淡以譬涅槃教勝即約教論濃淡也今文教論相生機論濃淡者今易顯故其實約機約教皆具二義下劣根性天親呼爲下劣小乘衆香稱爲貧所樂法不信不解非其境界故維摩疏一初引華嚴云此經不入二乘人手垂裕記二十云手以受物表信力故受法二乘不聞從何起信文慕大恥小得通教益釋籤三二十三云謂受彈斥令其歎大自鄙即生酥益相文輔行二十四云密成通益文心漸通泰得別教益釋籤三二十三云至般若中不復同前悲泣之時故云通泰又云皆使令知即熟酥益相得此益

世三

大

已義成別人文輔行云密成別益文蓋顯二乘人於法華前不論改觀故云密也三周說法法說周爲上根人作三乘一乘說身子得悟譬說周爲中根人作三車一車說四大弟子得悟因緣周爲下根人作宿世因緣說千二百聲聞得悟皆授初住入相之記最鈍根妙立二十四云自有一人歷五味如小乘根性於頓如乳三藏如酪乃至醍醐方得究竟文即最鈍根性也其次者妙立二十四云自有利根菩薩未入位聲聞或於三藏中見性是歷二味自有方等中見性是歷三味般若中見性是歷四味文據此則一味不得入至於二味乃至三味不得入至於四味皆名次根也上達根性妙立二十四云自有一人

稟一味如華嚴純一根性即得醍醐不歷  
五味也大經云雪山有草名曰忍辱牛若  
食者即得醍醐文即上達根性也前四時  
中鹿苑密入餘皆顯入故云味味得入於  
法華中但論增道也法界實相一體異名  
上有味味之言故重云耳若輔行云實相  
世三十九  
是別理法界是圓理據大經十千菩薩得  
一生實相初地同住是接入別五千菩薩  
得二生法界圓教二住是接入圓以教判  
文理還不異

上來已錄五味五時化儀四教大綱如此  
籤云言次第者華嚴初云於菩提道場始  
成正覺在初明矣諸部小乘雖云初成自  
是小機見爲初耳據信解品脫妙着麤故  
居其次大集云如來成道始十六年故知

方等在鹿苑後仁王云如來成道二十九  
年已爲我說摩訶般若故知在方等後亦  
知仁王在大品後法華云四十餘年大經  
云臨滅度時當知次第有所據也文此乃  
別論次第通則不然如妙玄十二云若華  
嚴頓乳別但在初通則至後故無量義云  
次說般若歷劫修行華嚴海空法華會入  
佛慧即是通至二經乃至天日初出先照  
高山日若垂沒亦應餘輝峻嶺故蓮華藏  
海通至涅槃之後况前教耶若修多羅半  
略之教別論在第二時通論亦至於後何  
者迦留陁夷於法華中面得受記後入聚  
落被害作結戒緣起又如身子法華請主  
後入滅均提持三衣至佛問五分法身滅  
不答云不滅雖云五分不滅終是小乘中

意豈非三藏至後耶若方等教別論在第三時通論亦至於後何者陀羅尼云先於王城授聲聞記今於舍衛國復授聲聞記故知方等至法華後般若別論在第四時通論亦至初後何者始從得道夜至泥洹世三夜常說般若若涅槃別論在第五時通論亦至於初何者釋論云從初發心常觀涅槃行道此則通至於前若法華顯露不見通前秘密邊論理無障碍故身子云我昔從佛聞如是法見諸菩薩受記作佛豈非證昔通記之文文若論方等亦通於前淨名畧記下之上初云鹿苑理須密說彈斥又華嚴中四何須更論亦是其例既其一世十切俱通初後豈可方等不通於初文然只一五時論通論別別則次第通則互通並

是如來赴機之相但於通中有文通義通若文通者如結集經家乃取部類相從之文收通歸別如時長華嚴方等陀羅尼等是也若義通者如蓮華藏海通至涅槃之後與天日若垂沒餘輝峻嶺等是也此則不可收歸於別也然非別五時無以見如來說法次第非通五時無以見教法融通自下明化法四教


妙立二十八云問四教名義出何經答長阿含行品佛在圓彌城北尸舍婆村說世三四大教者從佛聞從和合衆聞從多比丘聞從一比丘聞是名四大教文釋籤十三十一云但同有四非即藏等亦一往語耳然教定體與今不同文妙立二十九云月燈三昧經第六明四種修多羅謂諸行

訶責煩惱清淨私釋會之諸行是因緣生  
法即三藏義也訶責是體知過罪即通教  
義也煩惱者若無煩惱即無智慧即別教  
義也清淨者既舉一淨當名任運有常樂  
我等即圓教也然則四教在小乘中有名  
無義在大乘中有義無名是故經家引傍  
經論立此藏通別圓則名義備矣

第一三藏教者一修多羅藏四阿含 二阿毘  
曇藏俱舍婆沙等論 三毘尼藏五部律

四教義一初云此教明因緣生滅四聖諦  
理正教小乘傍教菩薩文修多羅此云法  
本出世善法言教之本也又翻契經契理  
契機也契理合於二諦契機符彼三根觀  
經疏初云經者訓法訓常文凡聖之所軌  
則曰法魔外不能改壞曰常此釋訓經者

由也經由聖人金口故言經也此釋義阿  
舍如前阿毘曇翻無比法聖人智慧分別  
法義不可比故俱舍翻藏即包含攝持之  
義婆沙翻廣說亦名五百說毘尼此翻為  
滅佛說作無作戒能滅身口之惡故即八  
十誦律也文南山云毘尼翻滅從功能為  
名非正譯也正翻為律律法也從教為名  
斷割重輕開遮持犯非法不定文五部律  
如來滅後上座大迦葉等五百聖人於畢  
鉢羅窟內命優波離結集名上座部大衆  
婆尸迦等一千凡聖窟外結集名大衆部  
此二通稱僧祇即根本也迦葉阿難末田  
地商那和修優波毘多五師體權通道故  
不分教後魏多有五弟子各執一見遂分  
律藏為五部焉



四教義云然此三法通名藏者以皆各舍一切文理也又經通五人說妙樂一二十五云佛及聲聞天仙化人下四印定即名佛說文律唯佛制降佛已還不許措辭如禮樂征伐自天子出論通佛世滅後文句

廿三

二十五

九二引出曜經云佛在波羅奈最初為五人說契經修多羅藏佛在羅閱祇最初為須那提說毘尼藏佛在毘舍離彌猴池最初為跋耆子說阿毘曇藏文妙樂九十二云故知別有阿毘曇藏是佛自說五百羅漢結集名相續解脫經後廣集法相乃名為論文今此三藏皆是佛說若云佛說名經弟子所作名論一往語耳

天台四教儀集註卷第一  
音釋

拓 音擴義同 痛 昌欲切 渚 之與切 侔 莫侯切 又他各切 抵 人也 渚 水洲也

天台四教儀集註卷第三

世四

南天竺沙門

蒙潤集

此之三藏名通大小今取小乘三藏也大智度論云迦旃延子自以聰明利根於婆沙中明三藏義不讀衍經非大菩薩又法華云貪著小乘三藏學者依此等文故大師稱小乘為三藏教

通論小衍俱有三藏今則別指小乘不可以通難別故下即引經論以證別意大智度論釋大品經龍樹造羅什譯九倍畧之百卷成文亦名釋論智論大論迦旃延子此云文飾善讚詠故大論云佛滅後百年有迦旃延婆羅門文非佛世之迦旃延也聰明利根大論云迦旃延子輩是生死人不讀不誦摩訶衍經非大菩薩不知諸法

實相自以利根慧智於佛法中作諸論議文則知天台以小乘為三藏本乎經論背靜法死師毀之於前清涼觀師讚之於後死師謂法華云貪著小乘三藏學者乃以小乘為能別之言明知三藏不唯屬小天台此名濫涉大乘特違至教指法華為至教清涼華嚴疏云此師立義理致圓備但三藏名義似小濫以後三教亦有三故所以爾者良以智論之中多名小乘為三藏教成實論中亦自說云我今欲說三藏中實義故有據初對舊醫戒定慧故立此三事條然不同異後三教通教意融三故別教依法性而顯三故圓教三一無礙故所以不名小乘教者此教亦有大乘六度菩薩三十四心斷結成真佛故文釋籤十七云三

藏通大小何故但屬小今明如法華云貪  
著小乘三藏學者又大論中處處以三藏  
對衍而辯大小故準此文以三藏爲小若  
通論者小衍二門俱有三藏但是通途非  
別意也若唯通途如何消通法華大論具

如四教本中廣明

世四

然論別意有三一小

乘三藏部別故二小乘三藏隔異故三小  
乘三藏破舊醫故苑師謂法華以小乘爲  
能別之言且法華大論皆羅什譯論中既  
以小乘名三藏教故至譯經二言雙舉爲  
成偈文即別義也又大論云佛在世時無  
三藏名法華何云三藏學者須知三藏之  
名起於結集法藏者故大論云摩訶迦葉  
將諸比丘在耆闍崛山中集三藏文殊尸  
利彌勒諸大菩薩亦將阿難集摩訶衍三

藏是聲聞法摩訶衍是大乘法復次佛在  
世時無三藏名但有持修多羅比丘持毘  
尼比丘持摩多羅比丘文是則結集經家  
既立三藏之名故譯經者作此譯耳故法  
華云三藏學者

此有三乘根性

此是總標三乘聲聞四諦教苦爲初門支  
佛因緣教集爲初門菩薩六度教道爲初  
門又三人亦通諦緣度三文句七廿四念  
處一二云所言三者其義有八世四謂教理智  
斷行位因果理三者聲聞理在正使外緣  
覺理在習氣外菩薩理在正習外教三者  
聲聞稟四諦教緣覺稟十二因緣菩薩稟  
六度智三者聲聞總相智緣覺別相智菩  
薩總別相智斷三者聲聞斷正緣覺斷習

菩薩斷正習行三者聲聞為自修戒定慧  
 緣覺為自修樂獨善寂菩薩為眾生修六  
 度位三者聲聞住學無學緣覺住無學菩  
 薩三僧祇登道場因三者聲聞帶果行因  
 緣覺望果行因菩薩伏惑行因果三者聲  
 聞斷正如燒木為炭緣覺斷習如燒木為  
 灰菩薩正習盡如燒木無炭灰也

初聲聞人依生滅四諦教

聞佛聲教故曰聲聞生滅四諦止觀一

云苦則三相遷移生異集則四心流動貪

癡等道則對治易奪滅則滅有還無雖世


出世四皆變異故名生滅文自性不虛四

皆諗實故名為諦也

言四諦者一苦諦

大經云凡夫有苦而無諦聲聞有苦而有

諦凡夫不見苦理故言無諦聲聞能見無  
 常苦空故言有諦法界次第中云苦以  
 遍惱為義一切有為心行常為無常患累  
 之所遍惱故名為苦謂三苦八苦等



非聖默名忍憤會 即是苦苦 苦心憤於苦境故也

可受相違名忍離 捨所受故 即是憤苦

希無遂求不得苦 違約要離 怨會以說

是衆苦相名忍除 經釋前七是忍除 前七有別體後一總總無復別體 今以增文以五忍除是其別體也

名義

二十五有依正二報是言二十五有者四洲

四惡趣六欲并梵天四禪四空處無想及那

含四洲四趣成八六欲天并梵王天成十五

成四禪四空處成二十三無想天及那含天

十五別則二十五有總則六道生死

輔行一下廿云因果不忘故名爲有文畧

云三有欲色無色或云九有三界分九地

故國土名依報五陰假名是正報即苦諦

之體四洲水中可居曰洲四惡趣三途加

修羅以修羅一日一夜三時受苦故六欲

希須名欲六天各有三種欲一飲食欲二

世四

五

睡眠欲三婬欲梵王無想及五那含總在

四禪經教別爲三有者爲破外道計梵王

爲生萬物之主計無想無心爲涅槃計五

那含爲真解脫故六道輪轉相通故名爲

道輔行二上廿引大論三十三問云云何

六道復云五道答佛去世後五百年中部

別不同各回佛經以從己義故使修羅一

道有無不同文楞嚴中更開神仙一類爲

七趣又六道不出胎卵濕化四生俱含頌

云人旁生具四地獄及諸天中有唯化生

鬼通胎化二文

一地獄道梵語捺落迦又語泥黎此翻苦具

而言地獄者此處在地之下故言地獄謂八

寒八熱等大獄各有眷屬其類無數其中受

苦者隨其作業各有輕重經劫數等其最重

苦者隨其作業各有輕重經劫數等其最重

處一日之中八萬四千生死經劫無量作上品五逆十惡者感此道身

地獄從處為名婆沙云瞻部洲下過五百踰繕那乃有地獄梵語釋籤八十二云元梵天種還作梵語及以梵書文輔行七十八云

光音初下展轉出生是故五天並名梵種

文翻彼梵語成此華言故云翻也周禮有象胥氏通四方之語東方曰寄南方曰象

西方曰狄鞮音知也北方曰譯今翻西

語諸經皆云譯者從通稱也如周禮四官

通稱象胥氏苦具造惡之者受苦具度亦

云若器入寒八熱偈云頰部陀尼刺部陀

寒遍身炮及炮裂頰嘶吒并嚩嚩婆唳嚩

婆三皆痛聲六鳥沒鉢羅鉢特摩第八

摩訶鉢特摩青蓮紅蓮大紅蓮如次對三

世四

六

種身色已上等活斬刺磨搗黑繩黑繩後方

新三衆合苦具衆至嗥叫衆苦所逼大叫

極苦所逼六炎熱火隨身轉七極熱若外

大叫稱怨出下八阿鼻或云阿鼻自亦

自身他身俱命及此八寒熱根本獄各有

趣果受苦時命及形五皆無間也

眷屬其類無數等活等八獄各有四門四

門各有四獄謂塘煨屍糞鋒刃烈河增一

獄十六總有百二十八皆名遊增有情遊

彼其苦增故準妙立第六云八寒亦具百

二十八而正理論等但云眷屬故俱舍圖

熱豎寒橫於八寒邊不列遊增更有孤獨

鬲子輕繫等獄遍在江海山林空中等處

婆沙七云南洲有正有邊東西二洲唯邊

無正北洲邊正俱無三洲人若造重罪皆

來南洲正獄及東西南洲邊獄受苦妙立

六廿八云此正地獄在地下二萬由旬其傍

地獄或在天上或在鑊圍山間輕重傍輕

正重重者遍歷百三十六獄中者不遍下

者復減經劫數等俱舍云等活等上六如

次以欲天壽為一晝夜人間五十歲為四天王一晝夜四天

王五百歲為等活一晝夜當人間九百萬

歲又人間百歲為切利天一晝夜切利天

一千歲為黑繩一晝夜壽量亦同彼

當人間三千六百萬歲壽量亦同彼

四天王五百歲黑繩壽同切利天一極熱

千歲等活等苦壽如此可不畏耶

半中劫無間中劫全旁生極一中難陀龍

劫鬼日月五百鬼以人間一月為一日

部陀壽量如一婆訶麻婆訶麻今俗所用

盛米百年除一盡假使人百年除一粒

者是百年除一盡麻二十斛盡名為額部

陀後後倍二十第二陀裂二十婆訶麻

萬四千生死毘婆沙云五道各有自爾之

力地獄色斷還續妙樂五三引毘曇云一

切地獄初生之時皆有三念知此處是地

獄由某因所生從某處來文句四二十云

初皆眾生受苦時痛聲不復可分別妙

樂五三云初入地獄如本有語後時但作

波波等聲不復可辯文句云獄卒是變化

令見非眾生數初將罪人縛至閻王所者

是眾生數若受苦時非眾生數妙樂五三

云有情非情並是共業所感而為心變文

眾生常為熱苦所逼小獄通寒熱大獄唯

在熱四解脫經稱為火途且從熱為名也

五逆殺父殺母殺阿羅漢出佛身血破和

合僧十惡身業三種謂殺盜淫口業有四

妄言綺語兩舌惡口意業有三貪嗔癡上

品善不善業皆有三品而復有三如撫華

鈿

逆 一約境

善則於者不殺為上謂蚊蚋等於勝不殺為下謂蚊蚋等餘者為中不善反此

惡

二約心

無聞善不善但猛烈心作為上泛爾心作為下餘者為中

品 三約時

此通善不善但三時無悔者為上作已方悔為中作能悔為下三時者欲作正作已

世四

二畜生道亦云旁生此道遍在諸處披毛戴角鱗甲羽毛四足多足有足無足水陸空行互相吞啖受苦無窮愚癡貪欲作中品五逆十惡者感此道身

梵語底栗車輔行二上

廿五

云畜生者褚六

許六向究三反並通作褚六音即六畜也謂牛馬雞豚犬羊則攝趣不盡今通論此道不局六也旁生婆沙云形旁行旁此道徧在諸處婆沙云遍五道中有之故也文句四三十云四天三十三天悉有而上天

所乘象馬等是福業化作非眾生數也披毛如走獸等戴角如牛羊等鱗甲如魚鱉等羽毛如飛禽等水陸空行此三是畜生所依處也妙玄云陸有三品重者土內不見光明中者山林輕者人所畜養大論以三類攝畜生盡謂晝行夜行晝夜行互相吞啖文句四三十四云畜生者多盲冥冥者無明也强者伏弱飲血啖肉怖畏百端四解脫經稱為血途從相啖邊為名也中品其心劣前作已少悔俱舍頌云旁生極

一中旁生壽量多無定限其極長者亦一中劫謂難陀龍等諸大龍王皆住一

大地劫能持文句四三十五云劫初時皆解聖語

後飲食異諂心而語皆變或不能語妙樂

五十三云諸教相中畜生能言皆此時也又


畜生能飛空自爾力也

三餓鬼道梵語闍黎哆此道亦徧諸趣有福  
德者作山林塚廟神無福德者居不淨處不  
得飲食常受鞭打填河塞海受苦無量諂誑  
心意作下品五逆十惡感此道身

輔行二上五廿云梵語闍黎哆此翻祖父後

生云祖父者從初受名又後生亦是後生  
之祖父也爾雅云鬼者歸也尸子曰古者  
名死人為歸人又云人神曰鬼地神曰祇  
天神曰靈又云饑餓謂餓鬼也恒被驅使  
此道亦遍諸趣輔行三下云此處在閻浮  
提下五百由旬有閻王界縱廣量亦等是  
根本處亦有住閻浮提洲者有德者住花  
果樹林無德者居不淨處東西二洲亦有  
鬼壯洲唯有威德者諸天亦有隨生處形  
或居海渚或在人間山林中或似人形或

似獸形不得飲食重者饑火節燄不聞漿  
水之名中者伺求蕩滌膿血糞穢輕者時  
薄一飽加以刀杖驅逼塞海填河四解脫  
經稱為刀途從被刀杖驅逼為名也下品  
正作能悔故云下品俱舍頌云鬼日月五  
百以人間一月為一日壽五百歲更有三  
類九種內障外障無障如蘭盆疏今水陸  
施食正為燄口鬼神婆羅門仙出生所供  
為曠野鬼神鬼子母等



世四

十

四阿修羅道此翻無酒又無端正又無天或在海岸海底宮殿嚴飾常好鬪戰怕怖無極在因之時懷猜忌心雖行五常欲勝他故作下品十善感此道身

文句<sup>二</sup>云四天下採花醞於大海魚龍業

力其味不變嗔妬誓斷故言無酒無端正

男醜女端含脂是也無天淨名疏<sup>二十</sup>云

此神果報最勝隣次諸天而非天也妙樂

二<sup>九</sup>云無天德故<sup>文</sup>或在海岸海底輔行

二<sup>上</sup><sup>五</sup>云世界初成住須彌頂亦有宮殿

後光音天下如是展轉至第五天修羅嗔

便避之無住處下生此<sup>文</sup>文句<sup>二</sup><sup>一</sup>云鬼

道攝者居大海邊畜生道攝者居大海底

準此則知妙玄明或居半須彌山巖窟應

天種攝妙樂引阿舍四修羅次第住於海

世四

十二

底各於海下二萬由旬以為一宮居止處

殊勝必兼多福方得生彼又楞嚴經明胎

卵濕化四種之異屬於鬼畜人天四趣所

攝<sup>具如彼文</sup>宮殿嚴飾妙樂長阿舍十八

云南洲金剛山中有修羅宮所治六十由

旬欄楯行樹等然一日一夜三時受苦苦

具自來入其宮中屬四趣者良有以也<sup>文</sup>

常好鬪戰文句<sup>二</sup><sup>二</sup>云毘摩質多生舍脂

帝釋納為妻後讒其父遂交兵脚波海水

手攻善見帝釋以般若呪力不能為害<sup>文</sup>

怕怖無極淨名疏<sup>二十</sup>云往昔嫉妬惱他


故常多怖畏<sup>文</sup>猜忌輔行二<sup>上</sup><sup>五</sup>云又嫉

佛說法佛為諸天說四念處則說五念處

佛說三十七品則說三十八品常為曲心

所覆猜者疑懼也詩傳云以色為妬以行

爲忌害賢曰嫉故知修羅嫉賢忌行五常  
 輔行一下三云以慈育物爲仁以德推遷  
 爲義進退合宜爲禮權奇超拔爲智言可  
 反覆爲信內德俱備方成人道慢強無德  
 判屬修羅又據善心仍居下品外揚五德  
 本在輕他文十善對十惡立謂不殺等又  
 十皆有止行二善如不殺止善放生是行  
 善等



五人道四洲不同謂東弗婆提壽二百南閻  
 浮提壽一百西瞿耶尼壽五百壯鬱單越壽一千  
 中天聖人不出其中即八難之一皆苦樂相間在因之時行  
 五常五戒五常者仁義禮智信五戒者不殺  
 不盜不邪淫不妄語不飲酒行中品十善感

此道身

輔行二上六廿云梵語摩菟賒此云意人中  
 所作皆先意思易曰唯人爲萬物之靈禮  
 云人者天地之心五行之端此亦未知五  
 道故也婆沙云五道多慢莫過於人又云  
 五道中能息意者亦莫過人文法苑云人  
 者忍也於世違順人能安忍四洲此世界  
 下有三輪下風次水上金輪金輪之上有  
 九山八海須彌居中鐵圍在外中繞須彌  
 有七金山七香水海第七山外鐵圍之內

即第八鹹海東西南北有四大洲四洲土  
輪居金輪之上於四洲邊復有二小洲具  
如俱舍弗婆提翻勝身閻浮提亦云瞻部  
無熱池側有瞻部林樹形高大其果甘美  
依樹立名此方無故不翻西域記中翻為

穢樹瞿耶尼翻牛貨俱舍鈔云劫初時高

樹下有一寶牛為貨易故鬱單越亦云俱

盧翻勝處勝三洲故俱舍頌云瞻部洲人

量三肘半四肘尺八東西北洲人倍倍增如

次東洲八肘西洲十六肘北洲三十二肘唯有北洲人壽定

一千歲餘三且據極分為言未必全爾聖

人不出其中不生於彼而闡化非不居彼

準寶雲經頗羅墮將弟子六百人住鬱單

越八難三途以為三人中則有四一盲聾

瘖瘂二世智辯聰三佛前佛後四壯俱盧

洲天上一無想或指長壽天受此諸果報  
不得於聖化苦樂相間輔行四九云若論  
果報南洲為下下若得值佛南洲為上上  
故大論六二十云閻浮提以三事故尚勝諸  
天北洲不及一能斷婬欲二識念力三能

精進勇猛復有書般若若故諸天下來聽

法故大經云下下因緣故生北洲乃至上

上因緣故生南洲文妙玄六九廿云四天下

人雖果報勝劣俱有生老病死同是輕報

泥犁文五常五戒常者不易戒乃防非仁

則不殺義則不盜禮則不淫信則不妄語

智則不飲酒酒能昏性起過故也又五戒

四性一遮酒乃遮制餘性是惡大小乘禁

戒此為根本止觀四二云性戒者莫問受

與不受犯即是罪受與不受持即是善若

受戒持生福犯獲罪不受無福不受犯無

罪文輔行四上三云所言性者即舊戒也

不待佛制性是善惡故名爲性又云五戒

者四性一遮故俱舍云遮中唯離酒爲護

餘律儀若論制已性上更加一箇制罪文

性戒輪王亦用遮戒如來所制五戒十善

開合之異身三可見不妄語則攝口業四

種酒防意地則攝意三

六天道二十八天不同欲界六天色界十八

輔行二上六云今釋典中所言天者亦名

最勝亦名光明文文句四末云天者天然

自然樂勝身勝文二十八天不同舉豎包

橫也若統論一佛化境則有三千大千世

界三千者小千中千大千也二禪統一小

是總大千是別總別俱舍頌云四大洲日

月蘇迷盧欲天梵世各一千名一小千界

謂一千四洲一千日月一千須彌一千

六欲天一千初禪天總名小千世界此

小千千倍說名一中千界名中千世界此

千倍大千一千箇中千世界名大千世界

三禪所覆大千爲一四禪所覆中千爲一

千箇初禪爲小千千箇二禪爲中千千箇

三禪爲大千千箇小千如千錢中千如千貫大

千如千箇千貫然以十萬爲億則大千有

萬億日月而光明經云百億日月乃至百

億非非想天等者蓋億有四種一十萬爲

億中千有十億大千萬億二千萬爲億中

千有一億大千有千億三千萬爲億大千

則有百億光明據此數也四萬萬爲億大

千世界但有十億又復四禪非想唯一亦

言百億者光明記五七云以下望上言之

耳文恐詞譯之訛也以義淨重翻則無百

億非想之言又瑞應經云三千日月萬二

業道增壽減至十三災

現刀疾飢如次七日月年止

歲饑饉災起七年七月七日止

歲時疾疫災起七月七日止

刀兵災起七日七夜止

災現者乃據減劫之極

返次逆對則十歲刀兵乃對

時疾疫乃對七月三十歲時

年則與瑜伽初無異也

師云婆須蜜從初無異也

化眾人言我等祖父壽命極長

無慈故至此短壽是故汝等

人從命惡心漸薄此後生子

是長轉增至八萬四千歲也

則百年減一年則自八萬四千

歲故一增一減則自八萬四千

減為一劫三災水火風上三定

為火災頂三禪為水災頂

災頂四禪為風災頂

動故初禪內有覺觀能燒惱心

故偏身攝重等外水災三禪內

亦是風等外風災四禪無內患

災然彼器非常情俱生滅故

是當任不壞之法情即有情正

依天宮穀情生則生情滅則滅

一水七水火後風則七歲成在

壞空當七

大劫第八水災齊於二禪又一劫成壞當  
八大劫如是初禪已下七七四十九火二  
禪已下七雷水災成五十六劫初禪已下  
又七火災當六十三劫第六十四劫風災  
壞至三禪也又火災與由七日並現劫未  
壞時六日隱在雙持山下世界壞時後六  
日漸出水災起時由雨霖注風災生時由  
風相擊從下風輪有猛風起又業力盡隨  
處生

初欲界六天者一四天王天居須彌

天居須彌山頂自有三十三天已上

天二天單修上品十善得生其中

天四兜率天五化樂天六他化自在天

空居修上品十善

修未到定得生其中

俱舍頌云六受欲交抱執手笑視媯初如

五至十色圓滿有衣

夜摩挲持持兜率執手化樂視笑他化但視

文六欲天化生時四天王天如其身量色

至他化如十歲見後則漸長如其身量色

界初生身量即成且具天衣如梵眾天初

由生半四天王天東方提頭賴吒天王此

云持國護持國土故居黃金埵領乾闥婆

云持國護持國土故居黃金埵領乾闥婆

云持國護持國土故居黃金埵領乾闥婆

云持國護持國土故居黃金埵領乾闥婆

云持國護持國土故居黃金埵領乾闥婆

富單那南方毘留勒叉天王此云增長令

他善根增長故居琉璃埵領鳩槃荼薛荔

多王有九十一子如靈感傳西方毘留博叉天

王此云廣目亦云非好報亦云雜語能作

種種語故居白銀埵領毘舍闍毒龍等壯

方毘沙門天王此云多聞福德之名聞四

方故居水晶埵領夜叉羅刹諸處建立天

王堂事見唐天寶元年如僧史畧俱舍頌

云妙高層有四相去各十千梵語薩達盧亦云須彌此

云妙高妙謂四寶所成高諸出眾山表始

從水際至山半腹分為四級相去各十千

由旁出十六千八四二千量此橫廣也旁

一層廣十六千踰踏那第二層八千第三層四千第四層二千也堅首及

持鬘恒橋大王眾如次居四級堅首第三皆藥叉眾

大王即四天王堅首最下級乃至四王居最上級亦住餘七山諸藥

又眾亦住餘七金山是四王所統眾故又日月宮城五風所

持一持二養三受四轉五調濟雙持山頂旋環山腹照

四天下雙持山高四萬二千由旬須彌七

金及鐵圍山入水皆八萬四千由旬須彌

出水亦八萬四千由旬餘之八山半半論

減乃至鐵圍山高三百二十八由旬二俱

盧半九山廣濶皆等高量俱盧舍此日宮

廣五十一由旬月宮廣五十由旬俱舍頌

云夜半日沒中日出四洲等輔行引長阿舍二十二云

鬱華越夜半弗婆提日沒閻浮提日中瞿耶尼日出經文次第四方遍說彼經又云

閻浮提為東弗于逮為西乃至單越為西于逮為東以由日月轉故皆謂日出處為

東文近日自影覆故見月輪缺如新月則西

覆東故見東缺殘月則東近於日自影覆西故見西缺切利此云三

十三山頂四角各有八宮中帝釋殿昔世

三十三人天帝為主於摩竭陀國修勝業

故故同生此俱舍頌云妙高頂八萬徑過八萬

三十三天居四角有四峯金剛手所

住有義又神名金剛手執金剛杵止住其中護諸天故中宮名善見

見者稱周萬踰蹠那高一半金城善見外善故

為之高一由旬雜飾地柔軟中有殊勝殿

半城有千門周千踰蹠那外四苑莊嚴眾車龕雜喜外

四苑一眾重花隨天福力種種車現二差惡苑鹿溢戰器天欲戰時刀杖等現三雜

林苑雜受欲樂故四喜林苑極妙地居四

方相去各二十苑邊有地去苑東壯圓生

樹城外東北樹名圓生提葉開花妙香芬

西南善法堂三十三天時集於彼單

修上品十善揀夜摩已上夜摩此翻善時

亦名時分時時唱快樂故兜率此云妙足

新云觀史陀此云知足於五欲境知止足

故化樂於境變化自娛樂故他化自在欲

得境時餘天為化假他所作以成已樂即

世四

十八

魔王也淨名云多是不思議解脫菩薩住

赤色三昧不取不捨應為魔王文未到定

未入根本禪也止觀九四云住欲界定從

是心後泯然一轉虛豁不見欲界定中身

首衣服床鋪猶如虛空罔罔安隱身是事

障事障未來障去身空未來得發是名未

到定相文然生上四天自是欲界定力今

從欲天極處為言云未到定不必四天皆

爾俱舍頌云欲天俱盧舍四分一一增四

之一即半里也初四天王人間五十年下

長半里上五並半里論增

天一晝夜承斯壽五百上五倍倍增四天

五百歲以人間五十年為一日初利千歲

以人間百年為一日乃至他化十六千歲

百年為一日法華文句二十云三光天子

是帝釋內臣如卿相四王是外臣如武將

文又帝釋為地居天主魔王為六欲天主

雖主欲界帝釋四王欲行佛法魔不得制

如感通傳

次色界十八天分為四禪初禪三天梵眾梵輔六梵

二禪三天少光無量光音三禪三天少淨無量四

禪九天無雲福生廣果已上三天九夫住處

天外道所居無煩無熱善見善現色究竟已上五天第三果居處上之九天離欲處散未出色籠故名色界坐得禪定故得禪名

妙玄云正報之身是清淨色非如欲界垢

染色也十八天此準上座部立若薩婆多

宗唯立十六天以梵輔大梵合為一無別

處故無想廣果合為一身壽同故若經部

宗佛滅後四百年初從一切有部復出立一部名為經部立義準經不依律論

十七天梵輔大梵身量別故上座部中須

明十八者以廣果無想身壽雖同因果有

異廣果以無尋伺為因果無想以無心為

因果四禪梵語禪那此翻為定攝心專注  
不流散故世出世間此禪為根本各有支  
林功德如法界次第



輔行九上九引婆沙中間初三何故五二  
四何故四答自古相承云欲界五欲為外  
亂二禪喜為內亂初禪治外亂之始三禪  
治內亂之始故各有五二禪外亂息四禪  
內亂息是故二四但立四支初禪三天梵

者淨也無欲染故十八天皆淨無欲此當  
 其首偏得淨名梵眾是民梵輔是臣大梵  
 即王也劫初先王劫盡後滅主領大千然  
 通論有萬億梵王唯此是大千之中王名  
 尸棄得為大千之主降此不得論又初禪  
 有語言號令能統上冠下故也如法華云  
 娑婆世界主梵天王尸棄大梵若摩醯首  
 羅居色界頂報勝為王無統主義以二禪  
 已上無言語法是故諸禪亦各以報勝為  
 主非統御也聖具如法華文句淨名疏明  
 若涅槃疏云娑婆世界主正是首羅又云  
 梵王只領小千而已乃古師之說非經家  
 正意二禪三天少光光明少故無量光光  
 明轉增無限量故光音以光當語音故新  
 譯云極光三禪三天少淨意識嗜樂離喜

而純樂受故無量淨淨勝於前不可量故  
 徧淨樂受最勝淨周普故四禪九天無雲  
 者下雖空居依雲而住此無雲首特號無  
 雲業疏云第四禪上雲居輕薄如星散住  
 不同下天如雲密合文福生者修勝福力  
 方生此天從因彰名廣果者凡夫之果無  
 勝過故無想者一期中間心想不行故無  
 煩雜無熱惱善相見善現相究竟無極此  
 五天三果所居名五不還天若俱舍舊圖  
 次第而上若準楞嚴第九皆橫在四禪中  
 彼四禪天獨有欽聞不能知見世四如今世間  
 曠野深山聖地道場皆羅漢所住持故世  
 間人所不能見文又色究竟中有摩醯  
 首羅此翻大自在天俱舍頌云色天踰躑  
 那初四增半半謂梵眾半踰躑那梵輔此  
一大梵一半少光二也

上倍倍增無量光四音八唯無雲減三

下徧淨天既六十四無雲倍應百二十八身壽但有一百二十五者謂從變易受入不變易受難故各減三變易少光上下天

大全半為劫少光已上大全為劫謂少光大劫少光已下大半為劫以由身量與壽量等大梵身既一由旬半故壽當一劫半

故以四十小劫為一大劫則六十小劫成劫半也梵輔壽一劫身一由旬四十小劫也梵眾身半由旬故壽半劫二十小劫也

三無色界四天空處識處無所有處非非想已上四天只有四陰而無色

蘊故得名也

若厭色籠修四空定生四空天名無色界

輔行六上四云從第四禪欲入空處必作

方便滅三種色一可見可對色塵二不可

見可對色五根三不可見無對色法入火分無表

也此之三色並在色界欲入無色故滅此

三文無色界色小乘空有二宗各計不同

大眾部云但無拘色非無細色妙立四六

引毘曇云無色有道共戒戒是無作色以無漏緣通故此戒色隨無漏緣至無色也

文釋籤四三十云言無漏緣通者通九地也既通九地豈隔無色文妙樂六九云無

色雖無四大造色定果所為皆是墻壁欲二界業果所為三界皆以意識維持若約諸宗無

色非全無四大色雅合其宜文有門計有譬此是有宗計有色也妙立引成論云色

是無教法此是空宗不至無色此是空宗難云應不至無色耶世此是空宗計無色也

如讀教記戒體中辨世然小乘計有是不了義說無色者乃名了

義大乘反此楞嚴經云是四空天身心滅

盡定性現前無業果色孤山釋云謂無業

果色者顯有定果色也此與小乘有宗義

合若大經云無色界色是佛境界非諸聲聞緣

覺所知者此是大乘說有色義也空處禪

門六九云此定最初離三種色心緣虛空

既與無色相應故名虛空定也文識處禪

門六十一云捨空緣識以識為處正從所緣

處受名故名識處文無所有處行者厭於

識處無邊於是捨之入無所有處亦名不

用處禪門六十二修此定時不用一切內外

境界外境名空內境名識捨此二境故言

不用處文非非想止觀六四引阿毘曇婆

沙云非無想天之無想非三空之有想故

言非想非無想也人師云無想是色天異

界不應仍此得名就同界釋名前無所有

定已除想今復除無想想無想兩捨故言

非有想非無想文輔行六上五人師尚不

世四

三三

許引色無想天况總引四禪既是論文取

亦無失人師釋義亦未全非今家俱存故

無破斥文止觀九八云此定不緣識處故

非想不緣不用處故非非想文只有四陰

輔行五上廿四云蘊之與陰新舊異譯文積

聚名蘊蓋覆名陰積集有為蓋覆真性然

諸文或云四禪八定或云四定者輔行九

上初云若色無色二界想對則色界名禪

無色界名定若總以上界望於下欲則上

二界俱名定地下界為散文

上來所釋從地獄至非非想天雖然苦樂不

同未免生而復死死已還生故名生死此是

藏教實有苦諦

一往言之三途唯苦諸天純樂人中苦樂

相間通而言之天亦有苦妙立六廿九云六

九廿六

欲天者地天別有修羅鬪戰之難通有五  
 衰死相苦等地獄色天雖無下界諸苦而  
 爲色所籠若命盡時不樂入禪風觸吹身  
 唯除眼識餘皆有苦四空諸天雖無欲色  
 界等苦如瘡空處如癱識處如病無所處如箭入  
 體非非成就細煩惱文及非想有八苦等  
 文句六云三藏教詮生滅故云實有也

天台四教儀集註卷第三

音釋

鞮丁奚切 晰陟鎗切 嚙許畧切 喙乙骨切  
鞮 鞮履也 晰 鳥鳴也 嚙 許畧切 喙 乙骨切  
虎交 篇市規切 罔古莢切 象遠界也

天台四教儀集註卷第四

南天竺沙門 蒙潤 集

世五

二集諦者即見思惑又云見修又云四住又云染汚無知又云取相惑又云枝末無明又云通惑又云界內惑雖名不同但見思耳

集者招集為義惑與業俱能招生死而今



但云惑者前苦諦中已明善惡業故即見

思惑示集諦之體也見者若云見理時能

斷此惑即從解得名若云見祇是假

續相待 假者不實為義即當體受稱


從 解 得 名




當 體 名 假






單 四 見




六 十 二 見





思感入修道位重慮緣具輔行云慮謂思慮見道觀真已發無漏今復重觀故云重慮此惑即除名思惟惑此從解得名若云思假及愛惑者此當體受稱然見惑從法塵起能障真理思惑從五塵起能牽三界此皆約欲界多分說細論不拘見修見惑是道所斷思惑修道所斷約能斷位名所斷惑也四住見為一住思惑分三因此二惑故住著三界染污無知妙樂一廿四云然小乘中立二無知染污無知無明為體



不染汚無知劣慧為體謂味執熱德時數

量耳

文諸法滋味損益等執成熱德用近遠等時一二等數大小等量取

相惑三惑皆名取相觀音玄記上七云見

思取生死相塵沙取涅槃相無明取二邊

相今見思取六道生死之相也枝末無明

對根本得名見思以無明為根本故云枝

末於一切法無所明了故曰無明通惑對

別惑得名見思通三乘人斷故曰通惑塵

沙無明別在菩薩所斷故名別惑界內惑

對界外得名見思潤有漏業招三界生故

云界內塵沙潤無漏業無明潤非漏非無

漏業招變易生故云界外塵沙則通界內

外也

初釋見惑有八十八使所謂一身見二邊見

三見取四戒取五邪見已上六貪七瞋八癡

利使

九慢十疑已上此十使歷三界四諦下增減

不同成八十八謂欲界苦十使具足集滅各

七使除身見邊見戒取道諦八使除身見邊

見四諦下合為三十二上二界四諦下餘皆

如欲界只於每諦下除瞋使故一界各有二

十八二界合為五十六并前三十二合為八

十八使也

法界次第上七云使以驅役為義能驅役

行者心神流轉三界故通受使名身見於

陰入界中妄計為身強立主宰恒起我見

諸文或云身見世五或云我見止觀四十六雙列

二名云求我叵得故則身見破身見破故

則我見破文輔行五下九云外人計我如

麻豆及母指等或計徧身神身四句及一

異等文邊見於身見上計我斷常執常非

斷執斷非常隨執一邊也見取謂因此見  
通至非想信此非餘執劣為勝戒取執邪  
為道名非因計因及雞狗等戒名戒取邪  
見由計斷常不信因果復計此我以為自  
然冥初世性世性即是二十五諦一冥初  
二從覺


等如  
圖于及六諦等或計從於父母微塵梵天  
等生皆名邪見貪是已法者愛即指五見  
為已法也嗔非已法故嗔癡不識見中苦  
集慢我解他不解疑猶豫不決利鈍利則  
造次恒有鈍則推利方生五鈍亦名見中  
思亦名推利思亦名背上使利使若去鈍  
使亦亡故屬見攝四諦下惑增減不同前  
云集諦雖在惑業今歷四諦者集是能迷  
苦是所迷又道滅雖是出世間因果由迷  
苦集道滅亦迷如不識病亦迷於藥此四

世五


五

諦惑俱舍頌云苦下具一切集滅各除三  
道除於二見上界不行嗔輔行五下九問  
四諦下惑依何理教增減不同耶答依阿  
毘曇上界不行嗔無相害故有善欲故性  
寂靜故心滋潤故然止而不行非能斷也  
故法華中蜈蚣喻嗔通三界妙樂六三二  
二  
云小乘中云上界無恚非盡理也問何故  
身邊唯在苦耶答此見依身故名身見依  
於身見而起邊見餘三非身故無此見又  
見苦斷故故在苦下四空無色有身見者  
雖無麤色而有細色所執未云即是身見  
非想八苦其義可知問戒取何故唯在苦  
道答唯彼所起問戒取計因苦諦是果何  
故在苦答計多苦行望為實因故在苦下  
非出世道妄為出道是故復於道處能起


集滅異此故無身見無身見故亦無邊見  
 集滅非道不生成取又復戒取在於苦道  
 二諦下者本是內道見苦能斷本外道者  
 見道能斷故惟在二此有親疎之義孤山  
 作六十四句解云八十八使且據見惑婆  
 沙中云九十八使者兼十思故也輔行五  
 下十云以十纏為九十八論文所出不同  
 或名三結止觀云初果所破如竭四十里  
 水功夫甚大恐聞者生疑畧斷三結謂身  
 見戒取疑如下圖示



二明思惑者有八十一品謂三界分為九地  
 欲界合為一地四禪四定為八共為九地欲  
 界一地中有九品貪瞋癡慢言九品者上上  
 上中上下中中中下下上下中下下上  
 八地各有九品除瞋使故成八十一也  
 此界繫思亦名迷事思亦名正三毒異俱  
 生思及推利思也九地所依處得名欲界  
 同一散地故合為一於九地中各有九品  
 貪瞋癡慢但上八地無瞋耳不言疑者見  
 道已斷理合無疑斷此惑時或直緣一真  
 諦或於四諦中隨緣一諦故止觀中云見  
 惑如四十里水思惑如十里水大經云初  
 果所斷如四十里水其餘在者如毛一涕  
 上來見思不同總是藏教實有集諦  
 此惑有為有漏之因故云實有上明見惑



八十八使思惑八十一品乃見思俱開若云九十八使乃開見合思若云四住開思合見但云見思俱合義也或云三漏欲有無明或云四流見欲有無明或云上下五分妙樂七十八云上五分中色染無色染一向唯上掉舉等三雖復通下不能牽下故云上分言下分者貪雖通上不是惟上嗔一唯下不通於上餘三遍攝一切見惑雖復通上而能牽下故名爲下故俱舍云由二不超欲由三復還下縱斷貪等至無所有由身見等還來欲界文



三滅諦者滅前苦集顯偏真理因滅會真滅非真諦非真諦法界次第中十一云滅以滅無爲義結業既盡則無生死之累故名爲滅妙玄十二云二十五有子果縛斷是滅諦文觀音玄記上十七云滅諦之體是二涅槃雖非真諦能冥於理故云因滅會真滅非真諦因滅苦集方能會真非謂此滅便是真諦止觀十一云法性自天而然集不能染苦不能惱道不能通滅不能淨如雲籠月不能妨害

却煩惱已乃見法性經言滅非真諦因滅  
 會真滅尚非真三諦焉是文輔行一下一  
 云當知苦集但是能覆不能惱染道滅能  
 顯而理本淨法性如月苦集如雲道如却  
 除滅如却已文

四道諦者畧則戒定慧廣則三十七道品此  
 三十七合為七科世五

法界次第中十云道以能通為義正道及  
 助道是二相扶能通至涅槃故名為道文  
 妙玄二二云戒定慧無常苦空能除苦本

是道諦文畧則戒定慧釋籤三道品雖多  
 戒等攝盡戒攝三正語正定攝十四如意  
 定力除覺定慧攝十八四念處四正勤進  
 覺捨覺正定慧攝十八根慧根進力慧力  
 擇覺進覺喜覺正通定慧正念止觀七九  
 見正思惟正精進通定慧正念止觀七九  
 云念通信根信力輔行云一廣則  
 緣兩處切諸法信為本故文廣則

三十七道品三四二五單七隻八若六度  
 攝三十七具如輔行七上廿道品者法界  
 次第中二云品者類也此七科法門悉是  
 入道淺深之氣類故云道品也文

四 道 種 品

當分——多人所修當分得道故  
 相攝——法門相攝各各能攝諸法門故  
 對位——對當位次四念對念處位四勤對修四意對預五根對  
 及五力對世第七覺對二三果八正對初果  
 相生——三四二五單七隻八次第相生不亂也世五


然此道品通正通助通大通小通漏通無  
 漏亦漏亦無漏並如止觀第七具釋又小  
 唯正道大通正助今是小乘道品義當相  
 生  
 一四念處一觀身不淨色二觀受是苦受三

觀心無常識蘊四觀法無我想行蘊

四念處一五云四者數也念者觀慧也處者境也今言四者人於五陰起四倒故於色多起淨倒於受多起樂倒於想行多起我倒於心多起常倒舉四倒故言四也若

相生次第應言識受想行色若麤細次第應言色行想受識今從語便故言身受心法文若迷心不迷色則數為五陰不迷色不迷心則數為十二入若心色俱迷者則數為十八界如婆沙論俱舍頌云聚生門

種族是蘊處界義愚根樂有三故說蘊處界諸有為法和合是聚義生長門是處義以能生長心所法種族是界義如一山中有金銀銅鐵等名多界等補註十三卷十二節



觀身不淨四念處一六云一切色法名之爲身內身外身內身已名內身眷屬及他名外身若已若他名內外身此三種色皆從前世不淨業生則有五種不淨謂生處種子相性究竟生處者女人之體是不淨聚蟲膿穢惡合集成立經十月日二臟間夾迮隘如獄釋論云此身非蓮華亦不由旃檀糞穢所長養但從尿道出種子不淨者攬父母遺體赤白二滯於中而住是識隨母氣息出入是爲受身最初種子不淨也相不淨者頭等六分從首至足純是穢物譬如死狗盡海水洗洗死屍盡唯餘一塵一塵亦臭性不淨者根本從穢業生託於穢物長養其性自爾不可改變究竟不淨者業盡報終捐棄塚間如朽敗木大

世五

七

小不淨盈流於外文觀受是苦四念處一七云領納名受有內受外受內外受緣內名內受緣外名外受緣內外名內外受又意根受名內受五根名外受六根名內外受一一根有順受違受不違不順受於順生樂受於違生苦受於不違不順生不苦不樂受樂受是壞苦苦受是苦苦不苦不樂受是行苦觀心無常者心即心王心王不住體性流動若窟若細若內若外皆悉無常觀法無我四念處一七云法名軌則有善法惡法無記法人皆約法計我能行善行惡行無記若於心王計我已屬心念處攝若於心數計我從九心數一切善數惡數通大地數並屬行陰法念處攝此等法中求我決不可得龜毛兔角但有名

字實不可得若善法是我惡法應無我若惡法是我善法應無我若無記是我無記不能起業但名因等起因此無記起善起惡善惡業尚非我因等起何得是我當知皆無有我但是行陰故經云起惟法起滅惟法滅但是陰法起滅無人無我衆生壽命雖有法起亦是顛倒顛倒者即是身邊二見想行蘊者止觀五八云想取相貌行起違從文念處居初者一佛囑佛將入涅槃阿難請問佛去世後比丘依何修道佛答比丘當依四念處行道二依經止觀五二云大品云聲聞人依四念處行道菩薩初觀色乃至一切種智章章皆爾故不違經文三現前止觀五連云又行人受身誰不陰入重擔現前是故初觀文輔行七上

世五

十二

十二云以四念處能爲大小觀行初門如來殷勤遺囑意在於斯文  
二四正勤一未生惡令不生二已生惡令滅三未生善令生四已生善令增長  
正則不邪勤則不急輔行七上<sub>十二</sub>云只是於前念處精勤除惡生善文從語便先除二惡次生二善據行必以已生善惡居先未生善惡居次並先明滅惡次明生善文止觀七<sub>二十</sub>引十住毘婆沙偈云斷已生惡法猶如除毒蛇斷未生惡法如預防流水增長已生善如溉甘果栽未生善爲生如鑽木出火文一未生惡令不生四念處觀時若懈怠心起及諸煩惱惡法雖未生恐後應生遮信等五種善根今爲不令生故一心勤精進方便遮止不得令生也二

已生惡令滅四念處觀時若懈怠心起諸煩惱覆心離信等五種善根如是等惡若已生一心勤精進方便除斷令盡也三未生善令生四念處觀時信等五種善根未生為令生故一心勤精進方便修習令善根生也四已生善令增長四念處觀時信等五種善根已生為令增長故一心勤精進方便修習令不退失增長成就法界次第中十三

三四如意定

欲念進慧法界次第中三十云智定力等所願皆得故名如意足此四屬定六神通中身如意足藉茲而顯又通因定生亦可六通因茲並發四正勤是慧慧觀不勤念處不成反招散動如風中燈令修如意如加密室

定慧均等欲者希向慕樂莊嚴彼法言彼法者謂念處境言莊嚴者修希向心令法端美凡所修立一切諸法若無樂欲事必踈遺念者專注彼境一心正住若無一心觀法斷絕進者唯專觀理使無間雜無雜故精無間故進凡所修立一切諸法若無精進事必不成慧者止觀法界次第皆名思惟思惟彼理心不馳散當知四法是入定方便出輔行七上十二析玄下三十云四觀神足心中慧以覺察為義妙樂二八思是慧數文

四五根

信進念定慧

輔行七上二十云修前諸品縱善萌微發根猶未生根未生故萌善易壞令修五法使善根生故此五法皆名為根文信者信於

諦理能生一切無漏根力禪定解脫三昧等然此信根必依念處若無信境根何能生進者信諸法故倍策精進念者但念正助之道不令邪妄得入定者攝心在正道及諸助道善法中相應不散慧者念處之慧為定所攝以觀自照不從他知

五五力同上  
根名

前不入故進修五力令根增長則能排障同上根名者輔行七上三十云問名同於根何須更立答善根雖生惡猶未破復更修習令根增長是故此五復受力名根成惡破故名為力文釋籤一九云信解品云無有欺怠嗔恨怨言欺為信障怠為進障嗔為念障恨為定障怨為慧障若根增長能破五障故名為力文信力信諦不為邪外

諸疑所動進力觀諦心無間雜本求道果未證不休念力持諦破邊邪想不令煩惱之所破壞定力若成能破欲界一切諸散能於諸禪互無妨碍不同單修根本之相慧力能破一切邪外等慧能破一切見愛等執

六七覺支念擇進喜  
輕安定捨

修前不入由定慧不調故用七覺均調覺謂覺了支謂支分法界次第中十四云無學實覺七事能到文止觀七九云心浮動時世五以除覺除身口之羸以捨覺捨於觀智以定心入禪若心沉時以精進擇喜起之念通緣兩處文輔行七上三十云定慧各三各隨用一得益便止無假徧修若全無益方趣後品念能通持定慧六分是故念品通

於兩處文

七八正道 正見正思惟正語正業  
正精進正定正念正命

正以不邪為義能通至涅槃故名為道正  
見修無漏十六行故明見四諦正思惟以  
正思惟發動此觀正語以無漏智除四邪  
命常攝口業住正語中正業以無漏智除  
身邪命住於清淨正身業中正精進勤修  
涅槃善入正諦正定正住於理決定不移  
正念心不動失正直不忘正命以無漏定  
慧通除三業中五種邪命見他得利心不  
熱惱而於已利常知足住清淨正命

四邪

方口食 曲媚蒙執通使四方  
維口食 種種咒術卜筭吉凶  
仰口食 仰觀星宿以自活命  
下口食 種植田園合和湯藥

五邪

為利養故現奇特相  
為利養故自說功德  
卜相吉凶為人說法  
高聲現威令人畏敬  
說所得供養以動人心

已上七科即是藏教生滅道諦

輔行一下 十云菩提煩惱更互相傾故名  
生滅

然如前所列四諦名數通下三教但是隨教  
廣狹勝劣生滅無生無量無作不同耳故向  
下名數更不再列

釋籤三八云問何故立四種四諦之殊答

諦本無四諦祇是理理尚無一云何有四  
故知依如來藏同體權實依大悲力無緣  
誓願物機所扣不獲而用機宜不同致法

差降從一實理施出權理權實二理能詮

教殊故有四種差別教起涅槃實後暫用

助圓故須具用偏圓事理故今引之以顯

誠證三偏一圓界內界外各一事理故成

四種 文 廣狹等者以藏通造六故狹別圓

造十故廣藏別不即故劣通圓談即故勝

於廣狹境各論勝劣則成四諦四諦迷真

有重輕故論生滅無生迷中有重輕故論

無量無作不可作尋常迭論勝劣釋也生

滅妙玄二<sup>十二</sup>云迷真重故從事受名如前

釋無生妙玄二<sup>十二</sup>云迷真輕故從理得名

苦無逼迫相集無和合相道不二相滅無

生相無量妙玄云迷中重故從事得名苦

有無量相十法界不同故集有無量相五

住煩惱不同故道有無量相恒沙佛法不

同故滅有無量相諸波羅密不同故<sup>文</sup>無

作妙玄云迷中輕故從理得名止觀一三

云陰入皆正無苦可捨無明塵勞即是菩

提無集可斷邊邪皆中正無道可修生死

即涅槃無滅可證<sup>文</sup>

世五

十七

然四諦之中分世出世前二諦為世間因果

<sup>苦果</sup>後二諦為出世間因果<sup>滅果</sup>

釋籤三<sup>八</sup>云苦集只是世間一法道滅祇是

出世一法世出世法因果性殊而因必趣

果因果類異故值四殊<sup>文</sup>

問何故世出世前果後因耶答聲聞根鈍知

苦斷集慕果修因是故然也


聲聞根鈍苦為初門支佛以集菩薩以道


通菩薩以滅別菩薩以界外道圓菩薩以

界外滅慕果修因且據凡位若初果去則

云帶果行因支佛不立分果乃云望果行

因四諦果前因後此且一途餘亦不定





畧明藏教修行人之與位

通標一教修行之人及三乘位次妙玄四

三十云為破行人增上慢心為消經文引

物希向文釋籤五廿云若無位次將何以

為見賢思齊將何以越增上慢罪文

初明聲聞位分二初凡二聖凡又二外凡內

凡

凡有四門明位一毘曇有門明七賢七聖

二成論空門明二十七賢聖三毘勒論明

雙亦門四車匿論明雙非門後二門大論


雖指論文不度若空門二十七賢聖者學

人十八無學有九四教義二廿七云賢人有

廿五

廿六

二聖人有二十五文凡位不備今家不用  
 釋籤五廿具引今依有門明聲聞位者有  
 三意一凡聖位足二佛法根本三符順教  
 旨佛法根本者有門所說世間諸法乃是  
 無明正因緣生不同外道邪無因緣生也  
 又四教義云大乘經論破小用小多取有  
 門少用空門故須畧出毘曇有門佛法根  
 本賢聖之位文又初二云三藏四門雖俱入  
 道而諸經論多用有門乃至圓教多用非  
 空非有門今不列七聖直作四果釋者名  
 義顯故



信解——見得——三果——學人大——得初果向果得兼向三果

七聖——身證——四向

時解脫——不時解脫——四果

不行般上流般

得兼中般生般行般

九

三有門——毘曇明七賢七聖位

藏空門——成論明二十七賢聖位

四亦空亦有門——毘勒論——大論雖指——無學有九進——不動——不退

退思護住

門——非空非有門——車匿論——論文未度

慧解脫——俱解脫

此依釋籤五十八列成論二十七賢聖若輔行準俱舍列則無身證故料揀云何緣身證不預其數答無漏三學是聖者因擇滅涅槃是聖者果滅定有漏不是依因是故身證不預其數中阿含一卅云長者問佛福

田有幾佛答同俱舍且據學無學二十七人是同然福田經列身證俱舍則無也凡者常也亦名爲賢賢者善直亦曰鄰聖分內外者相似見理名內未得似解名外釋外凡中自分三初五停心

停者止義住義修此五法止住五過心者有四種一草木二肉團三積聚精要四慮知今是慮知心也此五停心通於四教具如四念處明妙玄五三以五停心對圓五品禪門三五以停心名五門禪義該大小通於凡聖菩薩等修今是三藏聲聞助道也貪等是境不淨是觀四教義二四云心既調停乃可習觀猶如密室之燈入道根本無過此五法也文或云五停心觀則從慧或云五門禪則從定定慧調適故名停

心



然上列次拈玄以不淨觀居初者約三不善根次第也第四明析界觀者約不善根後辨第五明數息者散亂是隨煩惱故於煩惱後辨四教義等文皆以數息居初者順修禪人必先攝散入定故四教義二云

今依禪門辨次第也以病先後隨人不須定執前後次第也又諸文專以不淨數息居初者妙樂六十引俱舍云入道要二門不淨觀數息拈界與念佛互存沒者四教義二四問此處何不說念佛三昧為五種

耶答開因緣出界方便代也以二世因緣與界方便皆

破著我能破雖異所破是同故開二世因緣以破著我却出界方便代念佛也且界

方故下即釋出云界方便與小乘念佛

相同亦破境界逼迫障以界方便能破之

界之相是同以皆不出六界十八界故念佛破境界逼迫障界方便亦破也

四念處一云問此中何不云念佛停心答

作五度門則不用作六度門則須用因緣

自對等分性實斷常著我此三皆有故云等分念佛對逼迫

障文止觀七十云毘曇以界方便破我觀

破六界十八界也如輔行七上對治不同今圖示

止觀煩惱境中明六種治八四教義三念處二明五種第五與具治名異義同

小乘

一對治藥對病知不淨對貪等一對治

二轉治二病不轉藥轉藥病俱轉二轉治

三不轉治病雖轉而藥不轉三不轉治持門是病俱不轉坐禪治

四兼治病兼三藥亦兼二一四兼治

五具治具用五法共治病五亦對亦轉亦不轉亦兼治

大乘

六第一義治非對等五如阿陀藥通治眾病

### 一多貪眾生不淨觀

六識妄心於順情境上引起無厭故言多

貪禪門第四明三種貪一外貪男女身分

互相貪著用九想觀治觀他身九想者一脛二

青瘀三壞四血塗漫五膿六散七散八白骨九燒二內外貪於他

已身而起貪愛用八背捨治先觀內身骨

三遍一切處貪資生五塵等物用大不淨

觀治即八勝處因於自身骨人觀成斷

玄上八明四種一顯色謂青黃等作青瘀

想二形色長短等形作壞爛想三妙觸自

他身分細軟光澤作虫蛆想四供奉祇承

適意用死想治也此四望大論六種缺人

相音聲姿態等此不淨觀與念處觀身有

異一正助不同彼正此助二自他境別彼

觀自身此想他境三假實觀異彼是實境

此是假想世五

### 二多嗔眾生慈悲觀

於違情境上忿恨不已名曰多嗔佛令修

慈悲觀可以對治若準禪門第四一義通

大乘境觀有三一非理嗔微起嗔心修眾

生緣慈一切衆生二順理人實來修法

緣慈見一切法三諍論著已所解為是

修無緣慈皆從緣生今是小乘助觀當彼

第一衆生緣慈若法界次第則具明慈悲

喜捨四無量心今但慈悲拈玄準俱舍論

七周行慈輔行九下依婆沙明九周行慈

而皆不出七境三樂謂上親父母中親兄弟

下親朋友中人非親下寬害下中寬害中

親上寬親者三樂者拈玄十一謂諸佛上

菩薩中諸天下輔行引婆沙云三禪上四

事中經行處下輔行五引婆沙云問與衆

生何處樂答有說與三禪樂樂中勝故有

說與四事樂曾得故有說與經行處所

有樂至所住處思惟令得文若拈玄三樂

恐成過分隨機之說貴在治障不可槩論

世

主

天台四教儀集註卷第四


天台四教儀集註卷第五

南天竺沙門

蒙潤

集

世六



先親後寃者從易至難順心成觀若拏玄

第六觀方與上親下樂第七上親中樂中  
 親下樂者一者次第修觀未暇與故二者  
 順七周次第每一番用觀先與上樂中下  
 非要故在後時與雖前後境境皆三使寃  
 親平等以破噴障輔行開為九周者一順

從親至寃次第與樂不待六七却緣前親

又復前境為得不得蓋為破障且爾運心

其實前人實未得樂故拏玄上云問自身

有樂可施於他忽若自身無樂將何施與

吞自身若無樂可施即運心將餘諸天菩

薩等樂而惠施之願彼寃親平等眾生得

受如是等樂故又涅槃疏云雖欲拔苦實

未拔苦皆是虛言雖欲與樂實未得樂此

是假說又行者用觀當念寃譬如過去父

母等方能寃親平等與樂廣如拏玄上云

三多散眾數息觀

攀緣思慮與定相違故名多散息有四相

止觀八十七云有聲曰風守之則散結滯曰

氣守之則結出入不盡曰喘守之則勞不

聲不滯出入俱盡曰息守之則定支數者

從一至十不多不少令心不散禪門第五  
二有四師一師數出息不急不脹身則輕  
利易入三昧二師數入息隨息內斂三師  
出入無在但取所便而數四師依四時用  
數經家正依第三師又不許出入俱數恐

生病故梵語阿那波那此云遣來世六遣去二

出息即是三世諸佛入道初門通於三乘四

教又用息明六妙門謂數隨止觀還淨攝

心在息從一至十名之為數細心依息知

入知出故名為隨息心靜慮名之為止分

別推拚名之為觀轉心返照名之為還心

無所依妄波不起名之為淨如法界今是次第上

小乘助道但名數息

四愚癡衆生因緣觀

迷倒不了撥無因果故曰愚癡須知着我

及計斷常并執性實三皆迷倒因緣者法  
界次第中七十云展轉感果為因互相由藉  
為緣文如無明為因能與行支為緣乃至  
生支為因能與老死為緣四教義二八云  
十二因緣有三種不同一者三世十二因

緣過去二支因現在三支果二者二世十

二因緣現在有十三者一念十二因緣此

現在隨一念心起三世破斷常二世破着

我一念破性實也文輔行七上末云三世

破斷常者三世相續故不斷三世迭謝故

不常又過去破常未來破斷現在雙破斷

常二世破我者現未二世具十二因緣於



父生愛於母生嗔名為無明父遺體時謂

是已有名之為行從識支去至老死支與

二世同文輔行八上十一云言一念者非謂

極促一剎那時謂善惡業成名為一念異於三世二世連縛等相故名一念皆是無常故無性實文如妙玄二十六禪門三九然此三種因緣破愚癡者在者我內準大集及禪經說若毗曇大經乃以界方便破着我此皆隨機宜樂也若束十二為三道輪轉相生者俱舍云三煩惱二業七事亦名果有雖十二而二三為性三謂惑業事二謂因果 畧果及畧因由中可比後際畧果前際畧因中間廣說可此際畧果後際畧因乃全畧又云從惑生惑義補注十二引論具釋

業從業生於事從事事惑生有支理惟此十二因緣通名有支道理惟若此也此名東十二輪為三道以能通義與輪轉義同廣如輔行三下十四釋



輔行引俱舍云能作及俱有同類與相應  
 徧行并異熟許因唯六種今且依大論畧  
 出六因相以大論是一家承用名字稍同  
 故且依之乃至云復次心心數法從四緣  
 生無想滅定從三緣生除於緣緣諸餘心  
 數不相應行及色從二緣生除次第緣及  
 緣緣餘有為法劣故無有從於一緣生者  
 報生心心數法從五因生除於徧因無漏  
 心心數法從三因生謂相應共及無障礙  
 淨名記云十二祇是四六而已故知但是  
 離合說也且如無明祇是行家之能通也  
 即同類因行必四相即俱有也行中五部  
 亦同類也見歷四諦 思歷一諦無明行中心心數法  
 共行共感所作必同行有必招識等異熟  
 此行必有徧行五部之惑若四緣中論云

廿六

五

增上即能作因緣五因性比六因說可知  
 輔行八上十一云大論問佛說因緣甚為難  
 解云何令於癡人觀耶荅非如牛馬等禪  
 門但云聰明利根分別籌量不得正慧邪  
 心取理名為愚癡文此因緣觀與支佛何  
 異今是助道破障畧論三世支佛正觀破  
 惑必須逆順兩緣百千萬世因緣等  
 五多障衆生念佛觀  
 止觀云睡障念處乃云逼迫障禪門第四  
 明三種障念三身治彼通大乘今且 明小乘助道障即  
 惡業三種者一昏沉暗塞障昏睡 無記念應身  
 三十二相治二惡念思惟障欲作五逆 十惡等事念  
 報身力無畏等治三境界逼迫障身忽卒 痛或見  
無手足火焚 水溺等也念法身空寂無為治文今明  
 小乘助道據四教義云破境界逼迫障合

念真空法身若以身對教如輔行一下七云前之三教各念一身謂生應報圓念法身諸身具足文

二別相念處

如前四念處是

妙玄四三云五障既除觀慧諦當能觀

四諦而正以苦諦為初門作四念處觀破

四顛倒文拈玄上十二云別謂各別身受心

法不同故相謂行相觀此四法作不淨等

行相故言念觀者然觀體非念觀是其慧

推求觀察知不淨等故至處謂處所謂身

受心法是念所緣住止之處故文於五陰

境修四念處為破四倒合五為四受則六

根對六塵義兼內外故獨為一想行一向

居內故合為一又此念處別名屬慧通亦

有定輔行三下十一云四境止心故名為定

世六

六

文

三總相念處一觀身不淨受心法皆不淨乃至觀法無我身受心亦無我中間例知已上三科

名外凡亦名資根位

此有四句四念處一云一境別觀別正是

別相念處二境別觀總三境總觀別此二

是總相之方便四境觀俱總是總相念處

文初則一藥對一倒中間二句觀心漸熟

或別於一境總用四觀或別用一觀總觀

四境第四境觀純熟舉一俱得也若拈玄

準俱舍疏前三皆別相攝第四句方是總

相位今依妙玄四念處初句是別後三皆

總今此正當境總觀別謂別用一觀總觀

四境又上停心破障四念處惟觀苦諦至

內凡位方觀四諦妙玄四三十三云七賢位

人明識四諦此約解說心行理外名外凡  
資糧者從喻也欲越三有此為資糧

二明內凡者有四謂煖頂忍世第一 此四位  
為內凡

亦名加行位又  
名四善根位

漸見法性心遊理內身居有漏聖道未生

故名內凡以定資慧加功用行故名加行 世六

聖道根本亦曰善根煖從喻妙玄四 二十

云以別總念處觀緣四諦境能發似解伏

煩惱惑得佛法氣分如鑽燧先煙春陽煖

發以慧鑽境發相似解解即喻煖 此喻  
慧行 又

如春夏積集花草自有煖生以四諦慧習

眾善法善法熏積慧解得起故名煖也 此  
喻

行頂妙玄四 二十 云似解轉增得四如意

定十六諦觀轉更分明在煖之上如登山

頂觀矚四方悉皆明了故名頂法 文  
忍妙

玄四 二十 云亦是似解增長五種善法增

進成根於四諦中堪忍樂欲 文 亦忍可義

世第一釋籤四五云此是有漏故名世間

於中最勝故云第一 文 此四位觀行者俱

舍頌云從此生煖法 從總相後  
生煖善根 具觀四聖

諦修十六行觀 四諦為所緣十六行為能  
緣釋籤謂煖八諦十六行

預有解八字字恐誤或約上二界四諦本

同通解云八耳其實只觀欲界四諦此位

有三 次生頂亦然 用觀同前 下中忍同頂

下忍遍觀八諦中忍縮觀明滅緣行今皆

云同頂者下忍雖上下通觀不出四諦下

忍難滅緣行 上惟觀欲苦一行一刹那 此

約初觀說 忍合前一行二刹那心 世第一亦然 上忍

言一刹那此據深說 世第一亦然 位中


有二刹那一刹那盡餘一刹那在名上忍

滿即入世第一今一刹那引入無漏故云

也亦然

七  
賢  
一 五停心 觀破貪等五障  
二 別相念 唯觀三界苦諦

立修觀行相




中忍減緣行者若遍觀八諦修三十二行  
 名下忍位若初依欲界苦修四行次例觀  
 上二界苦亦四行又觀欲集四行次上二  
 界集四行乃至上二界道下不用最後乘  
 之一行名為一周減一行也復從前觀從  
 後減至第四番減上二界道諦下道之一  
 行到此能緣之行既無所緣之諦亦減此  
 道行與道緣同名亦與緣同減故云減緣  
 必減行據初行減行未必減緣據後行第五番  
 減欲界道諦下乘行乃至最初欲界苦下

第一一七冊 天台四教儀集註 一五二四八九

空行總有三十一周減緣減行皆名中忍  
 唯留一行并所緣苦境入上忍位此位所留一行  
 隨行者所宜如釋籤第四云云是則上四下三七緣與初  
 行同名行與緣同減故釋籤四云七周  
 減緣二十四周減行

中忍減緣行圖



十六行義如輔行三下七及析玄上具釋  
 文上二界合一四諦者同一定地故以欲  
 界現前比上而觀故析玄五義備釋云此  
 則伏三界四諦下惑至發真時故上二界  
 同名比法忍智等又十六行只是觀門涅

三七五 龍藏

槃疏名十六諦者取諦審觀察義故又此  
 滅緣行妙玄三八合作八番者以行從緣  
 但約八諦為八周也四教義一二十云中忍  
 作十番縮觀者約後七諦以行從緣為七  
 周開欲界苦下所滅三行為三周總為十  
 番妙玄八云三番縮觀進成上忍者以  
 三界不出四諦亦以行從緣滅後三諦故  
 曰二番諸文詳畧不同蓋赴機異耳四善  
 根勝利者俱舍頌云煖必至涅槃頂終不  
 斷善釋或四云忍位是進煖位是退頂位  
是進退兩際猶如山頂文四教義二  
 云煖頂退者何云性地若此人雖進惡道  
 他獄一入受罪不復重入有性地善根故  
 能得聖果文且必至涅槃與終不斷善有  
 何異耶蓋煖雖造惡入獄終不久留後必  
 生入天證涅槃果若到頂位雖退入惡必  
 不起大邪見斷善根故但有明昧淺深之  
 殊其善忍不墮惡道四教義二十云中  
 根一也忍不墮惡道二忍雖起煩惱惡業  
 而不受三途猶受人天百千萬生第一入  
 若上忍成但有人六七生業在

離生此一利那即入見道  
故同見道雖四趣生問前中忍中玄  
 文云但作二心觀於一行釋籤何云彼四  
 心同一行一緣耶答中忍二心似於忍智  
 二心也以由忍智二心雖在世第一後心  
 發真而得今中忍位有此似解故云如似  
 約一行說但有二心故云但作二心觀於  
 一行若釋籤云四心者緣行各二故云彼  
 四心同一行一緣也釋籤四引論明修煖  
 法從欲界至無所有八地各九品并一具  
 縛總七十三人是則煖法通於三界涅槃  
 經何云如是煖法世是色界法非欲界有文  
 須知能修之人通於三界所發煖法依色  
 界定發也釋籤引評家云盡是色界法住  
 定地法文涅槃疏作三義釋云一多用定  
 發煖法觀從多為言二據中間三界皆能

發於煖法而色界居中故言色有三據處

為語色發煖法易欲界則難又

上來內凡外凡總名凡位亦名七方便位

以此七位為入聖道之方便諸文或云五

方便者蓋停心破障故不論總別念處但

合為一文

次明聖位亦分三一見道初二修道二三三

無學道四

四教義云通名聖者聖以正為義捨凡性

入正性初果見理破惑名見道二三果去

重慮緣真名修道四果惑盡名曰無學文


句八四云研真斷惑名為學真窮惑盡名

曰無學文然初果位從世第一後心苦忍


真明或云苦忍明發即欲界苦諦下苦法忍也明發即苦法智也謂真智明發也

於八諦下發八忍八智總十六心有門十一

以十五心名見道為初果向十六心是修道初果攝拏云空門以十六心名見道為初果二果去方屬修道宗計不同不須和會經家雖多用有門高麗師欲令易解且準空門註見道是初果也八忍八智者俱舍頌云前十五見道見未曾見故世第一無間即緣欲界苦生無漏法忍忍次生法智次緣餘界苦生類忍類智緣集滅道諦各生二亦然



七聖位對三道四果及向次第超越住果勝進委如妙玄四教義明今圖示之



一須陀洹此翻預流此位斷三界八十八使見惑見真諦故名爲見道又名聖位

預流者預入聖道法流金剛云入流或翻逆流逆生死流也拏玄下八名抵債不受

三途業債故斷三界八十八使者何故婆

世六

十二

沙論云二十八使見道斷餘六十使修道斷耶先達云有二種根性若等觀四諦者見道斷八十八使若不等觀四諦者見道中唯斷三界若諦下二十八使餘三諦下見隨修道斷乃是鈍根

二斯陀含此云一來此位斷欲界九品思中斷前六品盡後三品猶在故更一來


此果斷欲界九品思惑前之六品於初果之後此果之前須論家家今先明欲惑潤七番生死次通示超次根性後別釋家家之義惑有麤細故分九品無漏智力故經七生所以須七生者如輔行引成論云於七世中無漏智熟如服酥法七日病消如歌羅邏七日一變如親族法限至七代如七步蛇四大力故行至七步蛇毒力故不

至八步惑力至七道力非八婆沙云應云十四何故云七卷中有本有數不出七故但云七乃若總論生應云七人七天十四中有合二十八生且依前說不出七故故但云七

世六


十三

以惑潤生




經生損惑

古德頌  
初品潤二生  
二三四各一  
五六共潤六  
第七斷三品



任斷者此人非全無觀行但不及次斷勤加功行耳次斷者雖異任斷乃對超斷越次得名本斷超者輔行六上十云本得非想定即是已斷下八地思至十六心應名阿羅漢向但名阿那含者以凡地時有漏智弱但名那含若本斷九品今名三向若七八品得名二果斷六品等名二果向斷五四等但名初果文須抑退者意令此人此生必定起無漏聖道故文出小超者止觀六九云若凡地未得禪十六心滿超能



無除欲惑諸品或三兩品輔行云應云三

婆沙即是家家一種子等即是小超文或

前文云超斷至五品名家家乃至八品名

一種子文輔行上六釋云今文中言超斷者

只是下文小超之人此定止觀超也本在凡

地未得色定或修欲定欲惑未斷此人至

十六心超斷五品名為家家此之五品同

四品故此文別釋小超中斷五品惑論家

定小超之人皆未得色定如止觀云若凡

地未得禪若已得禪豈止三向蓋小超人

非一隨其本斷品之多少而得名為家家

種子及以無學向果等名此文通釋小超

觀文明小超人至一種子義猶未盡故此

點云隨其本斷等也蓋隨其小超本位斷

惑品數多少則斷五品名家多則乃至

極果則知小超不可惟局三果向也故止

觀云十六心後即有一念問小超若超至

四果者止觀何故但云若凡地未得禪超

能無除欲惑諸品答此據小超中未得色

定者而言故云若凡地未得禪超能無除

欲惑諸品若之為言乃不定之辭也况諸

品之言豈惟八品故下即云一種子等問

或謂小超只至三向乃判輔行隨其本斷

品之多少謂雙點超次而得名為家家種

子乃別點小超及以無學向果等名乃別

點次斷如此可乎答止觀雖超次對辯輔

行唯指小超如云今文中言超斷者即是

下文小超之人乃至云此之五品同四品

故隨其本斷品之多少等乃釋小超一連

之文豈可分擘對當耶問止觀超次對辯

何故小超只至一種子耶答小超一種子

已前與次斷異若三果後與次斷同故止

觀不論也問或謂十六心後一念超果至

那舍屬本斷超超至羅漢屬大超者且小超何不預耶答本斷超人豈止那舍若大超人凡地聞唱善來即證羅漢何得云十六心後問小超既至羅漢與大超何別答以小超凡地修觀伏於見思至十六心超果不定若大超人凡地一呼善來直超四果與小超自不侔矣次釋家家之義家家者受生處不一也人中三洲張王不同天上六欲宮殿等別故論天家家人家家不等等家家平等家家輔行六上六云家家者有二不同謂天及人天謂欲天三二家生而證圓寂此天人謂人處或三二家或三二洲而證圓寂此人家家已上皆平等家家也若天三生天三人二若天二生天二人一天不等人生三二反此可知人不等家家故天家家先於

人中得見道已若超若次進斷三四後於天中三二處生人中反此天家家者於最後生天中餘殘結斷名得圓寂人中家家準此可知然輔行云三二生而證圓寂即尋常斷九品惑俱舍頌云斷欲三四品三二生家家此二句正頌家家斷三品則損斷四品則損五生後三生在論三生家家若二生在論二生家家斷五至二向斷至五果斷六一來果斷七或八品一生名一間斷至七品或八品猶有此則第三向此據一生間隔此據命終者斷九不還果已上論頌正頌加行終者而向三果次斷備乎九種根性輔行問何緣無斷一品二品及斷五品名家家耶答加行次入斷二必三斷五必六必無不斷大品惑盡而命終者輔行云此次斷義與今文同蓋指俱舍加行次斷與止觀所引婆沙小超

是同問次斷之人必斷大品惑盡何故斷  
 四不至五六又斷八品何不至九答斷初  
 大品已既有餘力故更進斷第四也不至  
 九者以有得果越界二義故六唯得果無  
 越界義是故斷五必至於六二三品中全  
 無二義斷二必三於理無疑問還有斷一  
 二品論五四生家家否答既斷二必三豈  
 惟一耶問還有斷六品論一生家家否答  
 家家者受生處不一既唯一生則不論也  
 問斷五至二向還可於此論功齊四品論  
 家家否答加行次人既斷五必六不同小  
 超也三緣具足方論家家俱舍云即預流  
 者進斷修惑若三緣具轉名家家一斷惑  
 緣斷欲修惑三四品故此揀異任斷二成根緣  
 得能治彼三四成無漏根故此揀異本斷超三受

世六

十七

生緣更受欲有三二生故此揀異大超頌中但  
 說初後緣者斷惑三四品即斷或緣三二生家家即受生緣論中  
 既云預流果後進斷修惑即是治彼三四  
 成無漏根義準已成故不具說三緣缺一  
 非家家之義若斷七八亦具三緣轉名一  
 問此約次斷若小超人既論家家三緣必  
 具輔行六上若超若次進斷三四文得非  
 小超亦至三四品耶彼釋家家三二處生  
 故以五品功齊四品而總言耳非謂小超  
 至四品也又復小超至五品而不至六者  
 由得果義故止觀六引婆沙云次斷五品  
 名斯陀含向超斷五品名家次第六品  
 名斯陀含果超斷六品名一往來次斷七  
 品八品名阿那含向超斷八品名一種子  
 文問次斷五品名二向超斷五品名家家

人斯陀舍與一往來那舍向與一種子其義無別何分超次答由命終不命終經生不經生異也蓋次斷五品名二向者此人既不命終向二果也超斷五品名家家者此既命終雖斷五品功齊四品以論家家下二例說故三緣具足得受一間正取命終一生間隔三緣不具不受一間之名但名阿那舍向正取不經生者向三果也然教門方便論家家者為令聖者畏經生故速得證果若任斷人既經生損惑故不說也

三阿那舍此云不來此位斷欲殘思盡進斷上八地思

此果斷欲界下三品思盡進斷上八地思取證四果而般涅槃

世六

此云就此釋般那舍

十八

此名從畧乃是般涅槃之阿那舍也舊對家家稱為般般義無所準又此且論有餘涅槃俱舍論云般涅槃者謂有餘依有餘師說亦無餘依此不應理彼應捨壽無自在故止觀六五云次斷初禪初品至非想第八品凡七十一品悉名阿羅漢向六種那舍位在其中此是任斷根性輔行六上六引大論七種一中般二生般三有行般四無行般五上流般色界六現般欲界七無色般俱舍七種前五如大論第六却取無色般輔行一


無字乃云但取色般并五為六第七方立現般荆溪謂俱舍不立現般指七種中第六不立耳非謂論文不明現般據二論六種一立一不立對釋止觀六種那舍故有此言但諸文種數多少今準俱舍三界七種圖示然後對

揀頌云此中生有行無行般涅槃上流若  
雜修能往色究竟超半超遍沒餘能往有

頂餘字指不雜修  
有頂非非想處  
行無色有四住此般涅槃



槃無色後欲般今圖順三界次第善善  
善無無無廣福無偏無少光無少大梵梵  
究竟現見熱煩想果生雲淨量淨音量光

○梵補  
製  
世六  
十九



大論七種名同俱舍列次小異知下俱舍圖示  
論云行無色者差別有四謂在欲界離色  
界貪從此命終生於無色此并前五成六  
不還復有不行色無色界即住於此現般  
涅槃并前六為七全超謂在欲界於四禪  
中已徧雜修遇緣退失從梵眾沒生色究  
竟中間盡越故名全超半超梵眾沒已中  
間漸受十四天處或超一二乃至十三後  
乃方生色究竟天皆名半超非全超故通  
受半名徧沒全不能超名為徧沒色界徧  
沒即十六天大梵是天主我慢無想是外  
道所居聖者不生此二天也俱舍復有九  
種即於色般合五為三有行無行皆生般  
攝即開三為九頌云行色界有九謂三各  
分三業惑根有殊致成三九別

色界九種般圖



諸文或云五種獨指色般或云八種三界  
 七中加不定般補注十四初引婆沙三界  
 定相乃約期心般中遠有不定進老示不  
 却生上界而取證也或期生上界忽發宿  
 習欲界即證色無色準說可知 雜心論七種妙玄所用於  
 色界五初開中為三速非通 并後四成七

釋籤五引論備釋  
 攝即開三為九  
 有行無行皆生般  
 即於色般合五為三

毘曇有一萬二千九百六十種般如釋籤  
 第五具示色界中般者初離欲界生色界  
 時厭苦心切即在中有而般涅槃故屬色  
 攝若至色界上生餘天雖有中有不得論  
 般為無宿習厭苦力故如枳 無色不立中  
 般者指歸鈔八云經云無色衆生無有中  
 陰者毘曇法中說除四空餘一切處定有  
 中陰以無色界無處所故文 俱舍明隨於  
 何處得無色定於命終時即生無色圖中  
 引五差者謂下中上上勝上極輔行六上  
 析玄下十委釋行相由此五禪生五淨居主  
 又樂論議者恐就下界修觀時說非生淨  
 居有論議也以二禪上無語言故文  
 四阿羅漢此云無學又云無生又云殺賊又  
 云應供此位斷見思俱盡子縛已斷果縛猶

在名有餘涅槃若灰身滅智名無餘涅槃又  
名孤調解脫畧明聲聞位竟

此位斷上八地七十二品思俱盡四智已

圓我生已盡梵行已立所作已辦不受後有無法可學名無學

果亦名究竟如析阿羅漢者文句一云或

言無翻舍三義故淨名疏十引智論釋云

一殺賊從破惡以得名二不生從怖魔以

受稱三應供因乞士以成德文因果對釋多含

不翻乃經家正意以三義翻之乃順古耳

若釋比丘因名乞士等對舉果名蓋欲顯

大比丘之階位也如法華又句又前標聲


聞通凡聖位若阿羅漢局第四果此位修

三昧一名金剛二名重空三名電光上二名如

妙立第四電光如止觀第九電光義通初

漢所此果別號二種三種六種九種及果

性退不退義今歷示之先明二種



初時不時從緣得名次慧俱約觀立號三

壞不壞依境受稱也或準正理論以時不

時敵對慧俱若準妙玄四六廿及四教義二

十信行法行各二不得滅盡定者但是慧

解脫得滅盡定者名俱解脫舊云敵對乃

從正從多各對則旁正兼舉世六以信行亦有

帶事兼修法行亦有緣空直入若壞法不

壞法與慧俱同舊約五義揀判慧俱一約

性共慧人修性念處俱人修共念處四教

二約正助慧人正道斷結俱人兼修助道

光明句中 三約事理直緣直理名慧解脱

帶事兼修名俱解脱事者一帶根本四禪

俱人亦依世禪修六行觀故二帶無漏禪

慧人但至觀禪俱人具修觀練熏修止觀第九

婆沙亦有少分慧脫全分慧脫此有三根

至無四禪下根也能修一禪至四禪中根

也能修無漏禪至九想十想上根也俱人

能修一二三禪下根具四禪中根修觀練

並得次觀等四俱解脱人方乃具足三

得滅盡定如妙立四廿六已上三事俱人兼得也

四約神變慧人十四變化俱人十八變文句

一五約三明八解俱人則具慧人則無若

輔行云通通於六明唯局三天眼宿命諸漏盡三也

羅漢皆能得之文此有闕具之義婆沙云

若有一明二明名慧解脱文準知俱人三

明具足次明三種

世六

十三

三

慧解脱	性念處	劫智外道
俱解脱	共念處	神通外道
修	破	文字外道
緣念處	文字外道	

性念處者亦名自性念處緣  
理斷結除自性過共念處者  
正助合修緣念處者緣佛三  
藏及世間文字所緣處廣也  
具如四念處四教義二俱合  
亦有三種羅漢各論三念處

慧俱略如上無疑者三藏教法四韋陀典

天文地理一切通達故曰無疑四教義二

云問不應別說無疑九種羅漢無此名目

答此出智度論明欲結集法藏集千羅漢

皆得共解脱無疑解脱也文既是大論開

出在佛世時俱人所攝佛世且明自行入

道是故諸文只云慧俱六種九種皆無此名若集論明六種

中有無疑法者與不動釋籤五十九云得滅

法名異義一非今無疑釋籤五十九云得滅

盡定但名俱解脱人未修緣念處終非

無疑解脱也文故知無疑乃俱人中勝者

耳小大言之慧俱並小無疑乃名大阿羅

漢妙樂一三十引中阿舍舍利弗問五百

比丘幾三明幾俱解脫幾慧解脫佛言九  
十人三明九十三俱解脫餘但慧解脫荆  
溪云三明者即無疑解脫文須知三明是  
俱人得取其勝者復云無疑也後明六種  
附揀七種及列九種然後約六種明果性  
退否

天台四教儀集註卷第五


音釋

喘充究切說文疾息也侔莫侯切齊華也

天台四教儀集註卷第六

南天竺沙門 蒙潤 集

世七



第一一七冊 天台四教儀集註 一五·一四八九

六種約根性慧俱約觀行九種乃根性觀  
 行兼舉耳又九是空門二十七賢聖中之  
 無學為答福田長者所問顯福田之多赴  
 機生善故又六種明二加行差別如拈玄  
 下廿九一者恆時加行即勤修行二者尊  
 重加行即猛利修行六種羅漢前二種  
 俱無加行第三護法惟有恆時無尊重第  
 四住法惟尊重無恆時第五第六皆具二  
 加行 果性退否者俱舍頌云阿羅漢有六  
 退法至不動前五信解生 信行轉入修 總  
 名時解脫後不時解脫從前見至生 見得  
 見至亦是法 有是先種性有後練根得 六  
 行轉入之名 羅漢有先世種性定者有後來修練根性  
 轉劣成勝者如本是退法練成思法乃至  
 不動或思練成護乃至進練成不動唯初  
 退法是先種性無練根者又練根通資加  
 修三位唯除見道以 四從種性退 第一退  
 時速不能轉根故 無處可退第六利根不退唯中間四種根  
 性有退如第二退為第一乃至第五退為  
 第四又此退性乃是 五從果非先 前五種  
 練根非先定根性也 從無學


三八九 龍藏

果退居學位第六則不退也亦是練根論  
 退非先種性也非先二字總領果性二種  
 退者若析立辯果退非先中云如第三護  
 法若先是退法至果練成護法則有果退  
 若先是思法後練成護法則無果退乃至  
 結云即知果退惟約先是退法若先是思  
 法等四性必無果退之非先有退者但  
 似即就退法根性論之


據餘四說 此釋伏疑也蓋上云五從果非  
 先然於退法本先種性何故併  
 云五從果非先故即釋云非先有退等也  
 則果退雖在前五若論非先唯中間四第  
 一退法雖無練根不論性退亦論果退思  
 護住進若退法練入尚論果退况本是退  
 法豈不 不動盡智後必起無生智 第六於  
 退那 能起無生智所以果性皆不論退餘五有  
 退以不起無生智故本住不動練根不動  
 皆無 餘盡或正見 五種盡皆後 此應果皆  
 退義

有 盡智後正見六 已上頌語取析立意畧  
 種應果皆有  
 注具羅漢見思已盡已證無學所以有退  
 者考論祖誥 妙玄四 止觀 九上 十二輔行 九上  
 蓋信行慧解脫人不修事禪不得滅盡定  
 或世智斷惑但得盡智不得無生智遇着


遠緣還起煩惱故有退也 遠緣者一長病  
 二遠行三諍諍  
 四營事五多讀誦又大經明五緣一樂多  
 事二樂說世事三樂睡眠四樂近在家五  
 樂多 又析立謂非先種性者但是無學一  
 道所成不得堅固故有退若是先種性由  
 學無學二道資持堅固故無退 彼文更有  
 退等四 句分別



辨 非 先 退 不 退




辨 非 先 退 不 退



然前五種未必全退有遇遠緣者故有退  
耳故輔行<sup>九五上</sup>云然慧解脫亦不併退有  
退義故故說有退<sup>文</sup>又退者非久輔行云  
問退經幾時答經少時乃至自不知退若  
自知退當修勝進方便復次彼煩惱現在  
前時心生慚愧速作方便如明眼人晝日  
平地顛蹶尋即還起<sup>文</sup>釋籤云此生之中  
必得無疑極至臨終亦得無學故也<sup>文五十九</sup>  
或曰前時不時各有慧俱不動既從時解

脫生得非六種皆有退義耶答慧人未必  
一向論退恐只鈍根有漏智斷遇遠緣者  
退今復圖示



六種論退局第四果通辨四果退不退者  
析立引三家一薩婆多云初果不退後三  
果退二大眾部云前三果退第四不退三  
經部宗云初四兩果不退中間二果有退  
廣如彼但註云三師難定今恐成諍畧為  
和融輔行<sup>九五上</sup>引婆沙云阿羅漢退牽二

三果退猶如井沙上下有甄中間唯沙上  
甄若類從上至下其中間沙豈得不類四  
果如上甄二果如中沙初果如底下乃至  
初果之前更無有退若彼退時更無住處  
文不可聖退為凡夫也合彼初師然見道

既有不等觀四諦如婆沙云二十八使見  
道斷餘六十使修道斷先斷三界  
苦下見惑見既分

盡果理未圓例如身子六住尚退又三界

中斷惑之智通漏無漏是則四果俱退俱  
不退三師之說皆無妨礙子縛者見思煩

惱果縛者五陰報質也灰身即滅戒身定  
身解脫身解脫知見中半分滅智即滅慧  
身解脫知見中半分則五分法身俱滅也  
然身子入滅而均提荅佛何云五分法身  
不滅耶釋籤十云無作之業至未來世名

世七

五

為不滅非常住不滅也文無作業者乃功  
熏耳云云孤調解脫者輔行三上十一云灰身  
故無身滅智故無智獨一解脫故曰孤調  
妙立取獨滅義亦名孤調涅槃名獨滅者  
輔行引大論云小乘戒為自調禪為自淨

慧為自度文然斷欲九品立二三果上八

地思惟一無學者止觀六七云如險處多

難多須城壁欲界多難多果休息也文六

故知上界定地少難唯立一果若爾七聖

中二為見道信行  
法行二為修道信解  
見得二為無

學道時解脫  
不復以身證對四果向者何

耶有云位鄰無學將斷非非想惑特立此

位如別圓之有等覺也今謂空有二論設

位不等教門方便多少隨宜耳妙立明身

證得滅盡定約似證也成論云不得滅盡

定名身證者對四果真證奪而言之

次明緣覺亦名獨覺

輔行九下五引大論二十一云迦羅此翻

緣覺亦名獨覺文四教義二十十標云辟支

迦羅此翻緣覺釋中開二謂緣覺獨覺新

譯華嚴音義云二名各有梵語畢勒支底

迦此名各各獨行佛者覺也鉢羅底迦此

翻緣覺翻譯名義亦開二名辟支迦羅名通二種若

畢勒支底迦局在獨覺此皆梵音除切故

也緣覺者觀內因緣稟佛教法獨覺者觀

外因緣無師自悟文句四七引大論云獨

覺者出無佛世緣覺者願生佛世文俱舍

明獨覺自有二種一麟喻二部行如拈文已

上名義各釋若集解云慈恩基師引仁王

經列獨覺衆又云釋迦出世五百獨覺從

世七

六

山中來至於佛所學者如何消釋此耶文

補註云亦引而釋曰本是聲聞根性以緣

悟菩提故名支佛文然仁王經初本無獨

覺之名但云復有八百萬億大仙緣覺慈

恩意以緣覺一衆諸經兼聲聞而列之若

二乘別列如仁王也然經云緣覺慈恩稱

獨覺者蓋根性不異名義互通如緣覺稱

獨覺者雖值於佛樂獨善寂故即慈恩所

云是也獨覺稱緣覺者雖無師教觀外因

緣故如光明經云或不恭敬緣覺菩薩智

者科爲懺無佛世敬田惡業是也又獨覺

亦通見佛文句四七引華嚴等獨覺有三類

一者知佛出世即先入滅或佛神力徙於

他土二者無佛世三者雖生佛世願見佛

故不即捨壽亦不被移文中東具此三五百獨覺

從山中來者即第三類通義雖爾別釋如  
 前又二辟支各有大小準輔行九下有十五有三  
 義一具相名大不具名小二兩大中現通  
 者大無通者小三現通中說法者大不說  
 者小又四教義四宿世偏修性念處者小  
 兼修共念處者大又先達立漸頓二義如  
 輔行等七生初果後方極證為小頓證為  
 大若與聲聞對辨者如文句七六廿云二乘  
 六義同十義別同出三界同盡無主同斷  
 正使同得有餘無餘同得一切智同名小  
 乘別開十義者行因久近六十劫百劫故  
 一根利鈍二從師獨悟三無悲鹿羊四聲  
 羊驚絕奔走支佛如鹿並馳並顧有相無相五觀廣畧六  
 能說得四果法不能說法得煥法七有云  
 說法令人得四果聲聞不能說法不能令人得煥法  
 在佛世不在佛

世八頓證漸證九多現通少說法聲聞不  
 定十文中六十劫百劫者拏立上一明修  
 行聲聞利者三生鈍者六十劫支佛利者  
 四生鈍者百劫文然則聲聞勝支佛耶聲  
 聞但入見道支佛極證無學還以支佛為  
 勝又有相者支佛無相者聲聞分別功德  
 論五卷初云身子有七相目連有五相阿  
 難謂字函云身子有七相目連有五相阿  
 難二十相獨難陀有三十相難陀金色阿  
 難銀色文是則聲聞亦有相耶須知元是  
 聲聞根性不論種相若是支佛轉為聲聞  
 不妨有相四教義一云迦葉舍利佛等皆  
 是辟支根性人也文若文句解形色憔悴  
 謂二乘不修相好此以大形小不可為並  
 又根利鈍者別對支佛是法行聲聞是信  
 行通論各有信法二行文句五三十妙  
樂六二十八諸

文更有侵習不侵習亦由根利鈍故支佛

不制分果四教義二釋小獨覺云本是學

人在人間生或須陀洹七生既滿不受八

生自悟成道輔行亦云七生初果此是聲聞根性出

無佛世後證支佛是故云爾非分果也若

般若經明獨覺向世三此則大乘同性經明支

佛十地此乃兼說耳別行疏云支佛侵習為淺

處通教菩薩正習盡名彼岸文此以三藏支佛與通

菩薩共論疏記上云支佛修行不立分果深觀

緣起久種三生作福供佛聞法福慧既隆預侵二

習預進也此釋支佛侵習之雖未發真無

漏所以也不可連下文作難四流莫動欲有見名得淺處支佛向頓

證極果名到彼岸此以支佛自論通教菩薩

正盡得淺處習盡到彼岸文此約通菩薩

論舊謂支佛必須發真方侵習氣別行疏記云預侵一習復云難未發真此為難也

須知疏中以三藏支佛與通菩薩共論淺處彼岸記中義開二人各論不可謂記文正釋疏中支佛侵習為淺處以預侵二習連下雖未發真而作難也若如上注釋則無妨矣

值佛出世稟十二因緣教所謂一無明煩惱障煩

道惱

過去一切煩惱皆是無明體即是癡迷暗

為性無所明了故曰無明註云煩惱障煩

惱道者輔行三下四云能從聖道故名為

障展轉互通故名為道並從過患功能立

名文九

二行業障業道此二支屬過去

造作名行於過去世造作諸業也

三識託胎一分氣息

既有惑業以生垢心故父母交會時意識

妄念投託母胎一剎那間有了別義名之

為識託胎一分氣息止觀九一廿云初托胎  
名歌羅邏此時即具三事一命二煖三識  
是中有報風依風名為命精血不臭不爛  
名為煖是中心意名為識文此時便隨母  
氣息上下出入也

四名色名是心  
色是質

從託胎後五箇七日名形位生諸根形四  
支差別故雖有身根及意根未有眼等餘  
四根故六處未圓皆是名色攝名是心色  
是質者四蘊是心一蘊是色質礙曰色心

但有名也

五六入六根成  
此胎中

從名色後至第六七日名髮毛爪齒位七  
七日名具根位五根圓滿故六根成者輔  
行四下一廿云十九七日諸根具足文此胎

中總有名色六入皆胎中位故輔行八云  
三十八箇七日皆胎中位

六觸出胎

出胎已後至三四歲由根對塵情塵識合  
然於違順中庸差別境上未能了知生苦

樂捨是名為觸

七受領納前境好惡等事從  
識至受名現在五果

從五六歲至十三歲因六塵觸六根即領  
納前境於三受違順中庸境上已能了別  
然未能起淫貪之心故名受也

八愛愛色男女金  
銀錢物等事

從十四五歲至十八九歲貪於種種勝妙  
資具及媮欲等境然猶未能廣遍追求不  
名為取皆是愛支所攝

九取凡見一切境皆生取着心此二  
未來因皆屬煩惱如過去無明

即從二十歲已後貪欲轉盛於五塵境四方馳求名之爲取

十有業已成就是未來因屬業道如過去行

體即是業爲馳求諸境起善惡業積集牽引當生三有果故名爲有注云是未來因

者雖屬現在却爲未來苦果之因也

十一生未來受生事

從有還受後世五衆之身是名生所謂四生六道中受生也

十二老死

從生五衆之身熟壞是名老死

此是所滅之境

以能滅之觀順推此境故此十二即所滅境也不立病支者妙立二十云問何不說病爲支答一切時一切處盡有者立支自

世七

十一

有人從生無病如薄拘羅生來不識頭痛

况餘病是故不立問憂悲是支否答非也

以終顯始耳如老死必憂悲文釋籤三三

云問愛取何別答愛增廣名取文然上一

往似論三世在支佛逆順兩緣百千萬世

觀因緣等

與前四諦開合之異耳云何開合謂無明行

愛取有此之五支合爲集諦餘七支爲苦諦

也

止觀二十云總說名四諦別說名十二因

緣苦是識名色六入觸受生老死七支集

是無明行愛取有五支道是對治因緣方

便滅是無明滅乃至老死滅文輔行一下

十云離苦集爲十二支觀因緣智以爲道

諦十二支滅以爲滅諦文文句七廿云十

二因緣者還是別相細觀四諦耳約苦集  
即有無明老死約道滅即有無明滅乃至  
老死滅也文

既名異義同何故重說為機宜不同故緣覺  
之人先觀集諦所謂無明緣行行緣識乃至  
生緣老死此則生起若滅觀者無明滅則行  
滅乃至生滅則老死滅因觀十二因緣覺真  
諦理故言緣覺

聲聞總觀四諦緣覺別觀十二因緣緣覺  
之人等者此觀十二因緣生若滅觀者等  
此觀十二因緣滅諸文更有順逆等異如  
阿含明始無明終老死名順觀始老死終  
無明名逆觀又止觀禪境以有支在初推  
因知果也釋籤先從受支起觀此推果知  
因也此知輔行又曰念處約十二支觀  
愛觀見明推尋觀破之義也文 因

觀十二等以觀因緣生滅覺悟真空而結  
名也

言獨覺者出無佛世獨宿孤峯觀物變易自  
覺無生故名獨覺

觀外因緣無師自悟未必一向獨宿孤峯

如國王花飛劍動等

如釋籤七  
廿一云

兩名不同行位無別此人斷三界見思與聲  
聞同更侵習氣故居聲聞上

雖緣覺獨覺之異而同修因緣之行同證  
侵習之果習氣者慣習氣分如器中香其

香雖盡餘氣尚存統論諸文有三家二即  
今是見思家習耳大經云我衣我鉢見習  
也舍利弗嗔畢陵伽慢思習也

次明菩薩位者

菩薩具云菩提薩埵摩訶薩埵舊翻大道

心衆生亦大道成衆生新譯云覺有情以

上求佛道下化衆生故此菩薩於當教內

亦稱大乘然此菩薩全不斷惑三祇百劫

伏惑行因四教義三六云三藏正化二乘

傍化菩薩若說菩薩斷惑受生二乘即疑

世七

十三

若結盡而得受生者諸聲聞人得羅漢果

將不更受生耶是故不說菩薩斷結受生

也文又妙立五三十云今生事善故作是說

欲求佛者改惡從善文又四教義二三云雖

修性念處而不斷結爲生三界度衆生故

文由教不詮中道應本故留結感受生利

物故三藏菩薩不斷惑明矣此乃立權則有若大

論云聲聞人言菩薩不斷結使乃至坐道

場然後斷者是爲大錯又云豈有菩薩具

足三毒能集佛法文此蓋龍樹申通摩訶

衍義以大破小故作此說當彼鹿苑稟教

之時雖謂實歷三祇百劫伏惑不斷若方

等般若轉入行中來至法華會歸一實定

無始終三祇伏惑故得大論約實斥權此

斥權若釋迦果後權示利生不妨自歷三

祇百劫故有尸棄然燈等事今之所辨且

順立權義邊故約鹿苑三藏明不斷惑如

法華文句六廿七引阿含五佛子釋更與作

字名之爲兒四果支佛名佛真子菩薩不

斷惑子義未成文妙樂七七十云阿含至于

義未成者疊躡既阿含中亦明不斷惑菩

薩而六論斥權非謂全無此會同經論明

婆沙明不斷惑菩薩而阿含亦明此對婆

沙而云亦也以阿舍會同婆沙而判大論

則知大論斥權云無非論云迦旃延造者

從所造論及所計者說此由上文阿舍婆

沙明不斷惑菩薩

則經論相符而大論斥之者蓋斥其執權  
之人耳故曰論云迦旃延造者從所造論  
及所計者說即出其斥權之意蓋從其所  
造論及所計故大論謂是迦旃延造是則  
大論斥其計論 豈以會二還歸阿舍法華  
執權之非也

準舊十二年前一何可笑此由他師不分大小菩薩之殊

及味水牛白牛之異謂法華會二乘歸菩薩  
薩故此破云豈可會二乘斷惑之人還歸

阿舍不斷惑菩薩若以會二乘還歸阿舍  
法華四十餘年之後開顯之教還復準舊

十二年阿舍之 止觀十六云煩惱脂消  
教故云一何可笑

者名伏為消也故別行三云但伏惑不斷

如無脂肥羊取世智為般若即此意也又

俱舍婆沙意云下八地惑初修禪時先已

斷竟此有漏斷亦是伏義如輔行三下然會釋云云

不斷見思還斷塵沙否答須知三祇百劫

亦但伏而不斷故至樹王下斷見思時於

塵沙法上證四真諦方斷塵沙也若止觀

三十六云得法眼照俗諦文得相似法眼有

漏智照耳

從初發心緣四諦境發四弘願修六度行

生滅四諦為所依境弘者太也要制其心

志求滿足名為誓願度者越生死流到彼

岸也誓若無境名為狂願不行六度其願

則虛又此化他四門徧學異乎二乘一門

自行又二乘雖無破戒乃至愚癡行非利

生不名六度蓋奪而言之別對諦緣三祇

百劫名四階成道

一未度者令度即眾生無邊誓願度此緣苦十五

諦境二未解者令解即煩惱無數誓願斷此世七

緣集諦境三未安者令安即法門無量誓願

學此緣道諦境四未得涅槃者令得涅槃即

佛道無上誓願成此緣滅諦境

四教義三云一未度者令度即是度天魔初

外道愛見二種六道衆生未度三界火宅之苦諦令得度也二未解者令解即是愛見二種衆生未解愛見二十五有業令得解也三未安者令安即是愛見二種衆生未安三十七品一切諸道令安道諦也四未得涅槃者令得涅槃即是愛見二種衆生未滅二十五有生死因果皆令得滅諦涅槃也

既已發心須行行填願於三阿僧祇劫修六度行百劫種相好言三阿無僧祇數劫特者

觀音玄記上七云若匪行山莫填願海文

輔行三下初云阿僧祇此翻無數劫翻時

俱舍云八十中大劫謂一增一減爲一小劫今此一增一減亦名中劫如大劫三無

數謂六十數中第五十二數名阿僧祇謂

積此大劫成無數時故云三阿僧祇文俱

舍問云既積無數何復言三答非無數言

顯不可數文諸經更有拂石劫芥子劫具

如輔行一上六若大乘亦有一百二十零

三數如華嚴

且約釋迦修菩薩道時論分限者從古釋迦

至尸棄佛值七萬五千佛名初阿僧祇從此

常離女身及四惡趣常修六度然自不知當

作佛若望聲聞位即五停心總別念處凡

輔行六上三云彼婆沙中釋菩薩義明因

則指釋迦三祇百劫明果則指彌勒當成世七

何故爾耶釋迦果已成是故指因行爲令

慕果而行因故彌勒因已滿是故指當果

皆使觀因以知果故諸聖教並明釋迦

之因如說菩薩昔苦行等並明彌勒之果

如說彌勒下生經等文從古釋迦等者發

軫鈔云釋迦翻能仁牟尼翻寂然能仁是

姓寂然是字姓從慈悲利物字取智慧真

理以利物故不住涅槃以真理故不住生

死文尸棄此翻寶髻非七佛中第二尸棄

也緣載四教義三初并大論第三文從此

常離女身者妙立四七釋籤三五四教義

三二云第三僧祇始離五障一惡道二貧

形殘五方乃不墮如戒疏上三云初僧祇

得五種功德一生人二生貴家三舊云

初僧祇有過緣不遇緣異不遇違緣即離

五障如戒疏若遇違緣至第三祇方離如釋

又初僧祇離障且約功能三祇方離乃據

定位又文句二十云不生三惡道位不退

不生邊地諸根完具不受女身即行不退

世七

十七

常識宿命即念不退文妙樂二廿云第三

祇時橫得三不退故文成論以念處為位

不退煖頂為行不退忍為念不退數論以

下中上忍為三不退淨名疏以煖頂忍為

三不退各隨義對也然自不知作佛四教

義三二云爾時未發煖解位在外凡故不

自知已身當作佛不作佛

次從尸棄至然燈佛值七萬六千佛名第二

阿僧祇此時用七莖蓮華供養布髮掩泥得

受記薊號釋迦文爾時自知作佛口未能說

若望聲聞位即喚位

梵語提洹竭此云燃燈大論云太子生時

一切身邊光如燈故故云燃燈以至成佛

亦名燃燈文瑞應經翻為錠光七莖蓮華

等者初儒童為五百道士講論得銀錢五

百後問王家女名瞿夷買得五花并女寄  
二花供養於佛故云七莖諸文但云摩納  
五花奉散也如集解布髮掩泥稽首佛足  
見地濯濕即解皮衣欲以覆之不足掩泥  
乃解髮布地令佛蹈而過文得受記荊等  
瑞應經云佛因記曰汝自是後九十一劫  
劫號為賢汝當作佛號釋迦文菩薩已得  
訣言疑解望止爐然無想寂而入定便建  
清淨不起法忍文妙立七十一既云斷惑故  
知通佛行因之相也文釋籤八三云燃燈  
授記得無生忍故知是通佛行因也文發  
軫鈔據此判瑞應經屬方等攝若明降生  
之相蓋約三藏境本而言此時自知等者  
戒疏上三云爾時雖自知作佛而口不說  
準位在煖法性地既有證法之信必知作

佛修行六度心未分明口不向他說也文  
次從然燈佛至毗婆尸佛七萬七千佛名第  
三阿僧祇滿此時自知亦向人說必當作佛  
自他不疑若望聲聞位即頂位  
毘婆尸翻勝觀亦云徧見優婆塞戒經云  
於迦葉佛滿三僧祇者隨機異說耳此三  
祇等義並出大論俱舍婆沙此時自知等  
者戒疏上三云是時內心了了自知作佛  
口自發言準望位在頂法位中修行六度  
四諦解明如登山頂了見四方故曰向他  
說文觀音玄記下四云聲聞但於一境一  
門修念處等故易成就菩薩徧於一切境  
界一一四門復加六度久遠熏修使一一  
行攝諸衆生令種熟脫故三祇內凡化幾  
人超凡入聖自身此岸度人彼岸故經劫

長證位猶下 文

經如許時修六度竟更住百劫種相好因修百福成一相福義多途難可定判有云大千盲人治差為一福等

輔行三下三云過三祇已百劫種相種即

世七

十九

修也於欲界人中南洲男身佛出世時能種相業也前後不拘 文 百福成一相者四

教義三 二 云修行六度成百福德用百福

德成一相以為三十二相之業因也 文 福

義多途等者輔行三下 三 云問幾許為一

福乃至菩薩修十善各有五心謂下中上

上上上中上初發五心乃至具足五心如

是百心名為百福成於一相如是至三十

二名身清淨 文 觀音立下二云凡用三千

二百福修成三十二大人相現時方稱善

薩摩訶薩 文

修行六度各有滿時

六度滿文在種相後者蓋種相時亦修六度也

如尸毗王代鵠檀滿普明王捨國尸滿羸提

仙人為歌利王割截無恨忍滿大施太子抒

海并七日翹足讚弗沙佛進滿尚闍梨鵲巢

頂上禪滿劬嬪大臣分闍浮提七分息諍智

滿望初聲聞位是忍位

觀音立記下 三 云徧割身肉就鷹貿鵠至

盡一身不惱不沒自誓真實感身平復是

檀滿相 尸毘翻與檀翻為施 如須摩提王以身就死

持不妄戒是尸滿相 尸羅翻好善即戒善也 如忍辱

仙人被歌利王 善惡世無道 割截身體慈忍不

動作誓即感血化為乳是羸提滿相 羸提翻忍

辱如大施太子求如意珠雨寶濟貧得珠

隨海杼海取之杼音汝 酌取也筋骨斷壞終不解

廢諸天問之云吾生生不休故助杼海海

水減半龍恐海乾送珠與之是毘離耶滿

相尚閻黎螺髻仙人名也得第四禪出入息斷鳥

謂為木於髻生卵定起欲行恐鳥母不來

即更入禪鳥飛方起是禪滿相劬嬪大臣

分閻浮提七分城邑山川均故息諍是般

若滿相所言滿者度本治蔽行期滿願今

蔽已離與拔遂心即知六度其功尅滿文

七日翹足等者觀音立記下四云婆沙云

爾時有佛號曰底沙有二弟子一名釋迦

樂修利他行所化機先熟二名慈氏樂修

自利行所化機在後熟彼佛念曰多人就

一人難一人就多人則易欲令釋迦先成

道故於是捨二弟子入至山中時釋迦菩

薩隨後入山尋求本師不見踪跡正行之

次忽見彼佛在寶龕中入火界定威光赫

奕特異於常行次忘下一足經於七日說

於一偈歎彼世尊云天地此界多聞室逝

宮天處十方無丈夫牛王大沙門尋地山

林遍無等因此精進超於九劫在彌勒前

成佛文是下忍位者戒疏上三云若過三

僧祇種三十二相業準望此是下忍位文

大論云三阿僧祇時六波羅密者此乃事

禪事智滿耳俱舍云道樹已前四波羅密

滿至佛果位二波羅密滿此約緣理禪理

智始滿觀音立下三云問依三藏說釋迦

彌勒同時發心一超九劫何意二佛俱成

賢劫中佛耶答釋迦值弗沙促百劫彌勒

值諸佛何必不促為九十一劫耶文記下

四云彌勒值佛必有超劫恐梵文未至文

次入補處生兜率託胎出家降魔安坐  
不動為中忍位次一剎那入上忍位次一剎  
那入世第一位發真無漏三十四心頓斷見

思習氣坐木菩提樹下生草為座成劣應丈  
六身佛受梵王請三轉法輪度三根性住世  
八十年現老比丘相薪盡火滅入無餘涅槃  
者即三藏佛果也

補處者前佛既滅而此菩薩即補其處故

云補處文此下具八相一從兜率天下二

託胎三出生四出家五降魔六成道七轉

法輪八入涅槃然此八相通大小乘舊謂

大無降魔了魔即法界故小無住胎不談

常住故且華嚴中列降魔相豈小乘耶故

先達云成道必降魔托胎必住胎若開住

胎即合降魔在成道內若開降魔即合住

胎在託胎中但存沒不同耳若大小義約

真中分以華嚴中所列八相是大乘故但

小乘八相皆劣大乘八相難思若爾別相

亦難思耶以同詮中故證道同圓故今是

小乘八相也降魔者四教義三五云即於

菩提樹下破萬八千億鬼兵魔眾魔王敗

績鬼兵退散又安坐不動等四教義三五

云魔眾散已攝心端坐於第四禪住中忍

修觀成中忍其七一剎那上忍一剎那世第一

法一剎那文言剎那者止觀三六云經言

念六百生滅成論師云一念六十剎那

文俱舍云壯士一彈指六十五剎那文發

真無漏等輔行三下四引大論云下八地

諸惑因時未斷至樹王下時乃以九地九品思惑通名一九以九無礙九解脫合爲十八見道中八忍八智合爲十六心總前合成三十四心聲聞見思前後各斷支佛雖見思頓斷習猶未盡故皆不得論三十四心三藏菩薩至樹王下正習俱盡方得論也受梵王請正法念經云昔有國王有二夫人第一夫人生一千子試當來成佛次第釋迦探籌居第四第二夫人生二子第一子願作梵王請千兄轉法輪其次願爲密跡金剛護千兄教文梵王通爲一代請轉法輪主今別在小三轉法輪者淨名經云三轉法輪於大千其輪本來常清淨文輪者佛證四諦法有可轉之義故名爲輪又能壞煩惱名之爲輪三轉者一示轉

世七

三

謂此是苦等二勸轉謂此是苦汝應知等三證轉謂此是苦我已知不復更知乃至此是道我已修不復更修一一皆生眼智明覺三轉則成十二行法輪如文句及記釋化城喻品云度三根性文句七十二云爲聲聞三轉爲緣覺再轉爲菩薩一轉何故爾由根利鈍此一往說耳通云例皆三轉何故三轉諸佛語法法至於三爲衆生有三根故文住世八十年文句上廿一云世壽下方少天上方太老中方不少不老表常又中方表中道佛樂中道爲此義故方八十年也文老比丘妙樂一二十四云老比丘者從後異故文薪盡火滅者佛身名薪智慧名火身滅智亡名無餘涅槃也大乘則

云機薪既盡應火云云

上來所釋三人修行證果雖則不同然同斷見思同出三界同證偏真只行三百由旬入化城耳畧明藏教竟

妙玄一五云三因大異三果小同文釋籤

一十五云諦緣度殊故因大異俱斷見思三

乘微異故果小同文偏真望大說故三百

由旬文句七廿六約三義明一約生死處以

三界果報處為三百二約煩惱謂見思三

約觀智謂空觀由旬即踰躑那此云限量

如此方之驛大論云由旬三別大者八十

里中者六十里下者四十里文

天台四教儀集註卷第七

天台四教儀集註卷第七

世八

南天竺沙門

蒙闇

集

次明通教者

四教義一二云此教明因緣即空無生四

真諦理是摩訶衍之初門也遠通常正為

菩薩傍通二乘世八故諸大乘方等及諸般

若有二乘得道者為同稟此教也通問何

故不名共教答共名但得二乘近邊不得

遠邊若立通名近遠俱便言遠便者通別

通圓也

通前藏教通後別圓故名通教

此望前望後獨就菩薩釋通教名釋籤九

二云通近同三藏通遠如別教四念處二

初有三通義一因果俱通通當教是二因

通而果非通即被接者是三通別通圓即

藉通開導人是謂別圓用通而為方便但

成別圓因果人也此三通義唯在菩薩今

文通後別圓者下文釋出雖但被接意亦

該於藉通開導也

又從當教得名謂三人同以無言說道體色

入空故名通教

此通就三乘釋通教名若三藏諦緣度三

法分三乘今通教三乘同觀無生四諦同

體假入空觀十二因緣同觀六波羅密見

第一義而分三乘之別者但總相別相等

智斷結侵習自行化他根性不同耳言說

是是事即空故無輔行六上六云通人既


觀諸法如幻幻本不生今無所滅名之為

體文謂體六凡依正之色如幻如化當體

即空而入真理也


# 依大品經乾慧等十地即是此教位次也

## 當三教乘共位




此是三乘共位若明三借等義者一三乘  
 共借別教始終位次二單借別教十地亦  
 三乘共三別為菩薩借別一教又別為菩  
 薩立忍名別明菩薩焦炷十地大品更說  
 十地菩薩為如佛併圖于后


### 菩薩借別一教



### 三乘單借十地



### 三乘共借一教





別明菩薩焦炷十地妙玄四三十云別圓  
 各逗一種根性故用發真為初圓初地  
 通教為逗多種根性所謂別圓入通故含  
 容取乾慧耳大品明初地焦炷大論明三  
 所焦喻惑三處者過別圓也三教合若鈍  
 容通說故曰別圓入通非被接義  
 根者八人見地是初燄利者於乾慧即能  
 斷結即是初燄且乾慧初燄三通言之  
 是何根性須知論釋焦炷雖通三教乾慧  
 初燄自是一途不必三通收也以通教機  
 雜故又乾慧初燄何位伏惑倒如單借十

地如輔行或云利根即伏即斷大品更說  
 十地菩薩為如佛輔行明通二種如佛以  
 釋大品一別為菩薩立忍名第十亦名菩  
 薩地對共佛地故云如也又被接人至十  
 地破無明能八相作佛似通佛教故云如  
 也釋籤亦明圓教觀行如佛相似如佛但  
 非今通教所論  
 一乾慧地未有理水故得其名即外凡位與  
 藏教五停心總別等三位齊  
 三乘之初同名乾慧用體法念處等觀雖  
 未得煥法相世侶理水而總相智慧深利故  
 稱乾慧也  
 二性地相似得法性水伏見思惑即內凡位  
 與藏教四善根齊  
 性地中無生方便解慧善巧轉勝於前得

相似無漏性水故言性地也

三八人地四見地此二位入無間三昧斷三界八十八使見盡發真無漏見真諦理與藏教初果齊

三乘信法二行體見假以發真斷惑在無

間三昧中八忍具足智少一分故名八人

即八忍也位也三乘同見第一義無生四諦之

理同斷見或八十八使盡也無間三昧等

者止觀六六云若言三地者據斷見初言

四地者據斷見後皆不出觀文輔行六上

七云通雖二地斷時仍促二乘共故雖促

復長是故須分三地四地

五薄地斷欲界九品思前六品與藏教二果

齊

體愛假即真發六品無碍斷欲界六品證

世六

五

第六解脫欲界煩惱輕薄也

六離欲地斷欲界九品思盡與藏教三果齊體愛假即真斷欲界五下分結盡離欲界

煩惱也

七已辨地斷三界見思惑盡但斷正使不能

侵習如燒木成炭與藏教四果齊聲聞位齊

此

三乘之人體色無色愛即真斷五上分結

七十二品盡也斷三界事惑究竟故言已

辨地文燒木成炭四教義三二十引智論云

聲聞智慧力弱如小火燒木雖然猶有炭

在聲聞位齊此者輔行六上七云通教二

乘七地已前與菩薩共名共聲聞若爾八

地已上過二乘地何故亦名共菩薩耶答

以初名後從立本名不同別圓始終別故

八辟支佛地更侵習氣如燒炭成灰

緣覺發真無漏功德力大故能侵除習氣

也燒炭成灰者四教義三二十引大論云緣

覺智慧力勝如大火燒木木然炭盡餘有

灰在

九菩薩地正使斷盡與二乘同扶習潤生道

觀雙流遊戲神通淨佛國土

從空入假道觀雙流深觀二諦進斷習氣

色心無知得法眼道種智遊戲神通淨佛

國土成就衆生學佛十力四無所畏斷習

氣將盡也扶習潤生者輔行五下廿云大

品云留餘殘習以誓願力及扶餘習而生

三界利樂有情文此教亦無中道應本以

誓扶習而生三界道觀雙流者道謂化道

觀謂空觀帶空出假故曰雙流遊戲神通

世八

六

者遊諸世間譬如兒戲亦如幻師種種變

現神名天心通名慧性天然之慧徹照無

碍淨佛國土者一切諸行無非菩薩淨土

之行如以布施攝衆生菩薩成佛時布施

衆生來生其國等是也

十佛地機緣若熟以一念相應慧頓斷殘習

坐七寶菩提樹下以天若爲座現帶劣勝應

身成佛爲三乘根性轉無生四諦法輪緣盡

入滅正習俱除如炭灰俱盡

上釋諸位具如妙玄四八廿過菩薩地則入

佛地用誓扶餘習生閻浮提八相成道五

相同三藏唯六成道樹下得一念相應慧

與無生四諦理相應斷一切煩惱習盡具

足力無畏等名之爲佛頓斷殘習者觀音

玄記下五云前斷正使今侵二習至于佛

地見思習盡真諦究竟摩沙習盡俗諦究竟七寶天衣者表殊勝自然也現帶劣勝應者通佛亦是丈六之身或十里百億神通變現耳住空故劣住中故勝以通教有合身義故云帶劣勝應舊問別圓成道在初寂場鹿苑唯明三藏成佛今通教佛為何處成如法師云只一金剛土臺成道四機所見不同若寂場鹿苑自論大小兩始轉法輪處不可以難成道也然通教佛合明八相今但明成道等者以由此三稍異三藏前五不異故畧不論緣盡入滅者第八涅槃相妙玄四十三云雙樹入無餘涅槃薪盡火滅留舍利為一切人天福田也正習俱除兼前總舉炭灰俱盡四教義三十二云大論云諸佛智慧力大如劫燒火炭灰

俱盡  
 經云三獸度河謂象馬兔也論斷惑不同故又經云諸法實相三乘皆得亦不名佛即此教也  
 河喻空理菩薩正習俱盡如象得底支佛  
 侵習如馬次深聲聞斷正使如兔最淺如  
經又經云者文出華嚴彼云諸法實性相  
 三乘亦皆得而不名為佛幻有之俗名為  
 諸法即空之理名為實相乃真空實相也  
 菩薩至果名佛言不名佛者以中奪偏耳  
 彼經不共二乘那作此說如拾遺記云彼  
 部雖無小機稟教何妨說於三乘掬淺顯  
 圓佛乘文彼後分經明四乘品故斥三乘  
 非佛乘也  
 此教三乘因同果異證果雖異同斷見思同

出分段同證偏真

三因大同三果小異異則習盡不等同乃共觀即空不同三藏諦緣度別分段者支分形段三界生死也

然於菩薩中有二種謂利鈍

世八

八

此約接不接而分利鈍

鈍則但見偏空不見不空止成當教果頭佛行因雖殊果與藏教齊故言通前

修因克果果在於上故曰果頭通教菩薩

扶習潤生雖異藏教伏惑行因斷惑證理

不別故言通前結釋前文通前藏教也

若利根菩薩非但見空兼見不空不空即中

道分二種謂不但若見但中別教來接若

見不但中圓教來接故言通後

利根被接被字去聲如來被下之義此約

應說如云說圓中道被而覆之也若上聲

呼此就機論如云通教利根被別圓接接

即點示接入也然被接義散出諸經大品

八地聞中大經空不空一切法趣非漏非

無漏楞伽三種意生身大經三十六文末

一生二生等若具明者謂大經十二明四

諦後列八二諦章安作七二諦消之初一

是總餘七是別此於四正復論三接故名

七種二諦古來二十三家明乎二諦唯莊

嚴開善檀風流之名莊嚴謂佛果出二諦

外即今世八開善謂佛果不出二諦通當佛吾祖

曲盡如來逗機設化之相故名被接則於

諸經無所壅矣古明被接不出三義以含

中為發源點示為機要發習為根性以通

教巧故一真含二中利根菩薩纔證真空

即為點示如妙玄明別接通中寄三法以

示三根解源謂非漏非無漏空不空一切

法趣如釋籤三九十具釋然由利根發昔所

習方可點示若鈍根菩薩同二乘人直至

法華方乃被會非但見空等者止觀三六十

引大經云二乘之人但見於空不見不空

智者非但見空能見不空不空即大涅槃

又離邊名但即邊名不但

問何位受接進入何位答受接人三根不同

若上根三地四地被接中根之人五地六地

下根之人七地八地所接之教真似不同若

似位被接別十迴向圓十信位若真位受接

別初地圓

初住初問所接次問能接答中就被接機

發習遲速以論三根輔行以四地為上六

七為中八九為下今進一位者教位從容

文或進退故此答初問所接之教等者答

次問也所即語辭別向圓信按位接也別

地圓住勝進接也據上似位被接真位受

接應作被字蓋以能從所也輔行三下八

云若接入教道在回向中若接入證道即

在初地若接入圓亦分教證比說可知文

又別圓接通接聖不接賢接真不接俗若

圓接別接俗不接真接賢不接聖又妙玄

順能詮教約教道邊具明三接止觀為成

觀故從所詮理約證道邊唯明一接然圓

頓止觀亦明被接者為知通塞復以思議

顯不思議也如釋籤三七十

問此藏通二教同是三乘同斷四住止出三

界同證偏真同行三百由旬同入化城何故

分二答誠如所問然同而不同所證雖同大小巧拙永異此之二教是界內教藏是界內小拙不通於大故小析色入空故拙此教三人雖當教內有上中下異望通三人則一槩鈍根故須析破也通教則界內大巧大謂大乘初門故巧謂體色入空故雖當教中三人上中下異若望藏教則一槩為利

然藏通三乘斷惑出界證理雖同教行有異大小約小衍巧拙論體析對界外方便等土名界內教以此二教化界內也不通於大故小不能遠通常住故析色入空者外計鄰虛不出斷常今總觀色心生滅非斷非常對破外道汝析非正如止觀三六廿輔行下三廿通後別圓故是初門了知諸法如幻如化當體即空

世六

士

問教既大乘何故有二乘之人答朱雀門中何妨庶民出入故人雖有小教定是大大乘兼小漸引入實豈不巧哉般若方等部內共般若等即此教也畧明通教竟

天子南門謂之朱雀漸引入實明佛意也

釋籤四九十云不同三藏四阿含等別有部

帙今以諸部方等諸般若中但是三乘共

行即判屬通文今文通指般若方等下但

云共般若盖方等彈斥共義稍踈故

次明別教者此教明界外獨菩薩法教理智

斷行位因果別前二教別後圓教故名別也

涅槃云四諦因緣有無量相非聲聞緣覺所

知諸大乘經廣明菩薩歷劫修行行位次第

互不相攝此並別教之相也

四教義一三云別者不共之名也若名不

共但異藏通未異圖教故但名別此教明  
 因緣假名無量四聖諦理的化菩薩不涉  
 二乘別義畧明有八謂教理智斷等也教  
 則獨被菩薩理則隔歷三諦智則三智次  
 第斷則三惑前後行則五行差別位則位  
 不相收因則一因迥出果則一果不融釋  
一十五在因說理不在二邊故云迥獨被  
出復說果理諸位差別故云不融菩薩故別前隔歷次第故別後涅槃云等  
 乃聖行品明四種四諦中無量四諦即別  
 教義謂苦集滅道各各因緣皆有無量相  
 是菩薩法豈二乘所知乃以涅槃對鹿苑  
 說故云非聲聞等也此證別前藏通諸大  
 乘經等者釋籤四二指華嚴方等般若中  
 歷別行法即是其相然方等中多以別行  
 斥於小行般若中多以別法展轉融通華

實

三

嚴正當歷別之行文如別行玄下四別行  
 記下六既時長行遠次第隔歷此證別後  
 圓教  
 華嚴明十住十行十迴向為賢十地為聖妙  
 覺為佛纓絡明五十二位金光明但出十地  
 佛果勝天王明十地涅槃明五行如是諸經  
 增減不同者界外菩薩隨機利益豈得定說  
 此出諸大乘經行位次第之義華嚴前無  
 十信後無等覺於十住品前明十梵行自  
 古講者指為十信四念處三初於十住中  
 多明圓義於登地中多明別義文故華嚴  
 位義通圓別今且示別故云住行向為賢  
 十地妙覺為聖本業瓔珞亦明六輪如法  
 金光明指真諦所譯者勝天王即般若也  
 五行者聖梵天病嬰兒也又仁王般若明

五十一位但無等覺然上諸經隨機明位  
雖增減不同莫非次第故屬別也

然位次周足莫過纓絡經故今依彼畧明菩薩歷位斷證之相以五十二位東為七科謂信住行向地等妙又合七為二初凡二聖就

世六

世三

凡又二信為外凡住行向為內凡亦名為賢約聖亦二十地等覺為因妙覺為果大分如此自下細釋

瓔珞凡聖位足故今依彼以明別義然凡聖位中有教證二道此本出乎地論今家借用有二義焉一者玄文借證權實部二者輔行借消別門良由地論兩種教道皆為方便兩種證道皆為真實義同部味昔權今實是故借用若輔行借消別教教證者由今別教教權證實既與三教一向不

同其義難曉而地論師教道方便證道真實名義宛同故借用之如輔行云是故今家借用地論教證二道以消別門於中先須知於二意一者約行地前為教登地為證二者約說為地前說始終屬教乃至結云若讀玄文善須曉此教證二道則別門可消應知地論雖有四種玄文借用證權實部但成二意輔行借用但成三義何者以由此教行分教證說唯教道是則能詮之教始終是權所被之機地前屬權初地證實舊於借消別門亦立四種者且約說證道為權為實若權則違教權證實借證權實之義若實則背有教無人之文況地論正申華嚴十地論師不分圓別之異但約教證明方便真實如云若說十地已證

之法彼為實證安可約彼立別說證既云

借證可全同耶又別位中復有豎入橫學

兩種四教釋籤十七云別教十住修生無

生十行修於無量十向修於無作登地證

於無作故云有四又十行中習諸佛法具

足入於一世八十六門亦名為四問住已習八

何故行中更習十六答前是自行隨用一

門後為化他是故行中更習前八是故十

六俱須廣習文更有三根出假十信上根

十住中根十行下根四款俱論三根

又對五忍十信伏忍十住信忍十行去柔

順忍十地無生忍妙覺寂滅忍妙宗中十

若論真緣二修則地前為緣修登地為八亦對圓

真修緣謂作意緣念真謂任運相應元是

地師之義今家復加觀義空假為緣中道

為真通圓亦有此之二義云云六種性習如

下對初言十信者四教義四三云此十通

名信心者信以順從為義若聞說別教因

緣假名無量四諦佛性之理常住三寶隨

順不疑名信心也文

一信二念三精進四慧五定六不退七迴向

八護法九戒十願

信常住理名曰信心憶念無忘名曰念心

真精進趣名精進心心精智慧名曰慧心

周徧湛寂名曰定心定光無退名不退心

保持不失常護法心世八回向佛地名迴向心

今文回向在護法前安住無失名為戒心

十方隨願名曰願心此依楞嚴釋十

此十位伏三界見思煩惱故名伏忍位外與

藏教七賢位通教乾慧性地齊凡

妙玄四三二此十信習從假入空觀伏愛

見論文觀音玄下四云十信通伏諸惑正

伏四住文伏忍位輔行九下五云仁王用

五忍以判別位文妙宗中八云若依別教

十信伏忍仁王經疏中一云未得無漏未

能證但能伏不能斷故為伏忍智也與藏

通齊者格量伏惑義齊也下去格此位出

假即名上根淨名疏七云菩薩化物心

重自行則輕故慈悲重者不務斷結從相

似空解即便出假見思未斷故言有疾文

次明十住者

四教義四五云此十通名住者會理之心

名之為住

一發心住斷三界見惑盡與藏教二治地三

修行四生貴五具足方便六正心七不退已

六住斷三界思惑盡得  
位不退與藏通二佛齊

於諸劫中行十信心不作邪見廣求智慧

名發心住常隨空心淨諸法門名治地住

長養衆行名修行住生在佛家種性清淨

名生貴住多習無量善根名具足方便住

成就第六般若法門名正心住入於無生

畢竟空界名不退住得位不退者初住至

七住位不退八住至十向行不退初地已

上念不退妙玄四一見思破故得位不退

真諦三昧成惡業塵沙破故得行不退俗

諦三昧成無明破故得念不退中道三昧

成文

八童真九法王子十灌頂已上三住斷界內

前二不  
知名目


不生邪倒破菩提心名童真住從佛王教

而生於解當紹佛位名法王子住觀空無相得無生心法水灌頂名灌頂住斷界內塵沙等者正修假觀為伏觀成俗顯為斷輔行一下九云塵沙者譬無知數多文然塵沙惑只是通別見思就所化衆生得名妙宗上六廿云衆生見思重數如塵若沙究論其體即劣慧也如妙樂云不染汚無知劣慧為體以其不能分別藥病等也若知病識藥應病授藥令得服行即斷塵沙相也懶於化導為塵沙習且三品塵沙與三根出假何異蓋三品塵沙約一人豎論三根出假約三人橫辨又三根出假通乎四教三品塵沙局在別論亦名習種性用從假入空觀見真諦理開慧眼成一切智行三百由旬

世八

七

習種性者纓絡經上卷賢字明六種性以對別位淨名既第九亦借別名以顯圓今家玄籤四教義戒疏等並依經列四念處中少有不次又地持論畧明二種亦名經彌勒達賢字並如戒疏列六種後復用二種及對教證前後生報佛法佛併圖示



六種性者種別性分也地持第一云種性

者名為種子名為界名為性文種子不同有六界分

又性通六位種局在因故前四名中等覺

雖因望前稱覺二種者地持經云畧說二

種性種性者是菩薩六入殊勝展轉相續

無始法爾是名性種性習種性者若從先

來修善所得是名習種性文戒疏以六種

對位後復用二種者以六位不出地前修

習登地證性故用地持結攝六種雖不顯

標意必如是况梵網是華嚴結經地持正

宗華嚴故宜用彼地持二種結攝瓔珞六

種又與約行教證其義宛齊故復例之自

古以戒疏文難今準舊註戒疏云性習二

種若據位分習種在前性種在後若據行

論性習同時前後不定標約行依體起用

緣中道理起觀行用先明性種後明習種尋用取體

世八

從自行用取中道體先習後性自依體下釋與教證

二道相似就位以論教道在前證道在後

約行教證據行論之教證同時前後不定此依

體起用先證後教望證道理尋用取體先

教後證尋教道用習種能生報佛性種能

生法佛文地前既論自行修習至果合生

冥任運起用故不論應佛也異解備諸章梵網經中更有六

種一習種性二長養性只是研習增長與

三性種性四不可壞性俗諸建立故不可

行五道種性向六正法性通叔聖種

信佳習種性

十行道種性前示釋籤依總對位證文並問今四念處扶

十向性種性大品三觀約義結對故少不同信住同習空

十地聖種性觀成切智對習種十行修假觀成道種

等覺性智故對道種十向觀中道性成切種智故

妙覺性對性種由道性三字義通兩向道有化導

四念處

從假入空觀者次第三觀出纓絡經觀經  
 疏三云假是虛妄俗諦也空是審實真諦  
 也今欲去俗歸真故言從假入空觀妙宗  
 上六云見思取境無而為有虛假凡俗知  
 虛名諦二空之理是審實法知實名諦不  
 究俗虛莫知真實要須照假方得入空是  
 故名曰從假入空觀妙玄三十一云十住正  
 修空傍修假中十行正修假傍修中淨名  
 畧記下之上五若約別教為語正觀中道  
 為慧眼者於十住中遠所期耳慧眼者古  
 德頌云天眼通非礙肉眼礙非通法眼唯  
 觀俗慧眼了知空佛眼如千日照異體還  
 同一切智者觀音玄義下初云知一切內  
 法內名一切能知能解一切外法外名能  
 知能解但不能用一切道起一切種故名

一切智玄記下具釋初住斷見即離四趣  
 身子昔生至六住有退者此見思俱斷思  
 既未盡見亦餘殘故有退墮如四明答曰  
 本難教行錄  
 次明十行者

四教義四六云此十通名行者行以進趣  
 為義前既發真悟理從此加修從空入假  
 觀無量四諦

一歡喜二饒益三無違逆四無屈撓五無癡  
 亂六善現七無着八難得九善法十真實斷

外塵  
 沙感

始入法空不為邪動名歡喜行常化衆生  
 使得法利名饒益行常修忍法謙下恭敬  
 名無違逆行大精進令一切至究竟涅  
 槃名無屈撓行不為無明之所失亂名無

癡亂行生生常在佛國中生名善現行於  
我我所一切皆空名無着行菩薩成就難  
得善根名難得行說法授人成物執則名  
善法行二諦非如亦非非相名真實行

亦云性種性用從空入假觀見俗諦開法眼

成道種智

性種性者假觀分別十界差別種性也從  
空入假觀者觀經疏<sup>三</sup>云若住於空與二  
乘何異不成佛法不益衆生是故觀空不  
住於空而入於假知病識藥應病授藥令  
得服行故名從空入假觀<sup>文</sup>道種智者觀  
音玄下<sup>初</sup>云能知一切道種差別則分別  
假名無謬故名道種智<sup>文</sup>諸文云十住修  
空斷見思十行修假破塵沙十向修中伏  
無明此以觀對位也若云初住斷見二住

至七住斷思八九十住斷界內塵沙十行  
斷界外塵沙此斷惑分齊也四念處四云  
十住斷界外上品塵沙十行斷中品塵沙  
十向斷下品塵沙<sup>文</sup>言三品者生無生八  
中品無作<sup>四</sup>此以惑從教也以別是界外  
門為下品

教或純用假觀攝故又此十行明橫學四  
且無作四門為圓為但若圓無作十行位  
淺尚未修中如何能說以此化他耶若謂  
但中釋籤五<sup>初</sup>云各附彼教而為相狀<sup>文</sup>  
既附彼圓豈應是但雜編五<sup>四</sup>云十向圓  
修可由實道<sup>文</sup>乃修圓中<sup>智轉行融</sup>十行無作且順權  
方<sup>只是但</sup>良以修中之位已深出假之位  
尚淺位深故知昔日化他無非妙行位淺  
故知將來自行亦是但中不可以實難權  
以他妨自<sup>文</sup>其說切當學者知之附彼圓

教但為明於無作相狀能附豈可全同深位然此出假若果但中圓機起時何以赴之當知圓機自感圓應十行出假乃教道說無稽之問不足評矣

次明十回向者

四教義四七云此十通名回向者回事向理回因向果回已功德普施衆生事理和融順入法界故名回向四念處三十一云別向圓修文雪川云可由實道雜編但不台云只緣該接方曰此據得意者智轉行融及證道說也

若三觀次第惟修但中據不得意者及教道說也

一救護衆生離衆生相二不壞三等一切諸佛四至一切處五無盡功德藏六入一切平等善根七等隨順一切衆生八真如相九無

縛無著解脫十八法界無量伏無明習中觀

以無想心常行六道而入果報不受而受名救護衆生離衆生相觀一切法有受有用念念不住名為不壞三世佛法一切時行名等一切諸佛以大願力入一切佛土供養一切佛名至一切處以常住法授與前人名無盡功德藏行無漏善善而不二名入一切平等善根以觀善惡無二一相名等隨順一切衆生心得自在等三世佛常照有無名真如相以般若照三世諸法世三是一合相名無縛無著解脫覺一切法中道無相名入法界無量伏無明習中觀者集解云空假之心既已滿足正修中道第一義觀無明不起悉伏故也文亦明道種性行四百由旬居方便有餘土上巳

二十七位為三賢亦名內凡  
從八住至此為行不退位

道種性者始正修中故名道能生佛果故名種行四百由旬必約生死處加方便土約煩惱加塵沙約觀智加假觀以此增前為四百也方便有餘土者觀經疏五云修方便道斷四住惑故曰方便無明未盡故曰有餘行不退者化他行滿無退轉也前七住還斷惑證空名位不退後初地去名念不退中道正念二邊莫動

次明十地者

四教義四八云此十通言地者一能生成佛智住持不動二能與無緣大悲荷負一切故名為地也文

一歡喜從此用中道觀破一分無明顯一此分三德乃至等覺俱名聖種性此是見道位又無功用位百界作佛八相成道三三

利益衆生行五百由旬初入實報無障闍土初入寶所

捨凡入聖四魔不動到有無邊平等雙照名歡喜地從此用中道觀者四教義四七云從此見佛性發中道第一義諦觀雙照

二諦心心寂滅自然流入薩婆若海證無作四諦一實平等法界圓融文破一分無明顯一分三德者無明乃是障中道之別惑無明分破中道分顯法身般若解脫是為三常樂我淨故稱德應知初地所破無明細分三品中上雖破猶在回向後心至三品盡方入初地俱名聖種性者據同證論準經必須開等覺性見道位者四教義四七云從初地至佛地皆斷無明但以約位分為三道初地名見諦道二地至六地

名修道從七地已去名無學道文初地斷  
 無明別見發真中道故云見道大經云自  
 此已前皆名邪見人也故知兩教三乘別  
 教地前未見中道未斷別見皆名邪見人  
 也此約證道同圓初地即同初住故也又  
 無功用者既至初地不加功力任運流入  
 薩婆若海百界作佛者四教義四八云初  
 發真中道見佛性理斷無明見惑顯真應  
 二身緣感即應百佛世界現十法界身入  
 三世佛智地能自利利他真實大慶故名  
 歡喜地也文輔行七下廿四引瓔珞云如初  
 地百界二地千界乃至萬億等界現身亦  
 爾文行五百由旬者約生死處加實報土  
 約煩惱加無明約觀智加中觀實報無障  
 礙土者觀經疏六云行真實法感得勝報

雙

舌

色心不相妨故言無障礙文寶所者喻分  
 證寂光也

天台四教儀集註卷第七

音釋

擅視戰切 編卑綿切 霄丈洽切  
專也 連也 新切

天台四教儀集註卷第八

世九

南天竺沙門 蒙潤 集

二離垢地三發光地四破慧地五難勝地六現前地七遠行地八不動地九善慧地十法

雲地已上九地地地各斷一品無明證一分中道

世九

以正無相入衆生界同於虛空名離垢地光慧信忍習佛之道極淨明生名發光地順無生忍觀一切法名破慧地順忍修道三界無明莫不皆空名難勝地上順諸法觀於三世寂滅無二名現前地觀諸煩惱不有不無常向上地念念寂滅名遠行地以無生觀捨於三界名不動地入於上觀光光佛化無生忍道名善慧地入中道觀受佛職位既同真如亦等法界妙雲普覆名法雲地

更斷一品無明入等覺位亦名金剛心亦名一生補處亦名有上士

於十地後心用觀更斷一品方入等覺四教義四四云即是邊際智滿入重立門若望法雲名之為佛望妙覺名金剛心菩薩亦名無垢地菩薩三魔已盡餘有一品死魔在斷無明習也文集解云解入百千三昧照一相無相寂滅無為望于妙覺猶有一等比下名覺故名等覺所修觀智純一堅利喻若金剛名金剛心文一生補處者猶有一品無明故有一生過此一生即補妙覺之處觀音玄記上四云猶儲君之義也文妙宗上三云有感可斷名有上士文更破一品無明入妙覺位坐蓮華藏世界七寶菩提樹下大寶華王座現圓滿報身為鈍

根菩薩眾轉無量四諦法輪即此佛也

四教義四十五云金剛後心朗然大覺妙智

窮源無明習盡名真解脫翛然無累寂而

常照名妙覺地文藏者包含十方法界悉

在中也文七寶菩提樹者七寶眾多表無

量故大寶華王座者妙玄三十一云或言寂

滅道場七寶華為座身稱華臺千葉上一

一菩薩復有百億菩薩如是則有千百億

菩薩十方放白毫及分身光白毫入華臺

菩薩頂分身光入華葉菩薩頂此名受法

王職位窮得諸佛法底而得成佛華臺名

報佛華葉上名應佛報應但是相關而已

不得相即此是別佛果成相也文鈍根菩

薩者迷中重故次第修證達通寶所對圓

名鈍

有經論說七地已前名有功用道八地已上  
名無功用道妙覺位但破一品無明者總是  
約教道說

華嚴云菩薩未至第八地時如人乘船欲

渡大海未至大海多用功力若至八地從

大方便近佛智慧無功用心不加功力妙

覺位但破一品無明未審據何文說諸文

但云斷十二品稱為妙覺也

有處說初地斷見從二地至六地斷思與羅

漢齊者此乃借別教位名名通教位耳

至六地斷思與羅漢齊者取十度義以第

六般若空慧斷惑故也如止觀第六借位

中云十度者六度外加願智力方便

有云三賢十聖住果報唯佛一人居淨土此

借別教名明圓教位也

三賢者別住行向住果報上義則屬圓此

仁王經偈文

如此流類甚衆須細知當教斷證之位至何  
位斷何惑證何理徃判諸教諸位無不通達

此乃觀師示人判教之方能知此者不但

別門可通於一切教皆無壅矣

略明別教竟

此教明縱橫者別論不出性橫修縱因縱

果橫通論因果各具縱橫性但有橫修具

縱橫初性橫修縱者妙句九云若但性德

三如來是橫修德三如來是縱前後而得先法

次報後應亦是縱一性記九云性德之名

名通別教別教雖有性德之語三皆在性

而不互融故成別義若三在修前後而得

道理成縱又妙宗云別人不知本覺之性

具染惡德是故染惡非二佛性別修緣了

顯本法身縱修亦為不知本覺之性具染惡

德不能全性起染惡修乃成理體橫具三

法性次因縱果橫者光明記一云行智理

三次第資發修時縱也法報應三果中齊

顯證時橫也良由此教本有法身為惑所

覆故須別作緣了之功相資顯發復由此

教性具三法而不相收故使三身橫顯此

指修縱只是因縱性橫成於果橫修性因

果相對別論也次因果各有縱橫者文句

二云別家因時世九三法縱橫果時四三法亦縱


橫因縱如向因橫即性橫也果縱如妙玄

九云法身本有般若修成解脫始滿果橫

亦如向說須知此教因果三法次第即縱

各異即橫妙玄五云資成在前觀照居次

真性在後此三豎別縱非大乘此三並異  
橫非大乘次性但有橫修具縱橫者性橫  
如上性中三法未論起修無前後故則無  
縱義凡言修者通因通果因果既具各有  
縱橫修任運有也



次明圓教者

四教義一 三云圓以不偏為義此教明不  
思議因緣二諦中道事理具足不別但化  
最上利根之人故名圓教也 文 又云圓教  
詮因緣即中道不思議佛性涅槃之理善

世九

五

薩稟此教門理雖非淺非深而證者不無  
淺深之位今明入道亦具四門而諸大乘  
經意多用非空非有門以明位也 文 釋籤  
五十二云圓教菩薩以界外滅諦為初門 文  
圓名圓妙圓滿圓足圓頓故名圓教也 此釋  
三諦圓融不可思議名圓妙三相即無有  
缺減名圓滿圓見事理一念具足名圓足  
體非漸成故名圓頓  
所謂圓伏圓信圓斷圓行圓位圓自在莊嚴  
圓建立眾生 此釋  
圓伏五位圓常正信圓斷五位圓行一行  
一切行圓位位位相攝妙用華嚴故云自  
在四悉普益故云建立如止觀一 三  
諸大乘經論說佛境界不共三乘位次總屬  
此教也

一代教中唯除鹿苑顯露無圓諸大乘經  
凡說圓法皆佛境界也不共三乘位次者  
揀異別教不共二乘今圓是佛乘故不共  
三乘也

法華中開示悟入四字對圓教住行向地此  
四十位華嚴云初發心時便成正覺所有慧  
身不由他悟清淨妙法身湛然應一切此明  
圓四十二位維摩經云蘆薈林中不嗅餘香  
入此室者唯聞諸佛功德之香又云入不二  
法門般若明最上乘涅槃明一心五行又經  
云有人入大海浴已用一切諸河之水又娑  
伽羅龍澍車軸雨唯大海能受餘地不堪又  
擣萬種香爲丸若燒一塵具足衆氣如是等  
類並屬圓教

開示悟入如前釋初發心者三因性開發

世

六

即初住位二住已去莫不皆然故結云圓  
四十二位蘆薈等者蘆薈翻黃花觀衆生  
品天女訶身子之文淨名空室表常寂光  
入不二法門者彼經三十一菩薩各說入  
不二法門已問文殊師利何等是菩薩入  
不二法門文殊曰如我意者於一切法無  
言無說無示無識離諸問答是爲入不二  
法門於是文殊問維摩詰我等各自說已  
仁者當說何等是菩薩入不二法門時維  
摩詰默然無言文殊歎曰善哉善哉乃至  
無有文字語言是真入不二法門文須知  
三十一菩薩乃以有言言於無言文殊乃  
以無言言於無言淨名乃以無言無言故  
文殊歎云是真入不二法門也般若明最  
上乘者金剛經云如來爲發最上乘者說

涅槃云復有一行是如來行所謂大乘大  
般涅槃佛性之理又經云者大經云譬如  
有人在大海浴當知是人已用一切諸河  
之水輔行一上七廿云理具諸法如海水修  
觀行者如在浴也行攝一切名為已用文

娑伽羅此翻鹹海如來龍王圓頓教雨為  
上根性不雨三教下類之地首楞嚴云擣  
萬種香為丸若燒一塵具足眾氣文輔行  
一上七廿云理性如丸觀行如燒諸法頓發  
各具眾氣文

今且依法華瓔珞略明位次有八一五品第  
十位外凡出二十信位內三十住位聖四十  
行五十迴向六十地七等覺是因八妙覺是果  
位

法華但有五品六根瓔珞具明五十二位

妙樂一一四云若云圓位六即亦足何須  
更列四十二耶以分真位長故借別位分  
其品秩文或者據此謂圓教本無位次但  
借別顯圓然妙樂意以五十二位在經論  
中多被別人祖師用釋圓位故云借耳又

有云五十二位名雖在別圓亦同用以分  
淺深豈可圓教全無位次大品四十二字  
華嚴初住八相法華五品六根皆圓位義  
也故曰顯一理則始終無二存諸教則因  
果歷然既稟教修行安得無位耶又揀諸

文開合有四一開前合後如大經三十三  
天住行向為三十二合前開後如仁王十  
四般若合三十三心為三十地為十等覺為  
三前後俱開如大品四十二字對四十四  
前後俱合如法華開示悟入及遊四方對

十妙宗上<sup>三</sup>又楞嚴明位有六十前加三

漸次<sup>名</sup>及立乾慧地<sup>觀</sup>向後地前立

四加行并常五十二位共成六十

初五品位者一隨喜品經云若聞是經而不

毀訾起隨喜心問隨喜何法答妙法妙法者

即是心也妙心體具如如意珠<sup>世</sup>心佛及衆生

是三無差別此心即空即假即中

文句說隨順事理無二無別喜是慶已慶

人<sup>文</sup>妙樂<sup>十</sup>云事理祇是權實異名了

此權實即非權實故無二無別即隨順開

權顯實之事理也言已人者理有事故故

能慶人事有理故故能自慶又不二而二

故慶已他二而不二了非已他妙玄五<sup>二</sup>

云若人宿植深厚或植善知識或從經卷

圓聞妙理謂一法一切法<sup>假</sup>一切法一法

空非一非一切<sup>中</sup>不可思議起圓信解一

心中具十法界如一微塵有大千經卷欲

開此心而修圓行圓行者一行一切行謂

十法成乘十心成就其心念念悉與諸波

羅密相應是名圓教初隨喜品位<sup>文</sup>妙法

即是心者指要鈔上<sup>四</sup>云經家釋經題法

字約此三法各具三千互具互融方名妙

法然雖諸法彼彼各具若為觀體必須的

指心法三千起信論云所言法者謂衆生

心妙心體具者止觀五<sup>三</sup>云一心具十法

界一法界<sup>世</sup>又具十法界十法界具百法界<sup>九</sup>

一界具三十種世間百法界即具三千種

世間此三千法在一念心若無心而已介

爾有心三千具足亦不言一心在前一切

法在後亦不言一切法在前一心在後輔

行五中<sup>七</sup>云言無心而已者顯心不無言  
 介爾者謂刹那心無間相續未曾斷絕纔  
 一刹那三千具足若具三千即具三德又  
 介爾者介者弱也謂細念也但異無心三  
 千具足<sup>文</sup>如如意珠止觀五<sup>七</sup>云如如意  
 珠天上勝寶狀如芥粟有大功能淨妙五  
 欲七寶琳琅非內畜非外入不謀前後不  
 擇多少不作拘妙稱意豐儉降兩穰穰不  
 添不盡蓋是色法尚能如此況心神靈妙  
 寧不具一切法耶<sup>文</sup>記中表法約理解釋  
 須者尋之心佛衆生三無差別者釋籤二  
 云當知三法即是不思議廣大法界應了  
 此理具足佛法及衆生法雖復具足心性  
 冥妙不一不多又衆生及佛不出於心故  
 無差別名心法妙是故結歸三無差別方

名為妙十義書云以我一念心法及一切  
 衆生十方諸佛各各論於事造人人說於  
 理具而皆互具互攝方名三無差別又指  
 要云是則三法各具二造方無差別此心  
 即空假中拾遺記下八云三觀之首皆言  
 即者指一念心即三諦故言即空者非即  
 偏空乃觀一念即圓空也此空能破三諦  
 相著故云一空一切空<sup>三觀悉影破相之用也</sup>言即  
 假者非即偏假乃觀一念即妙假也此假  
 能立三諦之法故云一假一切假<sup>三觀悉影立法</sup>  
 也<sup>世九</sup>言即中者非即但中蓋指一念即具  
 德中此中能妙三諦之法故云一中一切  
 中<sup>三觀悉是絕待之體也</sup>  
 常境無相常智無緣  
 此境智冥一

無緣而緣無非三觀無相而相三諦宛然

而言境智也止觀第一常境常智後復云

以無緣智緣無相境以無相境相無緣智

智境冥一而言境智輔行釋云實相無相

無相亦無實智無緣無緣亦絕何者境雖

無相常為智緣智雖無緣常為境發智雖

緣境稱境無相境雖發智令智無緣無緣

而緣照境無間故云以無緣智緣無相境

無相而相發智宛然故云以無相境相無

緣智

初心知此慶已慶人故名隨喜

此結成隨喜也五品初心知此妙心體具

事理三千境觀之法慶已有智慧慶人有

慈悲

內以三觀觀三諦境

世九

十一

大意云三諦三觀三非三三一三無所

寄諦觀各別體復同是故能所二非二

外以五悔勤加精進助成理解

止觀七云唯法華別約六時五悔重作方

便光約四種三昧相對而說不可修懺要

旨云所以悉稱悔者蓋皆能滅罪故也勸

請則滅波旬請佛入滅之罪隨喜則滅嫉

他修善之愆回向則滅倒求三界之心發

願則滅修行退志之過文輔行二上八云

於法無染曰精念念趣求曰進文助成理

解一往分之五悔為事名助諦觀為理解

各正

言五悔者有二一理二事

止觀二云事懺懺苦道業道理懺懺煩惱

道理事不出三種懺法理謂無生妙懺事


謂取相作法光明文句三四云行者應知三種懺法無生是主二爲助緣灰汁皂角助於清水若缺妙觀不名大乘便同外道無益苦行須近善師學懺悔處及懺悔法方可行於道場事儀故於諸事皆用妙觀照而導之使作法等皆順實理悉爲佛因又云正助二懺修逐根緣自有一向修於正道直登圓住或內外凡自有一向修於助道如南嶽立有相安樂行不入三昧但誦持故亦能得見上妙色像此二隨根修入不同若悟理時必兩捨也自有正助相兼而修或先正後助或先助後正或同時而修今之所立意在同修耳懺悔名光明文句中初云懺者首也悔者伏也不逆伏順從爲首又懺名白法悔名黑法白法

世九

十二

須尚黑法須捨又懺名修來悔名改往又懺名披陳衆失悔名斷相續心又懺者名慚悔者名愧慚則慚天愧則愧人文光明記三七云然懺悔二字乃雙舉二音梵語懺摩華言悔過以由悔過是首伏等五種之義今既華梵二音並列是故大師以首釋懺以伏釋悔乃至慚愧對釋懺悔欲令稟者修首伏行及慚愧等斯是善巧說法之相故不可以華梵詰訓而爲責也文懺悔處光明文句引普賢觀是名大懺悔約中道爲處也名莊嚴懺悔約俗爲處也名無罪相懺悔約空爲處也若三種差別者此是歷別論處爾即一而三即三而一此圓妙懺悔也記云若於三諦歷別而解乃次第觀非今妙觀其妙觀者空即三諦假





理懺者若欲懺悔者端坐念實相衆罪如霜  
露慧日能消除即此義也

光明記三八 云端坐者身儀也禪波羅密  
具出坐法須者宜檢念實相者懺罪觀也  
實相無相當云何念必以無念之念念無  
相之相以無相之相相無念之念若於念  
外別有實相實相之外別有於念則非此  
經念實相也衆罪等者滅罪所以也前念  
實相蓋體修惡即是性惡性惡照明斯為  
慧日修惡體虛如消霜露文

言事懺者晝夜六時三業清淨對於尊像披  
陳過罪無始已來至于今身凡所造作殺父  
殺母殺阿羅漢破和合僧出佛身血邪淫偷  
盜妄言綺語兩舌惡口貪瞋癡等如是五逆  
十惡及餘一切隨意發露更不覆藏畢故不  
造新

造新

晝夜六時等四句明首伏法無始下明首  
伏辭殺父下明五逆罪音試下殺於上也妙  
樂八引俱舍云五並業障攝約處人除此  
約人除扇搆此云黃門勅佳反四身一語業三殺  
一虛誑一殺生加行出佛血無間一劫熟隨  
罪增苦增八比丘分二破僧以為所破僧具  
如補注釋九五 光明文句中三 云人從父  
母稟身十月懷抱三年鞠養撫念惟惟始  
能升頭戴髮教方教數始解作人那忽違

恩背義而行弑逆天雖大不覆此人地雖

厚不載此人此人命終直入地獄文十惡

中應明殺生釋十惡名如法界次第上九

云云口有四惡或云五者加無義語發露者

要旨四云罪根宜露則眾罪皆滅文若不

發露犯覆藏罪如律中說畢故不造新者

斷相續心也已作之罪願乞消除未起之

惡更不敢造

若如是則外障漸除內觀增明如順流舟更

加櫂棹豈不速疾到於所止修圓行者亦復

如是正觀圓理事行相助豈不速至妙覺彼

岸

若如是等者光明文句中云若純用正懺

亦不須助若正道暗昧不明了者修助以

助之所謂灰汁澡豆皂莢木槌以助清水

爾文如順流舟等者光明文句記三二七云

正解如順水正觀如順風可喻正道能趣

妙理篙棹可喻旋禮等善助於風水舟豈

不疾文

莫見此說便謂漸行謂圓頓無如是行謬之

甚矣

此斥偏執理性無修無證者謂即心是佛

若別修習則成漸次非圓頓行輔行七下

八云圓教位次者先明五悔為入位之方

他人圓修都無此意將何以為造行之始

但云一念即是如來空談舉心十六無非法界

委檢心行全無毫微文

何處天然彌勒自然釋迦

輔行一下二十引彌勒問經云彌勒昔行

菩薩道時但晝夜六時勤修五悔而得菩

提文彌勒釋迦既是果人由因克故非天然等也唯今天台建立解行了修即性全性起修正助兼行從因至果故清涼國師云撮台衡三觀之玄趣使教合忘言之旨心同諸佛之心不假更看他面

若纔聞生死即涅槃煩惱即菩提即心是佛不動便到不加修習便成正覺者十方世界盡是淨土觸向對面無非覺者

舉其所執之法須知理雖平等事有迷悟何得便謂即是不加修習凡言即者以顯於離如水不離水理須融水義同於離十方世界盡是淨土此是依報論即觸向對面無非覺者此是正報論即謂三土皆即寂光九界無非佛界理實如然非修莫克故即云

世九

七

今雖然即佛此是理即

妙宗上三十云然理即佛貶之極也以其全

乏解行證即但有理性自爾即也文

亦是素法身無其莊嚴何關修證者也

無緣了功德莊嚴法身體素天龍之所忍

劣

我等愚輩纔聞即空便廢修行不知即之所

由鼠啣鳥空廣在經論尋之思之

重斥所計鼠啣鳥空者止觀八七云諸位

全無謬謂即是猶如鼠啣若言空空如空

鳥空文輔行八上十一云不達諦理謬說即

名何異恠鼠作啣啣聲即聲無旨濫擬生

死即是涅槃亦如恠鳥作空空聲豈得濫

同重空三昧文此斥執理廢行之者所謂

即之所由意開妙解而立妙行行可廢乎

二勸請者勸請十方諸如來留身久住濟舍  
識

輔行七下九云大爲二意一者請住於世  
二者請轉法輪大論五問諸佛之法法應  
說法何須勸請又若諸佛現見在前請佛  
可爾今乃不見云何可請答佛雖必說而  
不待請請者得福何得不請復次佛法待  
請爲說又衆生雖不面見諸佛諸佛何嘗  
不見其心聞其所請假令諸佛不聞不見  
請亦得福何況聞見而無益耶

三隨喜者隨喜稱讚諸善根

輔行七下二云佛轉法輪衆生得三益我  
助彼喜者喜前勸請也過去下種現在重  
聞得成熟益未曾下種現在成種未來方  
益故三世益皆因法輪故我隨喜衆生得

世九

十八

益要旨云隨他修善喜他得成文

四迴向者所有稱讚善盡迴向菩提

止觀七十三云回衆善向菩提一切賢聖功

德廣大我今隨喜福亦廣大衆生無善我

以善施衆生已正向菩提如回聲入角

響聞則遠回向爲大利文 輔行七下一云

如回聲入角等者大論三十二云回向者

如少物上王如回聲入角問菩薩功德勝

於二乘有何奇特答今此不以功德比之

但以隨喜回向心比如巧匠指示倍得價

直執斧之人倍用功力直不足言聲聞自

行如執斧者菩薩教他而行回向猶如大

匠文要旨六云所謂回事向理回自向他

回因向果文

五發願者若無發心萬事不成故須發心以

導前四是為五悔

止觀七<sup>十三</sup>云願者誓也如許人物若不分

券物則不定施衆生善若不要心或恐退

悔加之以誓又無誓願如牛無御不知所

趣願來持行將至所在如坯得火堪可盛

物二乘生盡故不須願菩薩生<sup>十九</sup>生化物須

總願別願四弘是總願法藏華嚴所說一

一善行陀羅尼皆有別願一切諸願四弘

攝盡故名為總故知一切菩薩凡見諸佛

無不發於總願別願

下去諸位直至等覺總用五悔更不再出例

此可知

光明文句中<sup>四</sup>云當知懺悔位長其義極

廣云何而言止齊凡夫是故五十校計經

齊至等覺皆令懺悔即其義也<sup>文</sup> 記三<sup>十三</sup>

云從造無間業者上至圓教等覺故云位

長位位橫論各有三障煩惱頭數結業流

類苦報等差故云義廣古人何為但在凡

夫大師本以三昧總持說懺悔位該一切

凡聖自然與校計經合實匪尋經作此安

布行者知之<sup>文</sup>

二讀誦品者經云何況讀誦受持之者謂內

以圓觀更加讀誦如膏助火

止觀七<sup>十三</sup>云善言妙義與心相會如膏助

火是時心觀益明名第二品也讀誦如膏

圓觀如火文句八<sup>五</sup>看文為讀不忘為誦

信心故受念力故持<sup>文</sup>

三說法品者經云若有受持讀誦為他人說

內解轉勝導利前人化功歸己心倍勝前

文句八五宣傳為說聖人經書難解須解

釋文 妙玄五三 云行者內觀轉強外資又著圓解在懷誓願熏動更加說法如實演布說法開導是前人得道全因緣化功歸已十心則三倍轉明是名第三品位文止觀七三十廿云更加說法轉其內解導利前人以曠濟故化功歸已釋籤五云故知以說法力內熏自智令倍清淨為說圓常內心無著故名為淨化功歸已意在於斯問南嶽天台皆云為他損已及止觀中令修三術誠勿領徒又輔行七下廿云早領眾者名成損已益他蓋微其如玄文止觀及今說法品皆云說法開導化功歸已耶須知以慈忍無著之心說法則可如云三軌備足方可宣通如四安樂行方許說法否則不許若南嶽天台所云蓋寄自以誠他

也如妙樂一云今問弘經者為名利壅已為大悲益物自行暗於妙宗何殊無目而導衣座室誠思之自克問今五品位說法品中化功歸已彼止觀安忍中正於五品令修三術誠勿領徒何耶須知雖於品中令修三術意誠初心為他損已又品位雖說須守觀心若逐外有妨是亦須誠四兼行六度經云況復有人能持是經兼行布施等福德力故倍增觀心妙玄五三云上來前熟觀心未遑涉事今正觀稍明即傍兼利物能以少施與虛空法界等使一切法趣檀檀為法界餘五亦如是事相雖少運懷甚大此則理觀為正事行為傍故言兼行布施事福資理則十心彌盛是名第四品位文

五正行六度者經云若人讀誦為他人說復能持戒等謂自行化他事理具足觀心無悶轉勝於前不可比喩

妙玄五三行人圓觀稍熟理事欲融涉事

不妨理在理不隔事故具行六度若布施

時無二邊取著十法界依正一捨一切捨

財身及命無畏等施若持戒時性重譏嫌

等無差別五部重輕無所觸犯若行忍時

生法寂滅荷負安耐若行精進身心俱淨

無間無退若行禪時遊入諸禪靜散無妨

若修慧時權實二智究了通達乃至世智

治生產業皆與實相不相違背具足解釋


佛之知見而於正觀如火益薪此是第五

品位文釋籤第五六云事理不二方名正

行若取其意但用三戒事六度相皆以實


相融今不二無非法界即是其相無畏等施者論有三施謂資生無畏法捨於依正名施資生畧不言法故云等也文止觀七三十一云正修六度自行化他事理具足心觀無礙轉勝於前不可比喩名第五品也

文



四信五品對三慧文句十云初二聞慧位廣聞廣說是思慧位觀行想成是修慧位自淺之深成六根清淨十信位也又云前三人是聞慧位兼行六度是思慧位正

行六度是修慧位



妙樂十二云何故現在唯四信滅後立五  
品答其義既齊四五無別但是滅後加讀  
誦為第二品耳文

此五品位圓伏五住煩惱外凡位也與別十  
信位同

妙立五八云五品已圓解一實四諦其心  
念念與法界諸波羅密相應徧體無邪曲  
偏等倒圓伏枝客根本惑故名伏忍諸教  
初心無此氣分文又十紙云五品之位理  
雖未顯觀慧已圓具煩惱性能知如來祕

世九

二五

密之藏堪為世間作初依止文妙立五一

云五品六根為初依十住為二依十行十

回向為三依十地等覺為四依文釋籤六

三云四依位者以此四人並能化他故以

此位釋於因人功用文此約觀行成就五

品在十信前若普賢觀品信合說蓋赴機

異爾又吾祖位居五品而云獲旋總持者

然旋假入空約位豎論雖在六根七信已

前約觀橫辨不妨通於五品

次進六根清淨位即是十信初信斷見惑顯

真理與藏教初果通教八人見地別教初住

齊證位不退也次從二信至七信斷思惑盡

與藏通二佛別教七住齊三界苦集斷盡無

餘故仁王云十善菩薩發大心長別三界苦

輪海解曰十善者各具十善也若別十信即

伏而不斷故定屬圓信

妙玄五四云十信位者初以圓聞能起圓

信修於圓行善巧增益令此圓行五倍深

明因此圓行得入圓位以善修平等法界

即人信心乃至善修無著即入願心是名

十信位瓔珞云一信有十十信有百百法

為一切法之根本也是名圓教鐵輪十信

位即是六根清淨圓教似解煖頂忍世第

一法普賢觀明無生忍前有十種境界即

此位也文普賢釋地分身名四聖及六根清淨共為十種仁王

云者波斯匿王所說偈也十善者仁王疏

中九云十信善者有三品上品善鐵輪王

化一天下中品善粟散王下品善人中王

文妙樂十八云信信通皆具足十善非謂

專以人天不殺盜等用對十信即云長別

世九

二十四

三界苦輪當知須是斷惑十信文釋籤五

七云亦有人云六根清淨名為頓義十善

菩薩此是漸義今文所引十善菩薩以證

六根豈應引漸而證於頓故知二文俱頓

明矣但仁王經語其初後法華經意論其

中間人不見之徒生異見文

然圓人本期不斷見思塵沙意在入住斷無

明見佛性然譬如冶鐵搗垢先去非本所期

意在成器器未成時自然先落雖見先去其

人無一念欣心所以者何未遂所期故圓教

行人亦復如是雖非本所望自然先落

此明圓斷之義輔行六上九云從初已來

三諦圓修與次第義永不相關此論桶惑

任運斷處與次第齊文又七下四云五品

已能圓伏五住豈至此位別斷見思但是

圓修猶惑先斷猶如冶鐵猶垢先除文別

行玄記下六云圓譬冶鐵作器別喻燒金

作器冶謂鎔鑄淳朴頓融任運猶垢先落

燒謂鍛鍊物體猶堅持要猶塵先去然後

融金以除細垢圓觀頓窮法界無異先觀

二諦二惑任運先落別觀次第顯中有意

先觀二諦故使二惑先除文指要鈔下五

云圓人始終用絕待智頓亡諸法理果尚

亡惑何次第只由此智功力微著故成疎

親由疎親故惑落前後名迷厚薄智疎惑

厚智親惑薄轉轉明之此乃約智分惑也

文先達云修觀惑智一如功成惑落前後

永嘉大師云同除四住此處為齊若伏無明

三藏則劣即此位也解曰四住者只是見思

謂見為一名見一切處住地思惑分三一欲

愛住地欲界九品思二色愛住地色界四地

各九品思三無色愛住地無色界四地各九

品思此之四住三藏佛與六根清淨人同斷

故言同除四住也言若伏無明三藏則劣者

無明即界外障中道之別惑三藏教止論界

內通惑無明名字尚不能知況復伏斷故言

三藏則劣也

永嘉集云然三藏之佛望六根清淨位有

齊有劣同除四住此處為齊若伏無明三

藏則劣二乘可知此本是妙玄位妙中文

永嘉集中引用之耳昔傳唐末五代台教

湮沒因錢氏讀永嘉集至此不解問於韶

國師國師指為台教中語當問螺溪義寂

法師師奏海東盛行遂求於高麗由是觀

師賁教部來使始復興焉今稱永嘉蓋有

由矣釋籤六 四 云有齊有劣者惑盡處齊  
觀行聞教是則為劣亦以佛位格者為順  
教道故也 文

天台四教儀集註卷第八

世九

二天

音釋

詒 姑五切 訓故言也 砧 音礎 切 捩 右獲切 啣 子曼切

天台四教儀集註卷第九

世十

南天竺沙門 蒙潤 集

次從八信至十信斷界內外塵沙惑盡假觀現前見俗諦理開法眼成道種智行四百由旬與別教八九十住及行向位齊行不退也

雖約位斷證格量似齊圓別即離不可一混又此六根明下根出假功逾十向此是相似圓融三諦不同次第出假之位又五品明中根出假五品之初為上根亦約觀行論坐道場度衆生等又輔行五上云以

初住為真出假位

次入初住斷一品無明證一分三德謂解脫般若法身此之三德不縱不橫如世伊三點若天主三目現身百界八相成道廣濟羣生此明斷惑證理全體起用三德次第本法

身般若解脫今順初住緣了正三心開發而為次也言不縱不橫者異乎別教非縱即橫也釋籤六十二云雖二點在上不同點水之縱三德亦爾雖法身本有不同別教為惑所覆雖二點在下不同烈火之橫三德亦爾以釋籤中作雖字者誤妙宗引作以字者正二德修成不同別人理體具足而不相收如妙宗云三雖性具緣了是修二雖是修非適今有二若非修三法則橫二若非性三法則縱三點三目出大經哀歎品西方有新舊二伊舊伊如橫川走火點水之縱新伊如此方草書下字細畫相貫不縱不橫摩醯首羅有三目八臂八相者華嚴云或見入胎等皆云或者一一相中皆有八相故文華嚴經云初發心時便成正覺所有慧身不

由他悟清淨妙法身湛然應一切解曰初發  
 心者初住名也便成正覺者成八相佛也是  
 分證果即此教真因謂成妙覺謬之甚矣若  
 如是者二住已去諸位徒施若言重說者佛  
 有煩重之咎雖有位位各攝諸位之言又云  
 發心究竟二不別須知攝之所由細識不一  
 之旨龍女便成正覺諸聲聞人受當來成佛  
 記莖皆是此位成佛之相慧身即般若德了  
 因性開發妙法身即法身德正因性開發應  
 一切即解脫德即緣因性開發如此三身發  
 得本有故言不由他悟中觀現前開佛眼成  
 一切種智行五百由旬到寶所初居實報無  
 障闍土念不退位

此下引經釋出就斥他謬雖云各攝諸位  
 須知攝之所由者由理具故雖云發心究

竟不別細識不二之旨者旨在於即即具  
 之理雖爾淺深之事位那不分即故初後  
 不二六故初後不濫位位各攝諸位者如  
 大品初阿後茶中四十字初阿字門具四  
 十二字後茶字門亦然又如華嚴一地具  
 諸地功德大經云發心究竟二不別如是  
 二心前心難發心即初住究竟即妙覺龍  
 女成佛文從權說以證圓經成佛速疾若  
 實行不疾權行徒施權實義等理不徒然  
 如妙樂八卅五諸聲聞授刳國名號與物  
 結緣文發得本有者妙宗上廿三云今初住  
 所發三法皆性具故發則俱發從智證法  
 從法起應即非一時三身頓得故非前後  
 不縱不橫復見於此從始圓修一心三觀  
 今圓三智一心中得即以此智證得法身

智性即色三一體融名妙色身此身湛寂  
如鑒無情形對像生山毫靡間名應一切  
三身三德體離縱橫文中觀現前者既三  
因開發應三智圓明五眼洞照今但云佛  
眼種智者中必雙照三智具足四眼入佛  
眼同名爲佛眼輔行三上五云如河入海  
失本河名何以故肉天二眼有漏因緣慧  
法二眼習氣未盡故捨本位入佛眼中文  
次從二住至十住各斷一品無明增一分中  
道與別教十地齊次入初行斷一品無明與  
別教等覺齊次入二行與別教妙覺齊從三  
行已去別教之人尚不知名字何況伏斷以  
別教但破十二品無明故故以我家之真因  
爲汝家之極果只緣教彌權位彌高教彌實  
位彌下譬如邊方未靜借職則高定爵論勳

其位實下故權教雖稱妙覺但是實教中第  
二行也次從三行已去至十地各斷一品無  
明增一分中道即斷四十品惑也更破一品  
無明入等覺位此是一生補處

次從二住等者妙玄五五云即是十番進  
發無漏同見中道佛性第一義理以不住  
法從淺至深住佛三德及一切佛法故名  
十住位文次入初行等者妙玄五五云即  
是從十住後實相真明不可思議更十番  
智斷破十品無明一行一切行念念進趣  
流入平等法界海諸波羅蜜任運生長自  
行化他功德與虛空等故名十行位也文  
我家真因等者妙玄五十云若十地十品  
破無明圓家十住亦十品破無明設開十  
地爲三十品祇是圓家十住三十品齊若

與而為論圓家不開十住合取三十心為三十品與別家十地三十品等者則十地與圓家十回向齊若奪而為論別家佛地與圓家初行齊與而為論別家佛地與圓家初地齊故知別教權說判佛則高望實為言其佛猶下譬如邊方未靜授官則高定爵論勲置官則下別教權說雖高而猶圓家實說雖低而妙以我之因為汝之果文爵者封也爵有五等謂公侯伯子男勲者功也十向者妙立五六云即是十行之後無功用道不可思議真明念念開發一切法界願行理事自然和融回入平等法界海更證十番智斷破十品無明故名回向也十地位者即是無漏真明入無功用道猶如大地能生一切佛法荷負法界眾

華

五

生普入三世佛地又證十番智斷破十品無明故名十地位也文等覺者妙立五六云觀達無始無明源底邊際智滿畢竟清淨斷最後窮源微細無明登中道山頂與無明父母別是名有所斷者名有上士也文等覺位中正習俱斷如今文云更破一品無明并上妙立文斷正也淨名疏二四云無復餘習者圓教始從初住終至法雲圓斷諸見猶有習在等覺入重立門千萬億劫重修凡事見理分明習氣微薄事等微煙文此斷習也又淨名疏五云住等覺地餘有一品及習氣在文進破一品微細無明入妙覺位永別無明父母究竟登涅槃山頂諸法不生般若不生不生不生名大涅槃以虛空為座成清淨法身

居常寂光土即圓教佛相也

觀經疏三云究竟佛者道窮妙覺位極於  
茶故唯佛與佛乃能究盡諸法實相邊際  
智滿種覺頓圓無上士者名無所斷無上  
士者更無過者文妙宗上三云今此極  
位乃究竟具諸位功德故引法華唯我釋  
迦與一切佛乃能究盡諸法之權實相之  
實達無明底到諸法邊名邊際智不思議  
權智也今已究竟故名爲滿於種種法證  
本圓覺不思議實智也此覺極滿名爲頓  
圓復用第七無上士號顯智斷極有感可  
斷名有上士等覺位也無惑可斷名無上  
士即是妙覺斷德究竟名大涅槃云無明  
父母者楞伽經云弒無明父斷貪愛母文  
涅槃山頂喻更無過上也諸法是境般若

世

六

是智境智寂滅名大涅槃以虛空爲座者

義彰法身體徧也成清淨法身者指修即  
性增勝而說也若論教主亦名尊特亦名  
勝應妙立七三云或言道場以虛空爲座  
一成一切成毗盧遮那徧一切處舍那釋  
迦成亦徧一切處三佛具足無有缺減三  
佛相即無有一異法華八方一一方各四  
百萬億那由他國土安置釋迦悉是遮那  
普賢觀經云釋迦牟尼名毗盧遮那此即  
圓佛果成相也文文句一八云隱前三相  
唯示不可思議如虛空相即圓佛自覺覺  
他文妙樂一廿云若隱前三相從勝而說  
非謂太虛名爲圓佛文光明記一八云此  
教所說世間相常故一切法無非中道雖  
與別人同見尊特彼兼別修此皆性具故

龍女云微妙淨法身具相三十二欲彰全性，是故從勝特名法身。文常寂光土者，觀經疏。六云：常即法身寂即解脫光即般若。是三點不縱橫並別名，秘密藏諸佛如來所遊居處，真常究竟極為淨土。文

然圓教位次若不以六即判之，則多濫上聖，故須六即判位。七

六即位者，義蘊佛經名出智者如貧女寶藏力士額珠等在諸文所明，或顯法門高深，或明修觀位次。文備明圓位之後，後明六即欲越上慢自屈之過。輔行一下。卅三云：此六即義起自一家，深符圓旨，永無衆過。暗禪者多增上慢文字者，推功上人，並由不曉六而復即。文輔行一上。卅六云：即者廣雅云合也。若依此釋，仍似二物相合名。

即其理猶疎，今以義求體不二，故故名爲即。文妙宗上。卅三云：六種即名皆是事理體不二義。文

謂一切衆生皆有佛性，有佛無佛性相常住。又云一色一香無非中道等言，總是理即。

金錕云：言佛性者，佛是果人言一切衆生皆有果人之性。文觀經疏二云：斯理灼然，世間常住有佛不能益，無佛不能損，得之不爲高，失之不爲下，故言衆生即是佛理佛也。文妙宗上。卅五云：世間常住者，即十法界三十世間一一皆住真如法位，法位常故，世間亦常。文今云性相者，十如中舉初二也。性以據內，自分不改，相以據外，攬而可別。色香等者，輔行一上。卅二云：此色香等世人咸謂以爲無情，然亦共許色香中道。

無情佛性感耳驚心文 六塵中趣舉二種  
圓觀諸法無非中道故經云處第四明唯  
色唯聲唯香等義如觀經疏二 又涅槃經  
云一切皆衆生如佛如貧女舍寶衆物具  
存力士額珠圓明頓在如來藏經舉十喻  
幣帛裹黃金土模內像暗室餅盆井中七  
寶本自有之非適今也淨名云一切衆生  
皆如也寶篋云佛界衆生界一界無別界  
文 理即者妙宗上三云良由衆生性具染  
惡不可變異其性圓明名之爲佛性染性  
惡全體起作修染修惡更無別體全修是  
性故得迷事無非理佛即以此理起惑造  
業輪回生死而全不知事全是理長劫用  
理長劫不知不由不知便非理佛以全是  
故名理即佛以不知故非後五即然理即

佛貶之極也以其全乏解行證即但有理  
性自尔即也又理即佛非於事外指理爲  
佛蓋言三障理全是佛又復應知不名障  
即佛而名理即佛者欲障後五有修德是  
此之一位唯理性是也又障即佛其名猶  
通以後五人皆了三障即是佛故文  
次從善知識及從經卷聞見此言爲名字即  
止觀一二云理雖即是日用不知以未聞  
三諦全不識佛法如牛羊眼不解方隅或  
從知識或從經卷聞上所說一實菩提於  
名字中通達解了知一切法皆是佛法是  
爲名字即文 妙宗上六十云名字即佛者修  
德之始聞前理性能詮名也然有收簡收  
則耳歷法音不聞明昧異全不聞俱在此  
位簡則未得圓聞齊別內凡尚屬理即以

七方便未解妙名豈知即佛文

依教修行為觀行即五品位

止觀一三廿云但若聞名口說如蟲食木偶

得成字是蟲不知是字非字必須心觀明

了理慧相應所行如所言所言如所行是

名觀行文妙宗上七十云始自圓聞觀佛妙

境至識次位勤行五悔若未發品此等行

人皆屬名字故知名字其位甚長境觀相

資塵念靡間方能得入觀行位也文

相似解發為相似即十信

止觀一三廿云以其逾觀逾明逾止逾寂如

勤射隣的名相似觀慧文觀經疏二云相

似者二物相類如鑰似金若瓜比瓠猶火

先暖涉海初平文妙宗上十二云約四喻明

相似行人本覺寂照及雙相似而發成相

似位三種之覺此覺似真若鑰若瓜比金

比瓠此之二物喻始似本如將至火先覺

暖氣行欲近海預覩平相此之二事喻於

相似近乎分真前二約法論似後二約位

論似文

分破分見為分證即從初住至等覺

止觀一三廿云因相似觀力入銅輪位初破

無明見佛性開寶藏顯真如名發心住乃

至等覺無明微薄智慧轉著若人應以佛

身得度者即八相成道應以九法界身得

度者以普門示現文妙宗上十二云雖得相

侶尚屬緣修今則親證屬於真修分破無

明起信論中稱隨分覺寂照雙融本覺真

佛分分而顯從所顯說名為分真從能顯

言名為分證四十一位皆受此名文

智斷圓滿為究竟即位 妙覺

如前引觀經疏釋妙覺義

約修行位次從淺至深故名為六約所顯理體位不二故名為即是故深識六字不生上慢委明即字不生自屈可歸可依思之擇之略明圓教位竟

約修行位次等者止觀大意一云即故初後俱是六故初後不濫理同故即事異故六文六種即名既皆是事理體不二義是故六即皆具事理兩種三千故理同故即理造也事異故六事造也如義書云修善修惡事造三千六也理即迷逆是修惡性名字已去順性是修善性善性惡理造三千也即但即不妨六六處常即故得六而復即也

然依上四教修行時各有方便正修謂二十

華

十一

五方便十乘觀法若教教各明其文稍煩義意雖異名數不別故今總明可以意知

然前明四教釋經方軌正為開解若依解立行必須各明方便正修故所列方便則通四教但十乘且就圓論蓋立行以圓為

正也不明四種三昧常坐常行半行半坐非行非坐及十

境者陰煩病業魔禪見侵乘薩蓋錄大本綱要非止觀

意故不委也妙玄明入體之門四教四門

門門十乘若止觀十境境十乘惟明圓

行義例云若無十境乘則無體若無十法

名壞驢車文以陰等十為所觀境以不思

議境等為能觀觀故

言二十五方便者束為五科一具五緣二訶

五欲三棄五蓋四調五事五行五法

止觀四初方便名善巧善巧修行以微少

善根能令無量行成解發入菩薩位 文止

觀四 初 云圓教以假名五品觀行等位去

真猶遙名遠方便六根清淨相似隣真名

近方便 約內外 今就五品之前假名位中

復論遠近二十五法為遠方便十種境界

為近方便橫豎該羅十觀具足成觀行位

能發真似名近方便 文 輔行四上 初 具釋

又二十五法為通方便通四三昧故方等

夢王法華六時五悔為別方便四三昧中

別於一種三昧所用故束為五科者止觀

四 初 云夫道不孤運弘之在人人弘勝法

假緣進道所以須具五緣緣力既具當割

諸嗜欲嗜欲外屏當內淨其心其心若寂

當調試五事五事調已行於五法必至所

在乃至三科出大論一種出禪經 具五 一

世

三

是諸禪師立 文調 止觀云譬如陶師若欲  
 得器先擇良處 緣具 息餘際務 欲 治身內疾  
 棄調於泥輪 事調五 作而不廢 法行五 得此譬  
 意五如指掌若欲造修當尋止觀 云  
 初明五緣者  
 禪經云四緣雖具足開導由良師故用五  
 法為入道梯堯一缺則妨事 文 輔行四上  
 云大小兩乘以戒為本是故先明內禁雖  
 嚴必資衣食進修定慧須藉空閑處雖空  
 閑假絕緣務四緣雖具開導由師 文 止觀  
 大意 四 云一衣食具足離希望緣故二持  
 戒清淨離惡道因故三閑居靜處離憤鬧  
 事故四息諸緣務棄猥雜業故五須善知  
 識有諍疑地故 文  
 一持戒清淨如經中說依因此戒得生諸禪

定及滅苦智慧是故比丘應持淨戒有在家  
出家大小乘不同

法界次第上十二云戒以防止為義文戒疏

上初云梵音尸羅大論云秦言性善亦云

清涼以其能止破戒熱惱從能得名亦名

波羅提木十三又譯言保解脫又名淨命亦言

成就威儀文如經中說者遺教經也輔行

四上五云引證道定復以律儀而為根本

文在家戒者五戒八戒於五更加不坐高

廣床不着花鬘衣不往觀聽歌舞故名八

戒出家戒者比丘比丘尼沙彌沙彌尼式

義摩那此云學法女小乘沙彌十戒比丘二百

五十戒頌曰四重夷十三殘二不定三十

九十提四提尼尼一百眾學吉七滅諍摠

論二百五十戒若論五篇者夷四波羅夷姪盜殺妄

殘十三提三十尼薩耆九十尼四提吉舍尼吉吉

譯即一百眾學若論六聚更加偷蘭遮若云七聚

開吉羅為惡作惡說結罪齊五報劫齊六

三品不入正篇不定七滅諍篇聚不攝亦

屬吉羅報劫齊六者以六聚受報劫數與

等活等上六獄劫數相齊因果雜攝齊七

者以惡作惡說是吉聚之因并前五聚之

果故為七聚大乘即梵網十重四十八輕

凡有心者皆得受之更有大論十戒大經

十戒及五支戒通大小乘具如妙玄三釋

籤四廿止觀四三輔行四上六

二衣食具足

止觀四五十云衣以蔽形遮醜陋食以支命

填飢瘡身安道隆道隆則本立形命及道

賴此衣食此雖小緣能辦大事裸餒不安

道法焉在故須衣食具足也

足不游人間堪忍力成故二者如迦葉等集糞掃衣及但三衣不畜餘長三者多寒國土如來亦許三衣之外畜百一衆

具雪山大士絕形深澗不涉人間結草為席披鹿皮衣無受持說淨等事堪忍力成

不須溫厚不遊人間無煩支助此上人也

十二頭陀但畜三衣不多不少出聚入山披服齊整故立三衣此中士也多寒國土

聽百一助身要當說淨趣足供事無得多求多求辛苦守護又苦妨亂自行復擾檀

越少有所得即便知足下士也文輔行四

上十云十二頭陀等者此云抖擻一蘭若

二常乞食三糞掃衣四一坐食五節量食

六中後不飲漿七塚間八樹下坐九露坐

十常坐十一次第乞十二三衣今文以十

二頭陀中糞掃三衣合為中士言三衣者

但三衣也出聚落則著僧伽黎加二衣上

入大衆則著鬱多羅僧加五條上入山林

則唯著安陀會為慚愧故為多寒故許其

重著皆威儀整肅長物善根故云披服齊

整下根者此土多寒根性又薄大聖一許

三品通開故三衣外聽畜百一及許畜長

為下故云通開此依律說與今少異今取雪山為上品故若畜百一記

憶而已有云加法薩婆多云百一之物各

長物言記憶者於百一物心中但自記憶一種謂是我物有云加法者加法受持如

六物圖若畜長說淨則加法受持百一之外

定須說淨詞云大德一心念此是某手長衣未作淨為淨故施與大德糞掃

衣者南山云世人所棄無復堪用義同糞

掃體是賤物離自貪著不為王賊所貪常

得資身長道文三衣者一僧伽黎此云雜

碎衣條相多故從用則名入王宮聚落衣  
二爵多羅僧名中價衣從用名入眾衣三  
安陀會名下衣從用名院內行道雜作衣  
若云袈裟此云不正色染亦名壞色即戒  
本中三種染壞皆如法也一者青色二者  
黑色三者木蘭色如六物圖若據律文以  
糞掃衣及但三衣為上百一為中餘長為  
下今文以雪山大士披鹿皮衣為上故以  
糞掃衣但三衣為中畜百一及畜餘長為  
下上云不畜餘長應更云不畜百一下畜  
百一眾具亦應更云畜餘長也  
食亦有三一者上根大士深山絕世菜根草  
果隨得資身二常乞食三檀越送食僧中淨  
食

止觀四十六云一深山絕迹去遠人民但資

甘果美水一菜一果而已或餌松栢以續  
精氣如雪山甘香藕等如是食者上士也  
二阿蘭若處頭陀抖擻分衛自資七佛皆  
明乞食法方等般舟法華皆云乞食也路  
運若遠分衛勢妨若近人物相喧不遠不  
近乞食便易是中士也三既不能絕穀餌  
松栢不能頭陀乞食外護檀越送食供養  
亦可得受又僧中如法潔淨食亦可得受  
下士也文輔行四下初云分衛者此云乞  
食十住婆沙云乞食有十利云云僧中淨食  
仍為下根豈可安坐房中私營別味文  
三閑居靜處不作眾事名閑無憤鬧處名靜  
處有三例衣食可知

止觀四十七云若深山遠谷途路難險永絕  
人蹤誰相惱亂恣意禪觀是處最勝二頭

陀抖擻極近三里交往亦踈覺策煩惱是處為次三蘭若伽藍閑靜之寺獨處一房

不干事物正諦思惟是處為下

文

四息諸緣務息生活息人事息工巧技術等

止觀四十八云緣務妨禪由來甚矣蘭若比

丘去喧就靜云何營造緣務壞蘭若行非

所應也緣務有四一生活二人事三技能

四學問一生活緣務者經紀生方觸途紛

糾得一失一喪道亂心二人事者慶吊俯

仰低昂造聘此往彼來來往不絕三技能

者醫方卜筮泥木彩畫碁書呪術等是也

四學問者讀誦經論問答勝負等是也領

持記憶心勞志倦言論往復水濁珠昏何

暇更得修正觀耶此事尚捨況前三務

文

今云等等者等於學問也

世十

十七

五近善知識有三一外護善知識二同行善知識三教授善知識

止觀四十九云大外護者不揀白黑但能營

理所須如母養兒如虎啣子調和得所舊

行道入乃能為耳是名外護二同行者更

相策發不眠不散日有其新切磋琢磨同

心齊志如乘一舡互相敬重如視世尊是

名同行三教授者內外方便通塞妨障皆

能決了善巧說法示教利喜轉破人心於

諸方便自能決了可得獨行妨難未諳不

宜捨也

文

教授者輔行四下

六

云宜傳聖

言名之為教訓誨於我名之為授

文

通名

善知識者法華疏云聞名為知見形為識

是人益我菩提之道名善知識

文

第二訶五欲一訶色謂男女形貌端嚴修目

高眉丹脣皓齒及世間寶物玄黃朱紫種種妙色等

止觀四十二云五塵非欲而其中有味能生行人須欲之心故言五欲常能牽人入諸魔境雖具前緣攝心難立是故須訶乃至

此五過患者色如熱金丸執之則燒聲如塗毒鼓聞之必死香如愍龍氣嗅之則病味如沸蜜湯舌則爛如蜜塗刀舐之則傷觸如卧師子近之則嚙上代名僧詩云遠之易為士近之難為情香味類高志聲色喪軀齡文五中皆有依正二報

二訶聲謂絲竹環珮之聲及男女歌詠聲等絲竹者絲曰絃竹曰管具有八音金石絲竹匏土革木環珮者在指者為環佩謂佩帶並是飾女身者歌詠者止觀四廿云即

世

大

是嬌媚妖詞姪聲染語文輔行四下二十引

提波延那僊人聞舍脂語失通五百僊人

在雪山中住聞甄迦羅女歌聲失諸禪定

云云

三訶香謂男女身香及世間飲食香等

輔行四下三十云人謂着香少過今則不然

開結使門杜真正路百年持戒能一時壞

文

四訶味謂種種飲食肴膳美味等

輔行四下二十云以着味故當受洋銅灌口

以着味故墮不淨中又

五訶觸謂男女身分柔爽細滑寒時體溫熱

時體涼及諸好觸等

輔行四下三十云觸欲者生死之本繫縛之

緣何以故餘欲於四根各得其分惟此觸

欲徧滿身受生處廣故多生染着此着難捨若墮地獄還以身觸受苦萬端此觸名為大黑暗處文

第三棄五蓋謂貪欲嗔恚睡眠掉悔疑

止觀四廿云通稱蓋者蓋覆纏綿心神昏

世十

九

暗定慧不發故名為蓋前訶五欲乃是五根對現在五塵發五識今棄五蓋即是五識轉入意地追緣過去逆慮未來五塵等法為心內大障乃至貪欲蓋起追念昔時猶弊五欲思想計較心性悴感忘失正念等嗔恚蓋者追想是人惱我惱我親稱喚我怨三棄五蓋謂貪欲恨心熱氣猶忿怒相續等睡眠蓋者心神昏昏為睡六識染著氣猶相續為眠眠名增心教法烏暗沉塞密來覆人難可防衛等掉悔疑以甚掉

故起屬前蓋攝今覺觀等起徧緣諸法乍緣貪欲又想嗔恚蓋者追想是念不停卓卓無住乍起乍伏種種紛紜身無趣遊行口無益談笑是名為掉掉而無悔則不成蓋以其掉故心地思惟謹慎不節云何乃作無益之事實為可耻心中憂悔懊練繞心則成悔蓋疑蓋者此非見諦障理之疑乃是障定疑也疑有三種一疑自者謂我身底下必非道器是故疑身二疑師者此人身口不稱我懷何必能有深禪好慧師而事之將不悞我三疑法者所受之法何必中理三疑猶豫常在懷抱禪定不發設發永失此是疑蓋之相也若貪欲蓋重當用不淨觀棄之若嗔恚蓋多當念慈心滅除恚火若睡蓋多者當勤精進策勵身心

若掉散者應用數息若三疑在懷當作是念我身即是大富貴兒具足無上法身財寶煩惱所翳道眼未開要當修治終不放捨又無量劫來習因何定豈可自疑失時失利若疑師者我今無智上聖大人皆求其法不取其人若疑法者我法眼未開未別是非憑信而已佛法如海唯信能入文第四調五事謂調心不沉不浮調身不緩不急調息不澁不滑調眠不節不恣調食不飢不飽

止觀四廿九云土水不調不任爲器五事不善不得入禪眠食兩事就定外調之三事就入出住調之調食者增病增眠增煩惱等食則不應食也安身愈疾之物是所應食略而言之不飢不飽是食調相調眠

者眠是眼食不可苦節增於心數損失工夫復不可恣上訶蓋中一向除棄爲正八定障故此中在散心時從容四大故各有其意略而言之不節不恣是眠調相三事合調者三事相依不得相離初入定時調身令不寬不急調息令不澁不滑調心令不沉不浮調身入細住禪中隨不調處覺當檢校調使安隱若出定從細至拙備如次第禪門也文輔行四下廿三云故禪門中調身云夫坐者須先安處使久無妨若半跏以左壓右牽來近身使與左右脛齊若欲全跏更跏右以壓左寬衣帶周正身勿令坐時更有脫落手以左壓右重累相當置右腳上亦令近身當心安置挺動支節七八許度如按摩法勿曲勿聳正頭直項

令鼻對臍不偏邪不低昂身如矻石無得  
 騷動無寬急過是身調相調息者身既調  
 已次開口吐肖中氣自恣而出使身中百  
 脉處皆悉隨氣出次閉口鼻中納清氣如  
 是至三若息已調一度亦足次閉口唇齒  
 纔相拄舌向上齶閉眼纔令斷外光次簡  
 息風氣息若調者則易入定次調心者一  
 者調亂令不越逸二者調心令沉浮得所  
 若心沉時繫念鼻端若心浮時安心向下  
 云云

第五行五法一欲欲離世間一切妄想顛倒  
 欲得一切諸禪定智慧門故二精進堅持禁  
 戒棄於五蓋初中後夜行勤精進故三念念  
 世間欺誑可輕可賤禪定智慧可重可貴四  
 巧慧籌量世間樂禪定智慧樂得失輕重等

五一心念慧分明明見世間可患可惡善識  
 禪定智慧功德可尊可貴

止觀四卅云上二十法雖備若無樂欲希

慕身心苦策念想方便一心決志者止觀

無由現前若能欣習無厭曉夜匪懈念念

相續善得其意一心無異此人能進前路

一心譬舡舵巧慧如點頭三種如篙橈若

少一事則不安隱文

此二十五法為四教前方便故應須具足若

無此方便者世間禪定尚不可得豈況出世

妙理乎然前明教既漸頓不同方便亦異依

何教修行臨時審量耳

止觀四未云此二十五法通為一切禪慧

方便諸觀不同故方便亦轉譬如曲弄既

別調絃亦別文

次明十乘觀法亦四教名同義異今且明圓教餘教例此

大本十乘雖通四教但十法名同偏圓義異今揀偏明圓故云且明圓教輔行五上六云觀法非十對根有殊雖復根殊但是

一不思議觀觀不思議境乃至離愛不離境故又次位下三雖非觀法並由觀力相從名觀故名十觀又備此十令觀可成故名成觀亦名成乘前之四法用無前後通塞等三成就前四次位等三以判前七文

輔行七下七云故知前七正明車體及以具度後三只是乘之所涉若無所涉運義不成是故十法通名乘也文

一觀不思議境謂觀一念心具足無減三千性相百界千如即此之境即空即假即中更

草

垂

不前後廣大圓滿橫豎自在故法華經云其車高廣上根正觀此境

此初乘觀忘能所故從境受名又爲九乘本稱本修九方堪入位謂觀一念心等者即現前陰妄一剎那心稱性而觀具三千法不唯三科揀境明一念心正當於此揀思議心取不思議心也故妙樂一云揀境及心光句記一云須去思議取不思議方名揀心文即達陰境成不思議境也既云三千性相復云百界千如者以三千法約百界千如歷三世間而論也即此之境等者即境爲觀即空假中境觀不二三一互融更不前後亦不一時不縱不橫絕思絕議此境周徧故廣大無法不備故圓滿橫周十界豎徹三諦橫豎相即故云自在法

華車體其在是歟其車高廣文句五七云  
 假名車有高廣相譬如來知見深遠橫周  
 法界之邊際堅徹三諦之源底文上根等  
 者義例云上根之人即於境種而生於果  
 為中下根復論九乘大意云又此十法雖  
 俱圓常圓人復有三根不等上根惟一法  
 中根二或七下根方具十文然此不思議  
 境在止觀中具明三境一性德境觀一念  
 心具三千法二修德境推本具心離四性  
 計三化他境解離四性無妨四說蓋即性  
 德而為修德如輔行云其實但推本具理  
 心文當修德時而有化他之解非即說法  
 也如輔行云初心依理生解與起教後心  
 不同文雖分三境只在一心用觀推求正  
 在修德蓋末代行者離四句外無修觀處

華

語

今文云具足無減等即性德也即空假中  
 即性而修也如義書第二心具三千是假  
 此之三千假非法性自無明他自他共離  
 而造故空約此空假遮照不偏名為中道  
 又輔行釋修德云不得而得三諦宛然  
 不得者空觀遮情也而得者假觀照性  
 也遮照不偏中道在焉今缺明化他境者  
 修德離四性時而有無妨四說之解即化  
 他也  
 一真正發菩提心謂依妙境發無作四弘誓  
 願憫已憫他上求下化故經云又於其上張  
 設憶蓋  
 輔行五中十問應先起誓後觀妙境何故  
 境後方云發心答境前非不發心具如五  
 畧中意今發重為成觀故須緣理益他文

大意五云觀境不悟須加發心此人無始

已起弘誓今由觀境不契於理重須發誓

於靜心中思惟彼我顛痛自他無量劫來

沉迴生死縱發小志迷菩提心我今雖知

行猶未備故重發誓言等文張設憶蓋者

文句五廿七云譬四無量眾德之中慈悲最

高普覆一切也

三善巧安心止觀謂體前妙理常恒寂然名

為定寂而常照名為慧故經云安置丹枕枕

輔行五中七十云善以法性自安其心故云

安心文大意六云安心者先總次別所言

總者以法界為所安以寂照為能安若知

煩惱及以生死本性清淨名為寂本性

如空名之為照此煩惱生死復名法界即

此法界體用互顯體是所安之法界用是

能安之寂照所言別者雖復安之彌暗彌

散良由無始習性不同故今順性逐而安

之謂宜聽宜思宜寂宜照隨樂隨治隨第

一義何以故有因寂照而善根增長有不

增長有因寂照煩惑破壞或有不破見理

亦然或聞思而回轉或聞思相資未可卒

具細尋方曉文今文畧明總安心故云常

恒等也安置丹枕者文句五廿七云若車內

枕者休息身首譬一行三昧息一切智一

切行也丹即赤光譬無分別法也妙樂六

四云智首行身三昧如枕所息得理法理

而然赤光等者無他法間名無分別以光

譬智故云智光朱正紫間故以赤表無雜

之光南山注經音云西方無木枕皆以赤

皮內羞綿毛用倚卧也赤而且光文輔行  
七下七云若車內枕休息衆行即安心也  
四破法徧謂以三觀破三惑三觀一心無惑  
不破故經云其疾如風

大意七云衆教諸門大各有四乃至八萬

世十 三六

四千不同莫不並以無生爲首今且從初  
於無生門徧破諸惑復以無生度入餘門  
縱橫俱破令識體徧文輔行七上六云今  
一心具三破次第之三故云一心三觀破  
豎通塞三觀一心能破橫者彼橫三觀離  
屬三人並在初心故三不合一今以三只  
是一破彼分張之三故云三觀一心破橫  
通塞應知一心三觀與三觀一心言互理  
同爲破橫豎翻對而說文八正道中行速  
疾到薩婆若故其疾如風

五識通塞謂苦集十二因緣六蔽塵沙無明  
爲塞道滅滅因緣智六度一心三觀爲通若  
通須護有塞須破於通起塞能破如所破節  
節檢校名識通塞經云安置丹枕車外

大意七云雖知生死煩惱爲塞菩提涅槃

爲通復應須識於通起塞此塞須破於塞  
得通此通須護如將爲賊此賊豈存若賊  
爲將此將豈破節節檢校無令生著著故  
名塞破塞存通非唯一轍有心皆爾念念  
常須檢校通塞文安置丹枕者文句五廿  
云車若駕運隨所到處須此支昂譬即動  
而靜即靜而動文妙樂六廿云丹枕云支  
昂者即車外枕車住須支支之恐昂故云  
支昂支持也昂舉也譬動靜相即者車行  
枕閑即動而靜車息枕用即靜而動用時常靜閑時

常動實體與用亦復如是自因之果法性  
無動所以如風不移寂然而到萬行無作  
衆智莫觀此則三德俱不二也以三即一  
故使爾耳文輔行七下廿七云若車外枕或  
動或靜動靜祇是通塞義也文

六道品調適謂無作道品一一調停隨宜而

入經云有大白牛等已上五  
中根

大意七云約門徧破於理又昧應須七科  
次第調試若不爾者此之道品爲誰施設  
以破徧門雖觀陰境陰上未分念處名故

况有牛車運轉調停故用此門檢校銓擇

文實相爲車體道品爲前導故喻白牛白  
牛等者等於經中膚色充潔形體姝好有  
大筋力行步平正文也大意以中根至七  
乘今至第六者以正助分中下也

七對治助開謂若正道多障圓理不開須修  
事助謂五停心及六度等經云又多僕從此  
爲下  
根

大意八云七助道對治者涅槃云衆生煩  
惱非一種佛說無量對治門夫不信有對

治之人當知此人未曉正行若識已身正

行未辦良由事惡助於理惡共蔽理善令

不現前事惡若去理善易明故先修事度

以治事惡事惡傾已理善可生文

八知位次謂修行之人免增上慢故

大意八云下根障重非唯正助不明却生

上慢謂已均佛未得謂得未證謂證須知

次位使未紫不濫若未證得而謂證得非

唯失位却墮泥犁故小乘經中四禪比丘

謂爲四果大乘經中魔與菩薩授跋致記

若生取著必用涅槃尚夫人天何關至道

故大小經論咸明次位文於此知位次中

彌修五悔

九能安忍謂於逆順安然不動策進五品而入六根

大意九云圓頓行人初入外凡外招名利

內動宿障宿障縱薄名利彌至為衆圍繞廢損自行因茲破敗豈能進道外人視之

猶謂大聖如樹抱蠋表似內虛唯當自勉不為所動得入內凡名為似位文謂於逆

順等者逆是煩惱業定見慢等從內來破者當以內三術治之謂空假中也順則名

譽羅胃利養毛繩眷屬集樹妨蠹內侵枝葉外盡從外來破者當以外三術去之一

莫受莫着二縮德露毗三一舉萬里如此

世

元

觀七

十無法愛謂莫著十信相似之道須入初住

真實之理經云乘是寶乘遊於四方遊四直

至道場妙覺

大意九云若專住似位名為法愛已得相

似六根互用已破兩惑永無墜苦愛此似

位名為頂墮若修離愛進入銅輪名為十

住分身百界一多相即身土既爾已他亦

然十身利生四土攝物文

謹案台教廣本抄錄五時八教略知如此

此結所錄五時八教天台判釋儀式也

若要委明之者請看法華玄義十卷委判十

方三世諸佛說法儀式

所判聖教一期施化之相也

猶如明鏡及淨名玄義中四卷全判教相

妙樂一十七云淨名前玄總有十卷因為晉

王著淨名疏別製略玄乃離前玄分爲三部別立題目謂四教六卷四悉兩卷三觀兩卷後人合六爲四今云淨名玄義中四卷是也

自從此下略明諸家判教儀式耳

今依大本玄義抄錄綱要彼文今師判教之後備叙諸家今略去而不明也如是則顯上一書判釋儀式在今天台然所判是如來說法儀式能判是大師判教儀式兩種不分而分須善識焉

### 天台四教儀集註卷第九

音釋

錚匹迷切 糾他口切 慙禪列切 齧魚結切 綵莫割切  
 跣蒲結切 訂丁定切 鯁古杏切 詮七全切 毗  
足擊也 石也 魚骨也 魚骨也  
 且禮切五 色鮮也

世十

三